

ՀԻՆ ԱՌԱՔԵԱԼՆԵՐԻ ՆՈՐ «ԱՌԱՔԵԼՈՒԹԻՒՆՆԵՐԸ», ՌՈՒՍ ՈՒՂՂԱՓԱՌԵԿԵՂԵՑՈՒ ԵՒ «ԱԼԲԱՆԱ-ԱՌՐԲԵՋԱՆԱԿԱՆ»

ՍՊԱՍՈՒՄՆԵՐԸ ԲԱՐԹՈՒՂԻՄԷՈՍ ԱՌԱՔԵԱԼԻՑ

Հրանոյշ Խառատեան

2024 թ. Օգոստոսի 19-ին Ռուսաստանի Դաշնութեան նախագահ Վլադիմիր Պուտինը, այցելելով Բաքու, Ազրբեջանի նախագահ Իլհամ Ալիևի հետ միասին այցելեց Ռուս ուղղափառ եկեղեցու Բաքուի եւ Ազրբեջանի մայր աթոռ հանդիսացող «սուրբ իզդարբեր կանանց» (Святым жён-мироносиц) տաճար, որտեղ թեմի եպիսկոպոս Ալեքսին (Սմիռնով) նրանց պատմեց XX դարի սկզբին հիմնադրուած եւ վերականգնումից յետոյ 2003 թ. տաճարի վերաբացման պատմութիւնը: Նա տեղեկացրեց, որ տաճարում գտնուում է Բաքուի Հովանաւոր Բարթոլղիմէոս առաքեալի մասունքով տապանակ: «Ըստ աւանդութեան,- պատմել է Բաքուի եւ Ազրբեջանի թեմի եպիսկոպոս Ալեքսին երկու երկրների նախագահներին,- այդ քարոզիչը տանջալի նահատակութեան է ենթարկուել այստեղ՝ Բաքու քաղաքում, Девицья башня [ազրբեջաներէն՝ «Qız Qalası», հայերէն՝ «Աղջկայ բերդ» – Հ. Խ.] կոչուող յուշարձանի վայրում: Այնտեղ մինչեւ յեղափոխութիւնը [1920 թ. բոլշեւիկեան յեղաշրջումը – Հ. Խ.] մի մատուռ (часовня) կար Սուրբ Բարթոլղիմէոսի պատուին: Բաքուում գոյութիւն ունեցած հին աւանդոյթով մարդիկ Բարթոլղիմէոսի յիշատակի օրը հաւաքուել են այստեղ, աղօթել: Այդ պատճառով Սուրբ Բարթոլղիմէոսը համարուում է Բաքու քաղաքի եւ ողջ Ազրբեջանի, ինչպէս

նաեւ այստեղ ապրող բոլոր մարդկանց Հովանաւորը»²:

Սա միանգամայն նոր «տեղեկութիւն է քրիստոնէութեան պատմութեան մէջ: Երբեք որեւէ աղբիւր որեւէ լեզուով չի յիշատակել Բաքուում կամ Ազրբեջանի տարածքում Բարթոլղիմէոսի, կամ առհասարակ որեւէ առաքեալի նահատակութեան մասին: Առաքեալների գործունէութեան շրջանում առհասարակ «Բաքու» անունով բնակավայրի մասին որեւէ յիշատակութիւն չկայ: XIX-XX դդ. որեւէ տեղեկութիւն չի եղել նաեւ Բաքուում Ս. Բարթոլղիմէոսի յիշատակին հաւաքուելու որեւէ աւանդոյթի կամ մատուռի գոյութեան մասին:

Հասկանալի է, որ քրիստոնէութեան առաքելական շրջանի՝ առաջին դարի պատմութիւնը գրաւոր տեքստերով սկսել է գրանցուել շատ աւելի ուշ, III դարից, գլխաւորապէս IV-V դարերում, եւ յետագայում համալրուել է նոր մանրամասներով: Դրանց բուն աղբիւրը նախ եւ առաջ քրիստոնէական տարածքում շրջանառուող բանաւոր պատմութիւններն էին, որոնք էլ դարձել են այս կամ առաքեալի մասին տեղեկութիւնների հիմնաւորումների գլխաւոր նիւթը: Հասկանալի է նաեւ, որ կոնկրէտ առաքեալների գործունէութեան մասին տեքստային հիմնական նիւթը սնուել է այդ կոնկրէտ առաքեալների մասին նրանց գործունէու-

1 Владимир Путин и Ильхам Алиев посетили кафедральный собор Святых жён-мироносиц в Баку // <http://kremlin.ru/events/president/news/74890>

2 Ильхам Алиев лично прокатил Владимира Путина на Mercedes по «Белому городу» в Баку // <https://www.youtube.com/watch?v=59m2jY1bekw>, 0.50-1.24

թեան տարածքների/երկրների/ժողովուրդների միջավայրերում շրջանառուած բանաւոր պատմութիւններից: Սակայն ոչ միայն կայունացած կամ չկայունացած աւանդոյթ, այլեւ բանաւոր պատմութեան որեւէ յիշողութիւն որեւէ առաքեալի նահատակութիւն Ազրբեջանի տարածքում կամ Բաքու քաղաքում չեն յիշել/յիշատակել եւ երբեք որեւէ մէկի կողմից չեն գրանցուել:

Կոնկրէտ Բարթողիմէոս առաքեալի մասին քրիստոնէական աւանդականացած պատմութիւնը սկսել է ձեւաւորուել III դարից, քրիստոնէութեան պատմութեան՝ յունահռոմէական հեղինակների շարադրանքներում, V դարից՝ նաեւ հայկական, ասորական եւ այլ հեղինակների երկերում: Վաղ շրջանի քրիստոնէութեան պատմութեանն անդրադարձած յունահռոմէական, ասորական հեղինակները Բարթողիմէոսի քարոզչութեան շրջանակներից այս կամ այն չափով յիշատակում են Հնդկաստանը³, Աֆրիկան, Փոքր Ասիան եւ Մեծ Հայքը: Հայկական վաղ շրջանի աղբիւրներում Բարթողիմէոսի մասին տեղեկութիւնները գլխաւորապէս Մեծ Հայքի բնակչութեան մէջ տարածուած եւ հայ ժողովրդի յիշողութիւններն են: Այդ նիւթերում եւս ոչ Ազրբեջանի (որի անունը մինչեւ XIX դ. վերջերը յայտնի չէր), ոչ Բաքու քաղաքի (որի անունը նոյնպէս առաջին հազարամեակում անյայտ էր) տարածքում Բարթողիմէոսի գործունէութեան եւ նահատակութեան մասին որեւէ յիշատակութիւն չկայ:

Հայկական աւանդոյթում Բարթողիմէոս անունով յայտնի առաքեալը հին յունարէն՝ Βαρθολομαῖος, լատիներէն՝ Bartholo-

maeus, ռուս ուղղափառ եկեղեցում Βαρθολομεύ) V դարից սկսած միշտ յիշատակուել եւ ընդունուել է որպէս առաջին դարում Մեծ Հայքում գործած ու նահատակուած քարոզիչ: Քրիստոնէական առհասարակ, եւ հայկական՝ մասնաւորապէս, աւանդոյթում Յիսուս Քրիստոսի 12 առաքեալներից Թադէոսը եւ Բարթողիմէոսն էին այն առաքեալները, ովքեր քրիստոնէութիւնը Հայաստան՝ Մեծ Հայք բերեցին, եւ Մեծ Հայքում էլ նահատակուեցին: Հէնց այդ պատճառով է Հայաստանի քրիստոնէական եկեղեցին կոչուում Առաքելական Սուրբ Եկեղեցի: Ըստ գրաւոր տեղեկութիւնների՝ այլ առաքիալներ եւս Հայաստանում եղել են, կամ Հայաստանով անցել են, բայց Հայաստանում առաքելական գործունէութիւնը վերագրւում է գլխաւորապէս Թադէոսին ու Բարթողիմէոսին: Ընդ որում, Հայաստանը եղել է նրանց գործունէութեան վերջին հանգրուանը, քանի որ երկուսն էլ հէնց այստեղ են նահատակուել:

Փորձենք տեսնել, թէ ինչպէ՞ս է Բարթողիմէոսի՝ Բաքու քաղաքում նահատակուած լինելու մասին «տեղեկութիւնը», կամ, որ աւելի ճիշտ կը լինի ասել՝ յայտարարութիւնը հիմնաւորում Ռուս Ուղղափառ Եկեղեցին:

2004 թ. հրատարակուած է Ռուս Ուղղափառ Եկեղեցու Մոսկուայի Պատրիարքութեան Բաքուի թեմի հոգեւորական Ա. Նիկոնորովի «Քրիստոնէութեան պատմութիւնը Կովկասեան Ալբանիայում» վերնագրով աստուածաբանութեան թեկնածուի կոչման ատենախօսական թեզը⁴, որում առկայ է «Առաքելական շրջան» բաժին, այդ

3 Հնդիկներին յաճախ շփոթում էին եթովպացիների հետ՝ Հնդկաստանն ու Եթովպիան համարելով մէկ երկիր: St'au The Cambridge Dictionary of Christianity, Edited by Daniel Patte (Series: Contrapuntal Readings of the Bible in World Christianity), Wipf & Stock Publishers, 2021, Vol. 2, p. 909.

4 Иероманах Алексей (Никоноров), История христианства в Кавказской Албании: Диссертация на соискание ученой степени кандидата богословия: Научный руководитель: профессор Б.А. Нелюбов, Сергиев Посад, Троице-Сергиева Лавра, 2004 г. // <https://baku-eparhia.ru/history/albania/> (այցելութիւնը՝ 12.06. 2025):

թուում «Բարթոլոմեյի առաքելի քարոզչութիւնը»: Այս բաժինը սկսւում է «Տասներկուսից մէկը՝ Բարթոլոմեյի առաքելը, եկեղեցական ականդութեան համաձայն, Քրիստոսի հաւատը քարոզել է Կովկասեան Ալբանիայում» յայտարարութեամբ: Հեղինակը գերադասում է չասել, թէ ի՞նչ «եկեղեցական ականդութիւն» է խօսում կամ գրում Կովկասեան Ալբանիայում Բարթոլոմեյի մասին: ... «Բարթոլոմեյի առաքելը, վարքի համաձայն («վարք» բառի վրայ նա յղում է անում XVIII դ. ռուսական Յայսմաւորքը կազմած Դմիտրի Ռոստովսկու՝ Свт. Димитрий Ростовский. Жизнь святых. Козельск, 1992, Кн. X (июнь), С. 203-211 [Դմիտրի Ռոստովսկի, Սրբերի վարքերը, Կոզելսկ, 1992, Գիրք X (Յունիս), էջ 203-211]: Նիկոնորովը աւելորդ չի համարում «տարակուսել», որ «յայտնի է, թէ որտեղից է Դմիտրի Ռոստովսկու յայտնի Ալբանիայում առաքելի գործունէութեան մասին: Հնարաւոր է, որ իր աշխատանքը կազմելիս հեղինակը տիրապետել է Բարթոլոմեյի մասին իրեն հասած ինչ-որ աւելի հին պատմութիւնների: Այսօր եկեղեցագիտութիւնը այդպիսի աղբիւրներ չունի» (բնագրում. «Откуда святитель Димитрий черпал сведения об обстоятельствах проповеди Апостола в Албании, неизвестно. Возможно, что при составлении своего труда автор обладал дошедшими до него более древними сказаниями об апостоле Варфоломее. На сегодняшний день такими источниками церковная наука не располагает»): Ստորեւ կը տեսնենք, որ Դմ. Ռոստովսկու կազմած Յայսմաւորքը Ալբանիայում Բարթոլոմեյի մասին գործունէութեան մասին որեւէ տեղեկութիւն չունի:

«Հնդկաստանում Աւետարան քարոզելուց յետոյ գնաց Կովկասեան Ալբանիա», - շարունակում է ատենախօսութեան հեղինակ Նիկոնորովը՝ գերադասելով լուել, թէ որտեղից է այս տեղեկութիւնն իրեն

յայտնի: «Յայտնի է, որ հնում Հնդկաստանի եւ Ալբանիայի միջեւ մերձաւորագոյն կրօնական եւ առեւտրական կապեր կային», - երրորդ յայտարարութիւնն է անում նա, կրկին չասելով, թէ ո՞ւմ եւ որտեղից են յայտնի քրիստոնէական առաջին դարում «Հնդկաստանի եւ Ալբանիայի միջեւ մերձաւորագոյն կապերը»: Չորրորդ յայտարարութեամբ Ա. Նիկոնորովը «տեղեկացնում է», որ Բարթոլոմեյի առաքելը Հնդկաստանում հաւանաբար տեղեկանում է Կովկասեան Ալբանիայում գրադաշտականութեան գոյութեան մասին այնտեղ գնացած ուխտաւորներից (° - Հ. Խ.) եւ իր քարոզչութեան համար ընտրում է Կովկասեան Ալբանիան:

Բացարձակապէս ոչնչով չհիմնաւորուած այս յայտարարութիւններից յետոյ երիտասարդ աստուածաբանը միանգամից թռիչք է կատարում մ.թ. XIII դ. հերթական կեղծիքը հրամցնելով, թէ ինչպէս XIII դարի «սիւնեցի» հեղինակ Ստեփանոս Օրբէլեանը գրում է, որ «Բարթոլոմեյի առաքելական գործունէութիւնը շատ սերտօրէն կապուած էր Ալբանիայի Սուհիքի շրջանի հետ» (Օրբէլեանը «Ալբանիայում» Բարթոլոմեյի մասին ոչինչ չի գրել - Հ. Խ.) գրչի մի հարուածով «ալբանացի եւ ալբանական» դարձնելով հայ պատմագիր Օրբէլեանին ու Մեծ Հայքի Սիւնիք նահանգը, եւ իր այս ցանկութեան համար յղելով «հայ պատմագիր Մովսէս Խորենացուն, ալբանացի պատմագիրներ Ստեփան Օրբէլեանին եւ Մովսէս Կաղանկատուացուն», չմոռանալով որպէս զլիսաւոր հիմք «օգնութեան կանչել» աղբիւրների կեղծման հարուստ փորձ ունեցող Զ. Բունիաթովին՝ ի դէմս նրա «Азербайджан в VII-IX вв., Баку, 1965, с. 78, 92-93, 100» (Ադրբեջանը VII-IX դդ., Բաքու, 1965, էջ 78, 92-93, 100) գրքի. Կարող է տարօրինակ թուալ, որ XXI դարում աստուածաբանութեան թեկնածուն յղում է հայ հեղինակներին՝ շրջանցելով XIII դարի հայ աստուածաբան, մեկնիչ, մատենագիր,

ադրբեջանական արդի «ալբանական պատմագրութեան» առաջամարտիկների կողմից ալբանական կարգուած Վանական Վարդապետին (1181-1251): Թուում է՝ ոուս երիտասարդ աստուածաբանը նրան առաջինը պիտի «նկատեր», քանի որ գործել է ժամանակակից Ադրբեջանում XX դարում ներառուած Արցախի տարածքում եւ գրել է հայերի քրիստոնէացման վաղ շրջանի՝ I դարի, այդ թուում՝ Բարթոլղիմէոս առաքեալի մասին. «Աբգար թագաւորն յառաջ քան զխաչելութիւնն հաւատաց ի Քրիստոս եւ երանեցաւ ի նմա: Եւ երեք առաքեալ ունիւ Հայք Բժ-իցն [12-ից]՝ զԹադէոս, զԲարթոլղիմէոս եւ զՅուդայ Յակոբեան՝ որ կայ յՈրմի քաղաք, որ է սեփական Հայոց»⁵: Հարց չկա՞յ, թէ ինչու որեւէ ակնարկ չկայ Ալբանիայում Բարթոլղիմէոսի նահատակութեան մասին: Մեկ այլ թղթում Վանական Վարդապետը Հայաստանում առաքեալների գործունէութեան մասին մի փոքր աւելի ընդարձակ է խօսում. «Ի մտին ի Հայք առաքեալքն Բարթոլղիմէոս եւ Թադէոս եւ Յուդայ Յակոբեան. բայց Բարթոլղիմէոս վասն այն եղի սկիզբն, զի ունանք զԹադէոս եթանասնիցն ասեմ, եւ զԲարթոլղիմէոս մին յԲժ-ցն [12-ից]. Թադէոս, զոր Աւետարանն պատմէ թէ յառաջ կոչեր Ղէթոս, եւ ի Տէառնէ անուանեալ Թադէոս: Յուդայ Յակոբեան՝ որ եւ սա՛ է յԲժ-իցն, վկայի եւ կայ յՈրմի քաղաք Հայոց»⁶: Կրկին՝ ոչ մի խօսք Ալբանիայի եւ աղուանների մասին:

Երիտասարդ ոուս աստուածաբանը չի խորշում կեղծել նաեւ «Սրբերի վարքի» XVIII դ. ոուս հեղինակ Դմիտրի Ռոստովսկու Հայաստանում Բարթոլղիմէոսի գործունէութիւնը ներկայացնող իրականում բարեխիղճ աշխատանքը՝ «Հայաստան» անուան փոխարէն գրելով «Ալբանիա»՝ «Դմիտրին ներկայացնում է այդ ժամանակ Ալբա-

նիայում տեղի ունեցող դէպքերը՝ Ալբանական երկրին իշխող Պոլիմիոսի դատեր բժշկութիւնը, այլ հրաշքներ»՝ իր կողմից աւելացնելով, որ այդ ժամանակ ոչ Ալբանիայում, ոչ Հայաստանում Պոլիմիոս անուանով թագաւոր չի եղել.

Ռուս Ուղղափառ Եկեղեցու Մոսկուայի Պատրիարքութեան Բաքուի թեմի հոգեւորական Ա. Նիկոնորովին, պարզուած է, յայտնի են նաեւ Բարթոլղիմէոսի գործունէութեան մասին վաղ շրջանի լատինագիր հեղինակների տեղեկութիւնները, եւ նա նոյնիսկ գրում է այդ մասին. ըստ Հիպպոլիտէս Հռոմէացու վկայութեան (մօտ 222 թ.)՝ «*Bartholomaeus, cum Indis praedicasset, eisque conscriptum a Mathaeo Evangelium exposuisset, crucifixus est et ipse, capite deorsum verso, Albani Magnae Armeniae urbe*» [Բարթոլղիմէոսը հնդիկներին քարոզելուց եւ Մատթէոսի աւետարանը ներկայացնելուց յետոյ գլխի վար խաչուել է Մեծ Հայքի Ալբան քաղաքում]. ըստ Դորոֆէի վկայութեան (307-322 թթ.)՝ «*Bartholomaeus... Indis praedicato Evangelio eisque dato Mathaei Evangelio, martyr obiit Carbanopoli Magnae Armeniae urbe*» [Բարթոլղիմէոսը, հնդիկներին քարոզելուց եւ Մատթէոսի աւետարանը նրանց տալուց յետոյ տանջալի մահ է գտել Մեծ Հայքի Կարբոնոպոլիս քաղաքում]. ըստ Սոֆրոնիոս Կիպրացու վկայութեան (390 թ.)՝ «*Dormiuit Albanopoli, oppido Maioris Armeniae*» [Ննջել է Մեծ Հայքի Ալբանոպոլիս քաղաքում]. ըստ Նիկետաս Պափլագոնացու վկայութեան (մօտ 873 թ.)՝ «*Contigit in guadam urbe Maioris Armeniae (quam Urbanopolin vocant) versari et caet...*» [Նրան բաժին ընկաւ գտնուել Ուրբանոպոլիս անունով քաղաքում Մեծ Հայքում]⁷ եւն: Ճիշտ է՝ Ա. Նիկոնորովն ուղղակի պատճենել է «Ռուսական Եկեղեցու

5 Վանական վարդապետին ասացեալ բան հաստատի ազգիս մերում,- Գիրք թղթոց. Մատենագրութիւն Ասիանեաց, Թիֆլիս, Տպ. Տ. Ռոստինեանց եւ Մ. Ծարաձէ, 1901, էջ 534:

6 Այլ բան է ասացեալ Վանական վարդապետին,- Գիրք թղթոց, էջ 536:

7 La Bigne M. de. *Maxima bibliotheca veterum patrum et antiquorum scriptorum ecclesiasticorum.*

պատմութեան» Հեղինակ, Մոսկուայի միտրոպոլիտ Մակար Բուլգակովի աշխատանքի համապատասխան հատուածը, որին անդրադարձ կը լինի ստորև: Սակայն նրա ատենախօսութեան ղեկավար պրոֆէսոր Բ. Ա. Նելիւբովը առնուազն պիտի զգուշացրած լինէր իր սանին, որ կեղծիքը եւ ուրիշի աշխատանքը պատճէնելը առանց Հեղինակին յղելու գիտութեան մէջ համարուած է գրագողութիւն եւ անթոյլատրելի է:

Երիտասարդ Ա. Նիկոնորովն «անօգուտ չի համարել» նշել, որ որոշ հայկական աւանդապատումներով Բարթոլոմէոսը Հնդկաստանից յետոյ Աւետարանը քարոզել է Պարսկաստանում եւ Հայաստանում, բայց «իր տառապագին մահից առաջ» գնացել է Ալբանիա: Բնականաբար, Բարթոլոմէոսի «Ալբանիա գնալու» մասին գոյութիւն չունեցող «Հայկական աւանդապատումները» ազբեր չի յիշատակում: Ի վերջոյ նա «տեղեկացնում է», որ «Ալբան քաղաքը ժամանակակից Բաքուն է», չբացատրելով, թէ ե՞րբ, ինչպէ՞ս եւ ինչո՞ւ է Ալբանը «Բաքու» դարձել, աւելացնելով, որ Ալբանիայում Բարթոլոմէոս առաքելի գործունէութեան մասին Հնագոյն Հեղինակների տեղեկութիւնների մասին իր «ռուսական եկեղեցու պատմութիւնը» գրքում գրել է նաեւ Մոսկուայի միտրոպոլիտ Մակար Բուլգակովը: Երիտասարդ ատուածաբանը իր այս յայտարարութեան հիմնաւորման համար առաջարկում է նայել Митр. Макарий (Булгаков). История Русской Церкви, М., 1994, Кн. I, С. 284 [Մակարի Բուլգակով, Ռուսական եկեղեցու պատմութիւն, Մոսկուա, 1994, գիրք I, էջ 184]:

Մակար Բուլգակովի աշխատանքի 1994 թ. հրատարակութեան էջ 184-ում ոչինչ չգտնելով՝ նայենք համապատասխան բաժինը՝ առաջին գրքի չորրորդ գլուխը՝

«Առաքելական քարոզչութիւնը Անդրկովկասում», որտեղ էջ 247-248 էջերում ուղղակիորէն գրուած է «Բարթոլոմէոս առաքելը Հնդիկների մօտ ճամփորդելուց եւ նրանց երբայերէն լեզուով Մատթէոսի աւետարանը թողնելուց յետոյ, բարի լուրը [բերեց] Մեծ Հայք եւ այստեղ Ալբան [Ալբանոպոլիս] քաղաքում, որի անունով ողջ մարդը կոչուում էր Ալբանիա, տանջալի մահ գտաւ. այսպէս են նրա մասին ասում III, IV եւ յետագայ դարերի բոլոր պատմութիւնները: Այս առաքելի մասին աւելի հիմնաւոր աւանդութիւններից իմանում ենք, որ բազմաթիւ հրաշքներով ուղեկցուող նրա քարոզչութիւնը Մեծ Հայքում մեծ յաջողութիւն է ունեցել» (բնագրում «Апостол Варфоломей после путешествия своего у индийцев, которым оставил Евангелие от Матфея на еврейском языке, благовествовал в Великой Армении и здесь, в городе Албане (Албанополисе), от которого вся область называлась Албаниею, потерпел мученическую смерть — так гласят все краткие сказания о нем III, IV и последующих веков {247}. Из более же обстоятельных преданий о сем апостоле узнаем, что его проповедь, сопровождавшаяся многочисленными чудесами, имела в Великой Армении большой успех»): Խօսքը Մեծ Հայքի Վասպուրական նահանգի Աղբակ (Հմմ. Ալբան) գաւառի եւ նրա կենտրոն Աղբակ քաղաքի մասին է, որը ոչ մի կապ չունէր Հարաւային Կովկասի Ալբանիա կոչուող երկրի հետ: Մակարի Բուլգակովի համար Կովկասեան Ալբանիան ժամանակակից Դաղստանն է, ինչպէս գրում է նա իր աշխատանքի I-ին մասի չորրորդ գլխի նախաբանում, 1994 թ. հրատարակութեան մէջ՝ էջ 241-ում (Албанию /нынешний Дагестан/):

Lugduni, 1677, part. 3, p. 265, part. 27, p. 408; *Corpus byzantinae historiae* [scriptorum], 2nd ed., Venetiis, 1729-1733, 5, 349; Hieronymus Stridonensis,

Opera omnia, Francofurti ad Maenum, 1684, part. 1, p. 171.

Հասկանալի է, որ Ազրբեջանի հեղինակների համար երիտասարդ ոուս ստուածարանի այս ատենախօսութիւնը շատ սիրելի եւ անընդհատ յղուող գիրք է:

Չիօսելով Ռուս Ուղղափառ Եկեղեցու Բաքուի թեմի այս հոգեւորականի բազմաթիւ այլ «մարգարիտների»՝ կեղծիքների մասին, անդրադառնանք նախ ոուսական «Յայմաւուրքին»՝ 1700-ականներին Դիմիտրի Ռոստովսկու կազմած «Четых-Миней»-ին («չեթիի»՝ «կարգալու համար սահմանուած», եւ յունարէն *μηνιαίος /մինիէոս/* – ամսական): Սրանք գրքեր են, որոնցում առաջին անգամ կանոնակարգուած ներկայացուած են Ռուս Ուղղափառ Եկեղեցու կողմից ճանաչուած սրբերի վարքերը՝ կենսագրութիւնները, գործունէութիւնը, եւ դասակարգուած են Ռուս Ուղղափառ Եկեղեցու սրբերի տօնահանգէսների ու յիշատակի օրերը ըստ տարուայ 12 ամիսների համապատասխանաբար 12 հատորով⁸: Առաջնորդուենք 2010 թ. հրատարակութեամբ: Հատորներից իւրաքանչիւրի տիտղոսաթերթին գրուած է «տուեալ հրատարակութիւնը իրենից ներկայացնում է Մոսկուայի սինոդի 1904-1911 թթ. կողմից տպագրուած նախայեղափոխական տեքստի նոր շարուածքը ժամանակակից ուղղագրութեամբ» («Данное издание представляет собой новый набор дореволюционного текста, напечатанного в Московской синодальной типографии в 1904-1911 гг. в современном правописании»): Առաջին հատորը

սկսում է սրբերի՝ Սեպտեմբեր ամսուայ յիշատակի օրերով: Ռուս Ուղղափառ Եկեղեցին Բարթոլղիմէոսի յիշատակի օրը պաշտօնապէս նշում է հին տոմարով Յունիսի 11-ին, նոր տոմարով՝ Յունիսի 14-ին, հետեւաբար Բարթոլղիմէոսի վարքի մասին տեղեկութիւնները ներկայացուած են 10-րդ հատորում: Հաշուի առնելով այս աղբիւրի կարեւորութիւնը, Բարթոլղիմէոսի մասին հատուածը ստորեւ ներկայացուած է համարեա ամբողջութեամբ. «Սուրբ Բարթոլղիմէոս առաքեալի կեանքը եւ տառապանքները» շարադրանքում *Четых-Миней* կազմողը գրում է, որ նա Քրիստոսի 12 առաքեալներից մէկն էր, Քրիստոսի նահատակութիւնից յետոյ նրան վիճակ էր ընկել աւետարանը քարոզել Սիրիայում եւ Փոքր Ասիայում: Բարթոլղիմէոսը քարոզչութիւնն սկսել է 12 առաքեալներից մէկ ուրիշի՝ Փիլիպոսի հետ: Փոքր Ասիայում նրանք գործել են գլխաւորապէս Փոհլգիայում, մասնաւորապէս Հիերապոլիս⁹ քաղաքում: Քարոզիչների զանազան հրաշագործութիւնները թուարկուած են, բայց, ի վերջոյ, քաղաքի բնակիչները խաչ են հանել երկու առաքեալներին: Փիլիպոսը նահատակուել է, բայց Բարթոլղիմէոսը կենդանի է մնացել: Այստեղից Բարթոլղիմէոսը գնացել է «Հնդկական երկրներ», որտեղ տեղացիներին աւետարան է նուիրել, այնուհետեւ անցել է Մեծ Հայք՝ «Հնդկաստանից սուրբ Բարթոլղիմէոսը ճանապարհուեց Մեծ Հայք: Նրա յայտնուելու ժամանակ

8 Այս աշխատանքը ժամանակակից ոուսերէն չի թարգմանուել: Այն վերամշակուել է պատմաբան Վ. Օ. Կլիչենսկու խմբագրութեամբ եւ հրատարակուել «Жития святых на русском языке, изложенные по руководству Четых-Миней св. Димитрия Ростовского с дополнениями, объяснительными примечаниями и изображениями святых» անուամբ:

9 Հիերոպոլիսը (յուն.՝ «Սուրբ քաղաք») փոհլգիական կարեւոր քաղաք էր մ.թ.ա. II-I հազարամեակներում: Ըստ աւանդութեան՝ կառուցուել է յունական Ապոլոն աստծու կամ փոհլգիական մայր աստուածուհի Կիբելայի պատուին մ.թ.ա. II

հազարամեակում: Սելեւկեանցների Անտիոքոս Մեծ կայսրը Բաբելոնից եւ Միջագետքից հազարատր հրեայ ընտանիքներ է տեղափոխել Փոքր Ասիա, եւ, ըստ տեղեկութիւնների, մ.թ.ա. 62 թ. Հիերոպոլիսում հրեաների թիւը շուրջ 50 հազար էր: Մ.թ. V դ. հեղինակ Ստեփանոս Բիւզանդացու վկայութեամբ՝ Հիերոպոլիս քաղաքում բազմաթիւ տաճարներ կային [3, 175]: Մ.թ. I դարում՝ առաքեալների գործունէութեան շրջանում, ծաղկուն քաղաք էր: Հիերոպոլիսի աներակները գտնուում են թուրքական Փամուկլայէ (Բամբակէ ամրոց) քաղաքի հարեանտեմքում եւ համարում են կարեւոր գբօսաշրջային վայր:

կուռքերը, կամ, լաւ կը լինի ասել կուռքերի մէջ բնակաւորուած դեւերը, բարձր ճշարտով, որ Բարթոլոմէոսը իրենց տանջում է եւ շուտով կը վռնդի, լռեցին: Իսկապէս, առաքեալի մօտենալիս անմաքուր ուժերը դուրս էին մղուած ոչ միայն կուռքերից, այլեւ մարդկանցից: Յանուն դրա շատերը դարձան Քրիստոսին: Այդ երկրի թագաւոր Պոլիմիոսը դիւահար դուստր ունէր, որի բերանով դեւը բացականջում էր. «Բարթոլոմէոս, դու մեզ այստեղից էլ ես քշում»: Այդ մասին լսելով թագաւորը հրամայեց անյապաղ գտնել Բարթոլոմէոսին, եւ երբ Քրիստոսի առաքեալը եկաւ դիւահարի մօտ, դեւն անմիջապէս փախաւ եւ արքայադուստրը բուժուեց: Թագաւորը շնորհակալութեամբ սրբին ուղարկեց ոսկով, արծաթով, մարգարիտներով եւ այլ թանկարժէք պարգեւներով բեռնուած ուղտեր: Առաքեալը, սակայն, բոլորը յետ ուղարկեց ասելով. «ես այս իրերը չեմ ձեռք բերում, ես մարդկանց հոգիներ եմ փնտրում, եւ երբ դրանք ձեռք բերեմ եւ ուղարկեմ երկնային/գրախտային բնակավայրեր, ապա Տիրոջ կը ներկայանամ որպէս մեծ վաճառական»: Այս խօսքերից յուզուած թագաւորը հաւատաց Քրիստոսին իր ողջ տնով/ընտանիքով, թագաւորը, թագուհին, նրա բուժուած դուստրը, շատ ազնուականներ եւ ժողովրդից շատ մարդիկ մկրտուեցին սուրբ առաքեալի կողմից: Թագաւորի օրինակով տասից աւելի քաղաքներ ընդունեցին սուրբ մկրտութիւն: Իրենց աստուածների կործանմամբ, կռապաշտութեան անհետացմամբ, տաճարների ամայացմամբ խորապէս վշտացած քրմերը վրդովուած էին առաքեալի դէմ: Մերձենալով թագաւորի եղբոր Աստիագի հետ, նրանք սովորեցրին

նրան վերացնել Բարթոլոմէոսին եւ վրէժխնդիր լինել նրանից իրենց աստուածների վիրաւորելու համար: Սա էլ, յարմար ժամանակ գտնելով, բռնեց սուրբ առաքեալին եւ Ալբան քաղաքում գլխիվայր խաչեց: Սուրբ առաքեալը ուրախանում էր յանուն Քրիստոսի կրած տառապանքների համար, եւ խաչից կախուած շարունակում էր անհաւատներին հաղորդել Աստուծոյ խօսքը: Հաւատացեալների հաւատն ամրապնդում էր, անհաւատներին համոզում էր ճանաչել ճշմարտութիւնը եւ դիւական խաւարից անցնել Քրիստոսի լոյսին: Նրան խոշտանգողը էր կարող դա լսել, եւ հրամայեց առաքեալին մաշկահան անել: Այդ տառապանքին համբերութեամբ դիմացող սուրբը չլռեց, չզաղարեց սովորեցնել Աստուծո մասին եւ գովաբանել նրան: Ի վերջոյ խոշտանգողը հրամայեց մաշկահան անելուց զատ գլխատել սուրբ Բարթոլոմէոսին: Այդ ժամանակ լռեցին նրա աստուածախօս շուրթերը, իսկ երբ գլուխն անջատուեց մարմնից, մարմինը մնաց խաչից կախուած ոտքերը դէպի վեր, ասես առաքեալի երթը դէպի երկինք ցուցադրելով: Այդպէս վախճանուեց Քրիստոսի Բարթոլոմէոս առաքեալը, բազմաթիւ հիւանդութիւններից եւ շարժարանքներից յետոյ, յուրախութիւն Տիրոջ, անցնելով անցաւ հանգստի: Առաքեալի վախճանուելուն ակնաստես հաւատացեալները խաչից հանեցին մարմինը եւ գլխի ու մաշկի հետ միասին դնելով թիթեղեայ տուփի մէջ, թաղեցին նոյն քաղաքում՝ Մեծ Հայքում գտնուող Ալբանում: Առաքեալի մասունքներից հիւանդները հրաշագործ բուժումներ ստացան, ինչի համար անհաւատներից շատերը դարձան դէպի Քրիստոսի եկեղեցին»¹⁰: Այնուհետեւ

10 *Житие святых на русском языке, изложенные по руководству Четырёх-Миней святого Димитрия Ростовского, книга десятая, Июнь, М., «Ковчег», 2010, с. 197-198.*
([https://azbyka.ru/otechnik/books/file/24211-%D0%96%D0%B8%D1%82%D0%B8%D1%8F-](https://azbyka.ru/otechnik/books/file/24211-%D0%96%D0%B8%D1%82%D0%B8%D1%8F-%D1%81%D0%B2%D1%8F%D1%82%D1%8B%D1%85-%D0%9A%D0%BD%D0%B8%D0%B3%D0%B0-X.pdf)

[%D1%81%D0%B2%D1%8F%D1%82%D1%8B%D1%85-%D0%9A%D0%BD%D0%B8%D0%B3%D0%B0-X.pdf](https://azbyka.ru/otechnik/Dmitrij_Rostovskij/zhitij-a-svjatykh/504#source)); Տե՛ս նաև *Житие и страдания святого апостола Варфоломея –*
https://azbyka.ru/otechnik/Dmitrij_Rostovskij/zhitij-a-svjatykh/504#source

խօսուում է Բարթոլղիմէոս առաքեալի մասունքների տեղաշարժերի մասին:

Ինչպէս տեսնում ենք, ռուսական այս կարեւոր Յայտմաւորքի տեքստում ոչ մի խօսք չկայ ո՛չ Ալբանիայի, ո՛չ Բաքուի մասին: Նրա յիշատակած «Ալբան» քաղաքը, իր իսկ հաւատամբ, Մեծ Հայքում է: Շուրջ 300 տարի ռուսական քրիստոնէական աւանդոյթը համարել է, որ Հնդկաստանում, Սիրիայում, Փոիւզիայում քարոզելուց յետոյ Բարթոլղիմէոսը գնացել է Մեծ Հայք, որտեղ նահատակուել է նրա Ալբան քաղաքում: Բայց ահա 2010 թ. վերահրատարակուած Դմիտրի Ռոստովսկու «Սրբերի վարքի» հրատարակիչը (Մոսկուա, «Կովչեգ», 2010) Ս. Բարթոլղիմէոսի վարքի տեքստում «Ալբան» քաղաքի անունը վերաբերեալ բոլորովին նոր, անհասկանալի ծանօթագրութիւն է աւելացրել (թիւ 3832 ծանօթագրութիւնը). «Ալբանը (կամ Ալբանոպոլիս, նաեւ Աբարնոպոլիս) քաղաք է Կասպից ծովի արեւմտեան ափին, ներկայիս Բաքուն» (բնագրում՝ «Альбан (или Албанополь, также Абарнополь) – город на западном берегу Каспийского моря – нынешний Баку»)¹¹:

Հրատարակիչները եւս մէկ ծանօթագրութիւն են աւելացրել աշխատանքի՝ «Բարթոլղիմէոսին... «Թաղեցին նոյն քաղաքում՝ Մեծ Հայքում գտնուող Ալբանում» բառերի վրայ (թիւ 3833 ծնթ.), ըստ որի «Սյրենի վարքը կազմող Դմիտրի Ռոստովսկին Ալբան քաղաքը սխալմամբ տեղադրում է Մեծ Հայքի տարածքում: Ալբանը (Ժամանակակից Բաքուն), որտեղ գտնուում է Բարթոլղիմէոս առաքելի վկայաբանական վախճանի վայրը, Կասպից ծովի արեւմտեան ափին գտնուող քաղաք է, պատմականօրէն երբեք Մեծ Հայքը կազմող տարածքում չի եղել, այլ քաղաք էր Կովկասեան

Ալբանիայում, ինչի մասին խօսում է նաեւ անուր» (ռուսերէն բնագրում. «В данном случае составитель жития свт. Димитрий Ростовский ошибочно помещает город Альбан на территорию Великой Армении. Альбан (современный Баку), где находится место мученической кончины апостола Варфоломея, исторически никогда не находился на территории, входящей в состав Великой Армении, а был городом Кавказской Албании, о чем говорит и само название»)¹²: Այս ծանօթագրութիւնները որեւէ կոնկրէտ հիմնաւորում չունեն, աղբիւր չեն նշում, չի խօսուում նաեւ այն մասին, թէ ինչ կապ ունի «Կովկասեան Ալբանիա» անունը «Բաքու» անուն հետ: Հասկանալի չէ, թէ ի՞նչ է նշանակում «Կովկասեան Ալբանիան» մ. թ. I դարում: Սա այն դէպքում, երբ Ալբան, Աղբակ, Ալբակ, Աղբան, Ալբայ, Ալբիս, Ալբիստան, Ալբաւայ, Ալբուս տեղանուններով բնակավայրեր կային Մեծ Հայքում՝ Արեւմտեան Հայաստանում, առաւելապէս Վասպուրականում, բայց նաեւ Աղձնիքում, Կիլիկիայում¹³: Վասպուրականում էր նաեւ Աղբակ գաւառը, որտեղ Բարթոլղիմէոսի գործունէութեան մասին շատ են գրել հայկական աղբիւրները:

Ծանօթագրութիւնից անհասկանալի է մնում, թէ ինչպէ՞ս եւ ինչո՞ւ է «Մեծ Հայքի թագաւորի եղբայր Աստիագը» հազար կիլոմետր ճանապարհ անցել Բաքու քաղաքում Բարթոլղիմէոսին չարչարելու եւ նահատակելու համար: Տրամաբանօրէն՝ նրա նպատակը պիտի լինէր քրիստոնէութիւն քարոզող Բարթոլղիմէոսին Մեծ Հայքից հեռացնելը: Եթէ նա արդէն հեռացել էր, անիմաստ էր հազար կիլոմետր ճանապարհ անցնել այլեւս վտանգ չներկայացնող մարդուն չարչարելու համար: Ըստ հայկական աւանդոյ-

11 Примечание 3832 «Азбуки веры» https://azbyka.ru/otechnik/Dmitrij_Rostovskij/zhitija-svjatykh/504#source
12 Примечание 3833 «Азбуки веры»

(https://azbyka.ru/otechnik/Dmitrij_Rostovskij/zhitija-svjatykh/504#source)
13 Հայաստանի եւ յարակից երկրների տեղանունների բառարան, հտ. 1, էջ 70-73:

թի՝ ինչպէս ստորեւ կը տեսնենք, Բարթոլոմէոսը նահատակուել է Մեծ Հայքի Վասպուրական նահանգի Աղբակ գաւառի Աղբակ քաղաքում: Հայերէնում «ղ» տառի անցումը լատիններէն «լ» տառին Աղբակը անպարարութեամբ դարձրել է «Ալբան» գիրքը հրատարակած *азбука.ру* հրատարակչութեան ծանօթագրողների պարզ ցանկութեամբ, կամ, Հնարաւոր է, ինչ որ հրահանգով:¹⁴ Յետագայում Բարթոլոմէոսի նահատակութիւնը Բաքում ներկայացնող ռուսական տեղեկատուները պարզապէս յղում են անում Դմիտրի Ռոստովսկու XVIII դ. գրուած գրքին՝ վերջինիս վրայ գնելով գրքի 2010 թթ. հրատարակիչների կեղծարարութեան պատասխանատուութիւնը:

Քանի որ աստուածաբանութեան երիտասարդ թեկնածու Նիկոնորովը յղում է այս աշխատանքի Կոզլիսկի հրատարակչութեանը, անդրադառնանք նաեւ դրան: Ենթադրելի է, որ խօսքը գնում է «Жития святых святителя Димитрия Ростовского. В 15-ти книгах. Козельск. Свято-Введенская Оптина Пустынь. 1991-1994» հրատարակչութեան մասին: Կոզլիսկի 1992 թ. հրատարակչութիւնը համացանցում չկայ, սակայն կայ այդ հրատարակչութեան պատճէնի 2004 թ. Կիեւի «Պեչորսկի Լաւրա»-ի հրատարակչութիւնը: Այս հրատարակչութիւնը նոյնութեամբ կրկնում է Բարթոլոմէոսի մասին Դմիտրի Ռոստովսկու ողջ պատմութիւնը, այդ թւում այն մասին, որ քրմերի

ներշնչանքով հայ թագաւորի եղբայր Աստիգը «յարմար պահ գտնելով բռնեց սուրբ Առաքեալին Ալբան քաղաքում» ...եւ ի վերջոյ գլխատեց նրան: «Ալբան» տեղանուն վրայ հրատարակիչը դրել է թիւ 11 ծանօթագրութիւնը. «Ալբան (կամ Ալբանոպոլ, նաեւ Աբարնոպոլ) – քաղաք է Կասպից ծովի արեւմտեան ափին, ներկայիս Բաքուն» [բնագրում. «Альбан – город на западном берегу Каспийского моря – нынешний Баку»]. Տեքստը շարունակուում է. այս ամենին ականատես հաւատացեալները Առաքեալի մարմինն իջեցրին խաչից եւ թաղեցին «Մեծ Հայքում գտնուող նոյն Ալբան քաղաքում» [բնագրում. «предати погребению в том же городе, Альбани, что в Великой Армении»]¹⁵: Այս տարբերակը, որում ծանօթագրում է Ալբան քաղաքը որպէս Բաքու քաղաք, իսկ թաղման վայրի մասին նշող «Մեծ Հայքում գտնուող նոյն Ալբան քաղաքում» նախադասութիւնը չի ծանօթագրում, տպաւորութիւն է ստեղծում, որ ա) առաքեալի մահուն վայրը Կասպից ծովի ափի Բաքու քաղաքում էր, իսկ թաղման վայրը՝ Մեծ Հայքում, բ) Ալբան-Բաքու քաղաքը Կասպից ծովի արեւմտեան ափի հետ միասին գտնուում էր Մեծ Հայքում: Այնուհետեւ սա կրկնուել եւ կրկնուում է բազմաթիւ հրատարակչութիւններում¹⁶: 1910 թ. հրատարակչութիւնը «ուղղում է» այս սխալը՝ Մեծ Հայքում գտնուող Ալբանում» բառերի

14 Հայերէն «Աղբակ» անունը լատիններէն «Ալբան» դարձնելն անպարարութեան արդիւնք է (թէկուզ և «ղ»-ն մինչև 9-րդ դարում հնչիւնափոխուելը «կատկային և» է եղել, (տե՛ս Ա. Աբրահամեան, *Գրարարի ձեռնարկ*, Երեւան, 1976, էջ 9), և «լ» հնչիւնը պարունակող յունահոնուէական անունները հայերէն են տառադարձուել «ղ»-ով):

15 *Жития святых на русском языке, изложенные по руководству Четырёх-Миней св. Димитрия Ростовского* (репринт), Киев: Свято-Успенская Киево-Печерская Лавра, 2004, с. 209.

16 *Память 11 июня. Житие и страдания святого апостола Варфоломея II*

https://lib.pravmir.ru/library/readbook/519#part_18_52; *Святитель Димитрий Ростовский. Жития святых. Июнь. Житие и страдания святого апостола Варфоломея. Память 11 июня*, - http://www.biblioteka3.ru/biblioteka/dimitr_rostov/jun/txt33.html; *Житие и страдания святого апостола Варфоломея*, - <https://predanie.ru/book/216285-zhitija-svvyatyh-lyun/#/toc43>; *Житие и страдания святого апостола Варфоломея. 11 июня по ст.ст. / 24 июня по н.ст. В изложении святителя Димитрия Ростовского*, - <https://idrp.ru/content/article/zhitija-svyatih-lib577/tlg>:

վրայ դրուած թիւ 3833 ծանօթագրութեամբ եւ կեղծիքն ամբողջացնելով:

Առաքեալների գործունէութեան մասին ուսական երկրորդ կարեւոր տեղեկատուն Մակար Բուլգակովի հեղինակած Ռուսական Եկեղեցու պատմութիւնն է: Այս գրքի 1883 թ. հրատարակութիւնում Ս. Բարթոլղիմէոսի մասին ասուած է՝ «Բարթոլղիմէոս առաքեալը հնդիկների մօտ ճամփորդելուց յետոյ, որոնց թողել է Մատթէոսի աւետարանը հրէերէն լեզուով, աւետարանել է Մեծ Հայքում եւ այստեղ Ալբան (Ալբանապոլիս) քաղաքում, որից ողջ շրջանը կոչում էր Ալբանիա, տանջամահ է եղել: Այդպէս է ասում III, IV եւ յետագայ դարերի բոլոր համառօտ պատմութիւններում: Այս առաքեալի գործունէութեան առաւել մանրամասն պատմութիւններից իմանում ենք, որ բազմաթիւ հրաշքներով ուղեկցուող նրա քարոզները մեծ յաջողութիւն են ունեցել Մեծ Հայքում: Բարի լուրի սուրբ աւետողը Քրիստոսի կողմն է բերել Հայաստանի թագաւոր Պոլիմիոսին նրա ողջ ընտանիքի հետ, շատ իշխանների, եւ ժողովրդից անթիւ մարդկանց, մինչեւ կուռքերի քրմերից ներշնչուած թագաւորի կուսապաշտ եղբայր Աստիագի հրամանով խաչուելը»¹⁷: Հեղինակը յղում է իր տեղեկութիւնների աղբիւրները եւ դրանք գլխաւորապէս Բարթոլղիմէոսի Հայաստանեան գործունէութեան աւանդական պատմութիւններն են՝ «Իպոլիտ Պորտացու վկայութիւնը (մօտ 222 թ). «Bartholomaeus, cum Indis praedicasset, eisque conscriptum a Mathaeo Evangelium exposuisset, crucifixus est et ipse, capite deorsum verso, Albani Magnae Armeniae urbe» [Բարթոլղիմէոսը հնդիկներին քարոզելուց եւ Մատթէոսի շարագրած աւետարանի պարզաբանումից յետոյ գլխիվայր խաչուեց Մեծ Հայքի Ալբան քաղաքում] (Max.

Bibl. vet. Patr., III, pag. 265, Lugd.); Դորոթէոսի (307–322 թթ). «Bartholomaeus..., Indis praedicato Evangelio eisque dato Mathaei Evangelio, martyr obiit Carbanopoli Magnae Armeniae urbe» [Հնդիկներին քարոզելուց եւ նրանց Մատթէոսի Աւետարանը թողնելուց յետոյ Բարթոլղիմէոսը տառապալի մահ ստացաւ Մեծ Հայքի Կարբանոպոլիս քաղաքում] (Corpus H. Byz. V, 349); Սոֆրոնիոսի (մահ.՝ 390). «...dormivit Albanopoli, oppido Maioris Armeniae» [Թաղուեց Մեծ Հայքի Ալբանոպոլիս քաղաքում] (Hieronym. I, pag. 171, Francof. (209)); Նիկէտաս Պափլագոնացու (մահ. մօտ 873). «...contigit in quadam urbe maioris Armeniae (Urbanopolin vocant) versari et caet...» [...նրան բաժին ընկաւ գտնուելու Մեծ Հայքի մի քաղաքում (կոչուում էր Ուրբանոպոլիս)] (Max. Bibl. vet. Patr. XXVII, pag. 408); Էկումենիայի (X դար). «...obdormivit in civitate Albano Indicae Magnae Armeniae» [...նշեց Ալբան քաղաքում, հնդկական Մեծ Հայքում] (Oper. Oecum. I, in praefat.).

Մակար Բուլգակովը ենթադրութիւն է անում, որ «Պոլիմիոսը հաւանաբար ոչ թէ ամբողջ Հայաստանի թագաւորն էր, այլ նրա որեւէ մարզի իշխանը, քանի որ այն ժամանակ Հայաստանում այդ անունով թագաւոր չի եղել: Հայկական տեղեկութիւններով էլ Բարթոլղիմէոսը չարչարուել է Հայաստանի Սանատրուկ թագաւորի ժամանակ»:

Դժուար է ասել, թէ Մ. Բուլգակովը ինչ նկատի ունի «այն ժամանակ» ասելով առաքեալների գործունէութեան շրջանն առհասարակ, թէ՛ Բարթոլղիմէոսի կոնկրէտ գործունէութիւնը Մեծ Հայքում: Սովորաբար Մեծ Հայքում Բարթոլղիմէոսի գործելու ժամանակը վերագրուում է առաջին դարի 60-ական թուականներին, եւ ոմանք նոյնիսկ նաւատակութեան կոնկրէտ

17 Митрополит Макарий (Булгаков), Церковь Христова в Закавказье,- История Русской Церк-

ви, Ч. 1: История христианства в России до равноапостольного князя Владимира как введение в историю Русской Церкви, СПб., 1883, Ч. 1, Гл. 4.

Թուական են նշում 71 թիւը: Իրականում առաջին դարի ազդերններից առաքելների գործունէութեան մասին ոչ մի կոնկրէտ թուական մեզ յայտնի չէ: I-II դդ դարերում քրիստոնէական շարժման զարգացումներն այնքան փոքր տեղ էին զբաղեցնում Հռոմէական կայսրութեան հասարակական-քաղաքական կեանքում, որ այդ շրջանի պատմիչները դրանց պարզապէս չէին անդրադառնում: Յետագայում կոլեկտիւ յիշողութիւններից եւ բանաւոր պատմութիւններից հաւաքուած տեքստերը գլխաւորապէս տարածքների եւ այդ ժամանակաշրջանում գործած անձանց անուններ են հաղորդում, որոնց միջոցով մասնագէտները փորձում են վերականգնել ընդհանուր պատկերը: Մեծ Հայքում Սանատրուկ անունով թագաւորի մասին եւս շատ անորոշ տեղեկութիւններ կան: Նրա կառավարման տարիները համարւում են 75-110 թուականները, այսինքն Բարթոլոմէոսի նահատակութեան ենթադրեալ թուականից յետոյ:

Ինչ վերաբերում է «Պոլիմիյ» թագաւորի անունը, որը, ի դէպ, Բարթոլոմէոս առաքելի Մեծ Հայքում աւետարանելու հետ կապուած յաճախ է հանդիպում յունական եւ լատինական տեքստերում, ապա մ. թ. ա. I – մ. թ. I դարերում Մեծ Հայքում կամ դրա մի մասում, ինչպէս նաեւ Փոքր Հայքում տարբեր ժամանակներում թագաւորել են Պոնտոսի Պոլեմոն արքայատոհմի ներկայացուցիչներ: Արտաշիսեան դինաստիայի անկումից յետոյ, Հայաստանում շատ տարբեր թագաւորներ են «նշանակուել» պարթեւական Պարսկաստանի եւ Հռոմէական կայսրութեան կողմից: Պոլեմոնեան արքայատոհմի սկիզբնաւորումը մ. թ. ա. 36 թուականն է, առաջին թագաւոր Պոլեմոնը (յուն.՝ Πολέμων) Փոլիգիայի Լաոդիկէա յունական քաղաքից էր՝ հարուստ հռետոր Զենոնի որդին: Մարկուս

Անտոնիուս նրան կնութեան է տուել իր դստերը եւ թագաւոր կարգել Պոնտոսում: Այնտեղ Պոլեմոն I-ը կառավարել է մ. թ. ա. 36 – 8 թուականներին: Մ. թ. ա. 35 թ. Մարկուս Անտոնիուսը արդէն Պոլեմոնին ենթակայ Պոնտոսին է կցել նաեւ Փոքր Հայքը, որը Պոլեմոնի կողմից կառավարուել է մինչեւ մ. թ. ա. 20 թ.¹⁸: Նրա աւագ որդին, ժառանգած լիցւիով թե՛ հօր, թե՛ պապի անունը, յայտնի էր Մարկուս Անտոնիուս Պոլեմոն Պիթոգորոս անունով եւ Կիլիկիայի Օլբա քաղաքի գլխաւոր քրմապետն էր¹⁹: Օլբա քաղաքը հին քաղաք էր եւ շատ հարուստ տաճարներով:

Մ. թ. 17 թ., երբ Տիրեբրիոս կայսրը արեւելք է ուղարկում իր որդեգիր (եղբորորդի) Գերմանիկոսին, սա գալիս է Արտաշատ եւ հայ աւագանու համաձայնութեամբ Հայաստանի թագաւոր կարգում Պոնտոսի Պոլեմոն թագաւորի կրտսեր որդուն՝ Զենոնին: Հայերը փոխում են Զենոնի՝ Հռոմում որպէս դինաստիական հաստատուած Պոլեմոն անունը հայերի համար դինաստիական Արտաշէս անունամբ²⁰: Զենոն-Արտաշէս-Պոլեմոնը Մեծ Հայքում թագաւորել է 18-34 թթ.: Նրա մահից յետոյ Հայաստանի թագաւորը կարգւում է ոչ թէ Հռոմի, այլ ակտիւացած պարթեւների կողմից: Երկրի թագաւոր է դառնում պարթեւների Արտաւան թագաւորի որդի Արշակը: Մտաւորապէս այդ նոյն ժամանակ՝ 36 թ., Կիլիկիայի Օլբա քաղաքում քրմական իշխանութիւնը կազմալուծւում է: Շուտով 41 թ., Պոնտոսում եւ Կիլիկիայում թագաւոր է դառնում Պոլեմոն II-ը Պոլեմոն I-ի թոռը, նրա դուստր Անտոնի Տրեֆենի եւ Թրակիայի թագաւոր Կոտիս III-ի որդին:

60-ական թթ. հայ-պարթեւական կռիւների աւարտից յետոյ Հռոմն է թագա-

18 Сапрыкин С. Ю., Понтийское царство. Государство греков и варваров в Причерноморье, Москва, «Наука», 1996, с. 307-308, 312.

19 Сапрыкин С. Ю., Понтийское царство, с. 332.

20 Tacit, Annal., II, 56.

ւոր կարգում Հայաստանում: Ներոն կայսրն ուղարկում է Կապադոկիայի աւագանիներին Հռոմում դաստիարակուած Տիգրան VI-ին: Բայց միաժամանակ Պոնտոսի «բաժին է հանում» Հայաստանի արեւմտեան սահմանային Ասիականոսից²¹: Այսպիսով, ի դէմս Պոլեմոն II-ի Պոլեմոնների արքայատոհմի ներկայացուցիչը Հայաստանի մի մասում դառնում է թագաւոր: Սա հէնց Հայաստանում Բարթոլղիմէոս առաքելի քարոզչութեան ենթադրեալ ժամանակն է, եւ նոյնիսկ տարածքով համապատասխանութիւն կայ նրա առաքելական գործունէութեան տարածքի հետ:

Ուշագրաւ է, որ Պոլեմոն II-ը սերտ կապեր էր հաստատել Հրէաստանի հետ: Նա յուզայականութիւն է ընդունել, թլպատուել է եւ 48-54 թթ. ամուսնացած է եղել Հրէաստանի Հերովդէս Ագրիպաս թագաւորի դուստր Բերենիկէի հետ, բայց այդ ամուսնութիւնը լուծարուել է, եւ Բերենիկէն վերադարձել է հայրենիք: Ըստ բանաւոր պատմութիւնների՝ Պոլեմոնը թողել է յուզայականութիւնը, մկրտուել է քրիստոնեայ, ապա կրկին վերադարձել հեթանոսութեան²²: 63-64 թթ. ներոնը լուծարել է Պոնտոսի թագաւորութիւնը եւ միացրել կայսրութեան Գալաթիա պրովինցիային, իսկ Հայաստանը դարձրել է Կայսրութեան ուղղակի վերահսկելի սահմանակից երկիր: Պոլեմոն II-ը մնացել է Կիլիկիայի կառավարիչ մինչեւ իր մահը:

Այսպիսով, Մ. Բուլգակովի հարցադրումը՝ «Պոլեմին հաւանաբար ոչ թէ ամբողջ Հայաստանի թագաւորն էր, այլ նրա որեւէ մարզի իշխանը, քանի որ այն ժամանակ Հայաստանում այդ անունով թագաւոր չի եղել» եւ որ «հայկական տեղեկութիւններով էլ Բարթոլղիմէոսը չարչարուել

է Հայաստանի Սանատրուկ թագաւորի ժամանակ», պատասխան ունի: Թէ՛ Մեծ Հայքում, թէ՛ Փոքր Հայքում առաքելների գործունէութեան շրջանում տարբեր ժամանակահատուածներով եղել են Պոլեմոն արքայատոհմի Պոլիմոն անունով թագաւորներ, եւ ժողովրդական յիշողութիւնը պահել է նրանց մասին հատուածային տեղեկութիւններ: Սակայն հնարաւոր է նաեւ, որ Փոքր Ասիայում միմեանց հարեւան երկրներում լուրեր էին տարածուում տաճարների քրմապետների կողմից քրիստոնեաներին հալածելու, այդ թւում Կիլիկիայի Օլբա քաղաքի զլխաւոր քրմապետ Պոլեմոն Մարկ Անտոնիոսի մասին: Ի դէպ, զրաւոր աղբիւրները ժլատ են, եւ այս Պոլեմոնի մասին մենք դիտենք միայն, որ նա այդպէս էլ չկարողացաւ օգտուել Պոնտոսի թագաւորը լինելու իր օրինական ժառանգական իրաւունքից: Նրա հօր մահից յետոյ Պոնտոսը կառավարում էր նրա մայրը՝ Մարկ Անտոնիոսի դուստրը, եւ նրա համար պէտք է որ բարոյական խնդիրներ յարուցեր իր ընտանեկան ու քաղաքական ենթակայական դիրքը: Նա, հնարաւոր է, խիստ հետեւողական, թերեւս նաեւ դաժան էր իր քրմապետական հնարաւորութիւններն օգտագործելու մէջ: Բաւական է յիշել, որ Կիլիկիայում նրա քրմապետութեան շրջանում Մեծ Հայքի թագաւորը նրա կրտսեր եղբայրն էր, եւ որ նրա փոխարէն մօր մահից յետոյ Պոնտոսում թագաւորել է իր քրոջ որդին՝ Պոլեմոն II-ը, որը Հայաստանի արեւմտեան շրջանները Պոնտոսին կցելուց յետոյ ի վերջոյ դարձաւ նաեւ Մեծ Հայքի մի մասի թագաւորը: Կարելի է ենթադրել, որ նա իր թագաւոր եղբայրներին մղում էր քրիստոնեաների դէմ հալածանքների: Ինչն աւելի հաւանական է Պոլեմոն տոհմի երեք եղբայրներն էլ հալածուում էին քրիստոնէու-

21 Tacit, *Annal.*, XIV. 26.

22 Полемон II,- Еврейская энциклопедия Брокгауза и Ефрона (ЕЭБЕ), т. 12, С. Петербург, 1912; Сапрыкин С. Ю., *Понтийское царство*, с. 337.

Թիւն քարոզողներին, եւ առնուազն կիլիկայում յիշում էին քրմապետ Պոլեմոն Մարկոս Անտոնիոսին, Մեծ Հայքի արեւմուտքում թագաւոր Պոլեմոն II-ին:

Մ. Բուլգակովն այնուհետեւ գրում է առաջին դարում Մեծ Հայքում աւետարանական քարոզչութեամբ զբաղուած երկու Թադէոս առաքեալների մասին, ու վերջում աւելացնում, որ քրիստոնէութիւնը Հայաստանում եւ առհասարակ Այսրկովկասում շատ խեղճ վիճակում էր եւ լրջօրէն տարածուեց միայն 4-րդ դարի սկզբին՝ Տրդատ թագաւորի ժամանակ, Գրիգոր Լուսաւորչի կողմից՝ նրանց ջանքերով տարածուելով նաեւ Ալբանիայում²³:

Այսպիսով, Դմիտրի Ռոստովսկու կազմած ռուսական Յայսմաւուրքը եւ Մակար Բուլգակովի շարադրած «Ռուսական Եկեղեցու պատմութիւնը» ներկայացնում են Բարթոլղիմէոս առաքեալի մասին Ռուս Ուղղափառ Եկեղեցու աւանդութիւնը, որը «Կովկասեան Ալբանիայի», Ալբան-Բաքու քաղաքի հետ որեւէ առնչութիւն չունի. Դ. Ռոստովսկու կազմած Յայսմաւուրքի 2010 թ. հրատարակութեան մէջ լրացուցիչ, անհիմն, աղբիւր չունեցող մտացածին ծանօթագրութիւնը չի փոխում Բարթոլղիմէոս առաքեալի մասին ռուսական 300-ամեայ աւանդականացած պատկերացումը եւ Բարթոլղիմէոսին ալբանա-ադրբեջանական առաքելական քարոզիչ ներկայացնելու ներկայիս Ռուս Ուղղափառ Եկեղեցու մեծ ցանկութեանը վատ է ծառայում: Կեղծ

ծանօթագրութիւններով հնարաւոր չէ բազմիցս հրատարակուած տեքստերն իմաստափոխել: Թէպէտ մեկնարկը տրուած է:

2010 թ. Յունիսի 23-ին Ռուսական Ուղղափառ Հանրագիտարանի «Եկեղեցական-կրօնական կենտրոն» կայքը յօդուած է տեղադրում «Բարթոլղիմէոս առաքեալը Ադրբեջանում» վերնագրով: Յօդուածը տեղեկացնում է, որ «Քրիստոնէութեան տարածումը Ադրբեջանում կապուած է Յիսուս Քրիստոսի 12 աշակերտներից մէկի՝ Բարթոլղիմէոս առաքեալի անուան հետ: Բարթոլղիմէոս առաքեալի կեանքի նկարագրութիւնը ցոյց է տալիս, որ Հնդկական երկրում գործելուց յետոյ նա գնացել է Կովկասեան Ալբանիա (ոչ մի յղում, թէ սա որտեղից է յայտնի, ի՞նչ էր այդ «Կովկասեան Ալբանիան» – Ղ. Խ.), Քրիստոսի Հաւատը քարոզելու, որտեղ էլ տուժել է մ. թ. 71 թ. Ալբանոպոլիս, ներկայիս Բաքու քաղաքում՝ Կասպից ծովի արեւմտեան ափին (կրկին՝ ոչ մի յղում, թէ Կասպից ծովի արեւմտեան ափին ինչ Ալբանոպոլիս քաղաք կամ տեղանուն կար առաջին դարում, – Ղ. Խ.): Կովկասեան Ալբանիայում Քրիստոնէութեան պատմութիւնը իր ծնունդով պարտական է Բարթոլղիմէոս եւ Թադէոս առաքեալներին, ինչպէս նաեւ Թադէոսի աշակերտ Եղիշէին (նաեւ Եղիշայ)²⁴: Եկեղեցական աւանդութիւններից յայտնի է, որ Քրիստոսի 12 աշակերտներից մէկը Բարթոլղիմէոս առաքեալը, Փոքր Ասիայում եւ Հնդկաստանում քարոզելուց յետոյ գնացել

23 Церковь Христова в Великой Армении и Албании, - История Русской Церкви, Ч. 1, Гл. 4.

24 Ըստ երեւոյթի՝ հեղինակի պատկերացմամբ՝ Թադէոսին անվացնելով Բարթոլղիմէոսին՝ «Ադրբեջանը» դառնում է Հայ Առաքելական Եկեղեցու երկու կարեւոր առաքելների «մեծատէրը»: Այստեղ կարեւոր է նկատի ունենալ նաեւ, որ «Թադէոսի աշակերտ Եղիշէի» մասին առասպելը ծնունդ է միայն 7-րդ դարում՝ որոշակի քաղաքական իրավիճակի թելադրանքով (տե՛ս (Խառատեան) Առաքելեան Հ., Եղիշէ առաքելի պաշ-

տամունքն ուղիների մէջ եւ Ուտի գաւառի տեղադրութեան հարցի շուրջ,- Լրաբեր հասարակական գիտութիւնների (Երեւան), 1991, № 6, էջ 69-86); АКОПЯН А. А., Албания-Алуанк в греко-латинских и древнеармянских источниках, Ер., 1987, с. 183-184; Յակոբեան Ա., «Վաչագանի վէպ»-ը եւ Արշակունեաց թագաւորութեան խնդիրը Դ.-Ջ. դարերի Աղոսանքում, – Համդէս ամսօրեայ», ԾԺԷ տարի, Վիեննա-Եր., 2003, ս. 71-74:

է Կովկասեան Ալբանիա (տե՛ս Դմ. Ռոստովսկու «Արբերի վարքը»): Այստեղ նրա քարոզչութիւնը որոշ յաջողութիւն է ունեցել, շատերը, տեսնելով առաքեալի հրաշագործութիւնները, հաւատացել են Քրիստոսին, բայց միաժամանակ նրան լրջօրէն դիմադրել են բազմաթիւ մոզ քրմերը եւ նրանց օժանդակող Աստիագը՝ իշխանաւորի եղբայրը (ոչ մի խօսք՝ ի՞նչ իշխանաւոր, որ տեղի՞ իշխող – Հ. Խ.): Չնայած առաքեալը բուժել է այն երկրի (ո՞ր երկրի – Հ. Խ.) իշխողներին մէկի դատերը եւ նրա ընտանիքը մկրտուել է, քրմերի կողմից ուղղորդուող Աստիագը յարմար պահ է գտել, բռնել է սուրբ Բարթողիմէոսին եւ բերել Ալբանիայի հին կրօնական կենտրոն՝ Բարուկ (՞ – Հ. Խ.) Ալբանոպոլիս, այսինքն՝ Ալբանիայի Բաքու քաղաք, քրմերի քաղաք: Այնտեղ, զրազաշտական դախմայի ստորոտում Արտայի տաճարի աստիճաններին գլխիվայր կախել են: Խոշտանգողները խաչուածին մաշկահան են արել, որից յետոյ Առաքեալը լռել է: Անհաւատները վերջում գլխատել են սուրբ Բարթողիմէոսին եւ որոշ ժամանակ մարմինը թողել խաչի վրայ կախուած»²⁵: Այս անյաջող յօդուածի հեղինակի միակ յղումը Դմ. Ռոստովսկու ծանօթագրութեամբ արդէն կեղծած «Արբերի վարք»-ի վրայ է, չնայած այդ գրքում ոչ մի խօսք չկայ որեւէ Ալբանիայի մասին: Այս յօդուածում առհասարակ «Մեծ Հայք» անունն անգամ չկայ: Փոխարէնը, ըստ այս յօդուածի անյայտ «Կովկասեան Ալբանիայում» քարոզում էին ոչ միայն Բարթողիմէոսը, այլ նաեւ առաքեալներ Թադէոսը եւ Եղիշէն Էղիշէն:

25 *Апостол Варфоломей в Азербайджане*, - Седмица.RU, Церковно-Научных центр «Православная энциклопедия» (<https://www.sedmitza.ru/text/1263194.html>)

26 **Юсифов Ю.Б.**, К значению древних топонимов в изучении этнической истории Азербайджана, «Известия» АН Азерб. ССР, Серия: История, философия и право (Баку), 1987, № 2, с. 101-109.

առայած չեն հետաքրքրել, եւ նա Բարթողիմէոսին բարեյաջող նահատակել է Հնարովի «Բարուկ Ալբանոպոլիս, այսինքն՝ Ալբանիայի Բաքու քաղաք»-ում:

Այս տեքստում օգտագործուած է տեղանունների օգտագործման եւ մեկնաբանութիւնների վերաբերեալ ազդեցիկ անակաւ անպարարութիւնների (մանուկուլացիա) շղթան, որը ներկայացնում է Ազրբեջանի պատմութեան ինստիտուտի նախկին տնօրէն Իգրար Ալիեւը 1989 թ.: Առիթը տարբեր է, բայց սկզբունքը նոյնն է: Ի. Ալիեւը գրում է Յու. Յուսիֆովի «Հնագոյն տեղանունների նշանակութիւնը Ազրբեջանի էթնիկական պատմութեան ուսումնասիրման գործում»²⁶ յօդուածի մասին, որում տեղանուններով թուրքական է դարձուած Ազրբեջանի հանրապետութեան էթնիկական անցեալը՝ «նախաազրբեջանցիներին», իսկ լեզուն՝ «նախաթուրքական»: Ի. Ալիեւը 1989 թ. գրում է, որ տեղանունների ազատ, անպարարական, առանց որեւէ գիտական սկզբունքի, օրինաչափութեան մեկնաբանութիւնը Ազրբեջանում հին արմատներ ունի, որ «Ազրբեջանի էթնիկական պատմութիւնը աւանդաբար ջանացել են լուծել տեղանունների միջոցով, ընդ որում դա սովորաբար անում են տարբեր լեզուներում միմեանց նման հնչող բառերի միջոցով»²⁷,... [վերլուծաբանների] փնտրտուքը սահմանափակում է տարբեր լեզուների բառերի նմանութեամբ»²⁸ եւն: Ի. Ալիեւը բերում է այս սկզբունքն օգտագործող տարբեր հեղինակների բազմաթիւ օրինակներ: Անկասկած այստեղ գործ ունենք տեղանունների մեկնաբանութեան ազրբեջանական այդ

27 **Иггар Алиев**, Несколько слов по поводу так называемых «протоазербайджанцев» и «протоазербайджанского языка» в древнем Азербайджане, «Известия» АН Азерб. ССР, Серия: История, философия и право (Баку), 1989, № 3, с. 9.

28 **Юсифов Ю.Б.**, К значению древних топонимов, с. 100.

աւանդոյթի հետ, բայց կրկնակի ածպարարութեամբ: Նախ Մեծ Հայքի Վասպուրական նահանգի Աղբակ գաւառի անունը ներկայիս Ազրբեջան «տեղափոխելու» աղբիւրներին մեղադրելով «Մեծ Հայքում տեղադրելու մէջ», երկրորդ Ալբան անունը Բաբու քաղաքի հետ նոյնականացնելու: Առանձին հարց է «Կովկասեան Ալբանիա» անունը: «Կովկասեան Ալբանիա» անունով պետութիւն եւ նոյնիսկ տարածք չկար, կար հարաւային Կովկասում Կասպից ծովից արեւմուտք գտնուող մի պետութիւն, որին յունա-հռոմէական հեղինակները Ալբանիա էին անուանում, եւ որի մասին գրելիս ժամանակակից հեղինակները աւելացնում են «կովկասեան» բառը ընթերցողներին Եւրոպայի Ալբանիայի հետ չչփոթեցնելու համար: Բաց հարց է մնում, թէ ինչո՞ւ է Ռուս Ուղղափառ եկեղեցու «ուղղափառ Հանրագիտարանը» առաջին դարի համար օգտագործում «Կովկասեան Ալբանիա» անունը եւ տեղանունների օգտագործման աղբիւրներին ածպարարական սկզբունքը:

2013 թ. «Благовест» հրատարակչութեամբ (հիմնադրուել է 1990 թ. եւ տպագրում է կրօնական բնոյթի գրքեր) լոյս է տեսնում Ա. Ա. Մարկովայի կազմած «Սուրբ առաքեալները» անունով գիրքը²⁹. Բարթոլոմէոս առաքեալն այստեղ ներկայացուած է մի քանի բաժիններով Բարթոլոմէոսը Երուսաղէմում, Փիլիպոս առաքեալի եւ նրա քոյր Մարիամնայի հետ քարոզչական գործունէութիւնը Փոքր Ասիայում, Փիլիպոսի նահատակութիւնից յետոյ Բարթոլոմէոսի քարոզչական գործունէութիւնը «Հնդկաստանից մինչեւ Մեծ

Հայք», առաքեալի նահատակութիւնը, մասունքների ճակատագիրը եւ պաշտամունքը, պատկերագրութիւնը:

Անդրադառնանք «Հնդկաստանից մինչեւ Մեծ Հայք» բաժնին. «Բարթոլոմէոս առաքեալը միսիոներական ճամփորդութիւն է անում Սեւ ծովի ափով: Եւ վերջապէս ուղեւորում է անտարանելու Մեծ Հայք եւ Կովկասեան Ալբանիա... Հին Կովկասեան Ալբանիան ներկայիս Ազրբեջանի տարածքն ընդգրկող պետութիւն էր»³⁰: Այս հեղինակը նոյնպէս, հաւանաբար, չգիտի, որ առաջին դարում «Կովկասեան Ալբանիա» անունով պետութիւն չկար, չկար նաեւ «Հին Կովկասեան Ալբանիա պետութիւն», ինչպէս չկայ «նոր Կովկասեան Ալբանիա» եւ, ինչպէս երեւում է, չգիտի նաեւ, որ «Հին Կովկասեան Ալբանիան» ժամանակակից Ազրբեջանի տարածքն են համարում միայն որոշ ժամանակակից Ռեզիւսակները, որոնք յայտնի են, մեղմ ասած, պատմական աղբիւրների խիստ ընտրողական օգտագործմամբ եւ առանձնայատուկ մեկնաբանութեամբ, այլապէս առնուազն կը գրէր. «ըստ որոշ հեղինակների»: Այս հեղինակին պէտք է յիշեցնել, որ «Հին Կովկասեան Ալբանիա» արտայայտութիւնն օգտագործել է հետազօտող Ալ. Եանովսկին 1846 թ. հրատարակուած մի աշխատանքում, ընդ որում հիմնաւորել է «Հին» բառի իմաստը. նա փորձել է ներկայացնել Ալբանիա պետութեան միայն անտիկ շրջանի յունա-հռոմէական տեղեկութիւններով ծածկուող հնագոյն շրջանը³¹: Ա. Եանովսկին, ի հարկէ, ոչինչ չի գրում այդ Ալբանիայում քրիստոնէական առաքեալների գործունէութեան մասին, քանի որ այդ մասին ոչինչ չեն գրել այդ շրջանի հեղինակները: Ծիշտ այնպէս, ինչպէս նրանք չեն

29 Маркова А. А. (сост.), *Святые апостолы*, М.: Благовест, 2013.

30 Апостол Варфоломей, *Проповедь от Индии до Великой Армении*, - Маркова А. А. (сост.), *Святые апостолы*, М.: Благовест, 2013.

31 Яновский А., *О древней кавказской Албании*, - «Журнал Министерства народного просвещения», 1846, т. 52, ч. 2, с. 97-136, 161-203.

գրել Բաքու, Դերբենդ, Շամախի, Շաքի եւ այլ քաղաքների մասին այն պարզ պատճառով, որ դրանք անհասկանալի «Հին Ալբանիայում» պարզապէս գոյութիւն չեն ունեցել: «Ալբանիան» ինքնին միայն Հին անուն է, աւելի «Հին Ալբանիա» պարզապէս չկայ: Եանովսկին յիշեցնում է, որ ըստ Ստրաբոնի՝ ալբանները ոչ ծովը, ոչ ծովափը չէին օգտագործում: Նա գտնում է, որ նոյնիսկ V դարում Դերբենդից եւ X դարի Բաքուից բացի Ալբանիայի տարածքում Կուր գետից մինչեւ Թերէք գետ ծովափնեայ որեւէ բնակավայր չի եղել ընդհուպ մինչեւ XIX դար, որտեղ գոնէ որեւէ նաւահանգիստ լինէր³²:

Չնայած Ա. Ա. Մարկովայի աշխատանքում այս մասի ենթավերնագիրը Բարթոլդիմէոսի քարոզչութիւնը «Հնդկաստանից Մեծ Հայք» է, հեղինակը Մեծ Հայքից յիշում է միայն Մ. Բուլգակովի պատմութիւնը Բարթոլդիմէոսի կողմից Պոլիմիոս թագաւորի դստեր բժշկութեան մասին, մէկ տողով ասում է, որ Գողթնում նա Կոմսի անունով մէկին եպիսկոպոս է ձեռնադրել, որից յետոյ «անցել է Կովկասեան Ալբանիայի խորքերը»: Ըստ հեղինակի՝ «Որոշ հետազօտողների կարծիքով՝ Բարթոլդիմէոս առաքելի նպատակը հեռու Կովկասեան Ալբանիան էր, քանի որ անցեալում Հնդկաստանի եւ Կովկասեան Ալբանիայի միջեւ հաստատուած էին կրօնական եւ առեւտրական մերձաւորագոյն կապեր, որոնք պայմանաւորուած էին այդ երկրներում զրադաշտական կրօնի տարածումով» (փաստացի պատճէնում է աստուածաբանութեան թեկնածուի ատենախօսութիւնից – Ն. Խ.): Նա բացատրում է, որ զրադաշտականութեան գլխաւոր աստուածութեան՝ Ահուրա-Մազդայի պաշտամունքն արտայայտուած էր նախ եւ առաջ կրակի պաշտամունքով, այդ

պատճառով զրադաշտականներին կրակապաշտներ էին անուանում: Կովկասեան Ալբանիայում զրադաշտական պաշտամունքի բազմաթիւ տաճարներ կային, ստեղծագործում է Մարկովան: Քարաւանային ճանապարհները Հնդկաստանից, Իրանից եւ Հայաստանից հէնց այդ տաճարներն էին գնում» (!!! Սա էլ տարօրինակ է, քանի որ այդպիսի տաճարների մասին ոչ մի «Հին հեղինակ» ոչինչ չի գրել – Ն. Խ.): Մարկովան հաւանաբար չգիտի, որ «Կովկասեան Ալբանիայում» առաջին դարում, ըստ Ստրաբոնի, պաշտում էին Հելիոսին, Զեւսին եւ Սելենային, այլ կերպ ասած՝ Արեւի, Երկնքի եւ Լուսնի աստուածներին կամ հէնց Արեւը, Երկնքը եւ Լուսինը, յատկապէս՝ Լուսինը, ինչպէս նաեւ, անշուշտ, ողջ տարածաշրջանի ժողովուրդների նման՝ Հողի, բերքի, կենդանիների, մայրութեան Հովանաւոր աստուածութիւններին, որոնց պաշտամունքը սպասարկում էին տեղական քրմերը³³: Հեղինակն աղբիւր չի յղում նաեւ, թէ որտեղից է իրեն յայտնի, որ «Հնդկաստանից, Իրանից եւ Հայաստանից» գնում էին Ալբանիայի կրակապաշտական տաճարները, ովքեր էին գնում առեւտրականներ, մոգեր, սովորական հաւատացեալներ, եւ ինչո՞ւ էին գնում: Ըստ անտիկ հեղինակների՝ Ալբանիայում ոչ առեւտուր կար, ոչ արտադրութիւն, նոյնիսկ թուաբանական պարզ հաշուարկ չգիտէին, ինչը յատուկ ընդգծել է Ստրաբոնը: Իսկ այդ ժամանակաշրջանի կրօնական արարողութիւնների միակ կենտրոնը, որի մասին յայտնի է, գտնուում էր Վրաստանի մօտերքը. դա մայրաքաղաք Կապադակ/Կաբալայից էլ արեւմուտք էր, որը բնականաբար որեւէ առնչութիւն չունէր ծովափի հետ, եւ որը յետագայում դարձաւ քրիստոնեայ Ալբանիայի առաջին կրօնական կենտրոնը՝ շարունակելով «քրմերի շրջանի դերը»:

32 Яновский А., О древней кавказской Албании, с. 132.

33 Тревер К. В., Очерки по истории и культуре Кавказской Албании, IV до н.э. – VII в. н.э., Москва-Ленинград, 1959, с. 150-156.

Ակնյայտորէն՝ որեւէ տեղեկութիւն չկայ այնտեղ գնացող «բազմաթիւ ուխտաւորների» մասին: Այնտեղ գնալը նոյնիսկ վտանգաւոր էր, քանի որ մարդկային գոհաբերութիւններ էին անում:

Անյայտ է, ի հարկէ, թէ որտեղի՞ց է Ա. Մարկովային յայտնի, օրինակ, որ «Բարթոլղիմէոսի նպատակը Հէնց Կովկասեան Ալբանիան էր»: Շրջանցելով Մեծ Հայքում Բարթոլղիմէոսի գործունէութեան մասին առատագոյն աղբիւրները, տեղեկութիւնները եւ վերլուծութիւնները, Մարկովան արագ ուրուագծում է Մեծ Հայքում Բարթոլղիմէոսի «հրաշքներն» ու անմիջապէս անցնում տեղեկատուական եւ վերլուծական նիւթեր չունեցող «Կովկասեան Ալբանիային».

«...Բարթոլղիմէոս առաքեալի քարոզչութիւնը եւ դրա հետեւորդները աննկատ չմնացին: Կովկասեան Ալբանիայի տարածքում Բարթոլղիմէոսի քարոզչութիւնն սկսելուն արագօրէն յաջորդեց նրան բռնելու Սանատրուկ թագաւորի հրամանը, ինչն արեց Պոլիմիայի ազգական Աստիագը»: Տարաբախտ Ա. Մարկովան, ըստ երեւոյթին, այնքան է դժուարացել Բարթոլղիմէոսի գործունէութիւնը «Կովկասեան Ալբանիայում» եւ յատկապէս Բաքում «տեղաւորելու» գործում, որ չի նկատել, թէ ո՞վ է Սանատրուկը, ո՞վ է Աստիագը, ո՞վ է Պոլիմիան, որտե՞ղ նրանք «նկատեցին Բարթոլղիմէոսի գործունէութիւնն Ալբանիայում» եւ առհասարակ ի՞նչ կապ ունէին նրանք Ալբանիայի հետ: Մի տեղ Սանատրուկը անյայտ երկրի թագաւոր է, Աստիագը Պոլիմիայի ազգականը, Պոլիմիան ինքը իշխան Մեծ Հայքում, որին, պարզւում է նաեւ կանացի անունով Ոգուհի են կոչում: Մէկ այլ նախադասութիւնում Աստիագն ինքն է անյայտ երկրի թագաւոր, եւ Բարթոլղիմէոսի վարքը ներկայացնող աղբիւրում Սանատրուկ թագաւորն ինքը Հէնց Աստիագն է: Այս բոլոր անուանները Բարթոլղիմէոսի գործունէութիւնը ներկայացնող Հայկական աղբիւրներում առկայ են, բայց դրանք

Մեծ Հայքում գործող կերպարներ են, եւ նրանց վերագրուող դերերը տարբեր են Մարկովայի պատկերացրածներից: Մարկովան ջանացել է նրանց «տեղաւորել» «Կովկասեան Ալբանիայում» եւ, ի հարկէ, խճճուել է: Ի վերջոյ նա մի կերպ հասնում է Բարթոլղիմէոսի նահատակութեան իրեն ցանկալի կամ իրեն առաջարկուած հանգրուանին՝ «առաքեալը տարուեց Ալբան(Ալբանոպոլիս) քաղաք՝ Աերկայիս Բաքու քաղաքի տարածքում: Այդ ժամանակաշրջանում Ալբանոպոլը Ալբանիայի կրօնական կենտրոնն էր, քրմերով-մոզերով բնակեցուած պաշտամունքային քաղաքը: Հրաշագործին եւ քարոզչին պատժելու համար քրմերը նրան բերեցին իրենց կրօնական կենտրոն, որտեղ հեթանոսական տաճարի սուրբ կրակի աստիճաններին գլխիվայր խաչեցին սուրբ տառապեալին, ողջ-ողջ մորթագերծեցին եւ գլխատեցին: Դա տեղի ունեցաւ Քրիստոսի Մննդեան 71-րդ տարում: Հաւատացեալները նրա աճիւնը դրեցին թիթեղեայ տուփում եւ թաղեցին»:

Մարկովան այնուհետեւ անցնում է առաքեալի մասունքների ճակատագրին եւ Բարթոլղիմէոսի պաշտամունքի յետագայ դրսեւորումներին: Պարզւում է, որ քրիստոնէութեան պաշտօնականացումից յետոյ Բարթոլղիմէոսի պաշտամունքը տարածուել է գլխաւորապէս Բիւզանդիայում մի անհատի՝ Յովսէփի (Իոսիֆ) վարդապետի մօտ առաքեալի մասունքների մի մասի յայտնուելու պատճառով եւ Յովսէփի ջանքերով: Նա, յամենայն դէպս, աւելացնում է, որ «Բարթոլղիմէոս առաքեալը պաշտուում է յատկապէս Հայ Առաքելական Եկեղեցու կողմից, որն իր առաքելական ժառանգորդումը հիմնել է Հայաստանի տարածքում 12 առաքելներից ա յս առաքեալի գործունէութեան վրայ»: «Կովկասեան Ալբանիայում»՝ «ներկայիս Ադրբեջանում», նրա մասունքների պաշտամունքի հետքեր կարծէք թէ Մարկովային յայտնի չեն:

Մինչդեռ Հենց այս «ժամանակակից Ազրբեջանում» նա կարող էր դրանք գտնել, միայն թէ դրանք Բաքուում չէին, այլ Կուր գետի աջ ափում գտնուող հայաբնակ մասում էին՝ պատմական Մեծ Հայքի Ուտիք եւ Արցախ նահանգների տարածքում: Ուշագրաւ է, որ ոչ մի յօդուածագիր որեւէ տեղեկութիւն չի տալիս Բաքուում նահատակուած Բարթողղիմէոսի թաղման վայրի մասին, այդ թւում՝ Ալբանիայի պաշտօնական քրիստոնէացումից յետոյ:

Առայժմ չանդրադառնալով հայկական աղբիւրներին՝ այստեղ նշենք, որ Բարթողղիմէոսի նահատակութեան վայրի մասին քրիստոնէական աւանդոյթի տարբերակները բոլորովին վերջերս քննարկուել է D. P. Curtin, Agnes Smith Lewis, Alexander Walker, *The Martyrdom of St. Bartholomew: Greek, Arabic, and Armenian versions*. Dalcassian Press, 2014 (44 pp.), աշխատանքում: Աշխատանքի նիւթերի աղբիւրներում բնականաբար ոչ մի Կովկասեան Ալբանիա կամ Բաքու չեն յիշատակուում, բայց հեղինակները մատնանշում են, որ «այս առաքելի կեանքի, գործունէութեան եւ նահատակութեան առասպելները բազմազան են: Բոլոր պատմութիւններում Հայաստանը յիշատակում է որպէս նրա նահատակութեան տարածք եւ [Բարթողղիմէոսը] որպէս այդ երկրում եկեղեցու հիմնադիր: Այնուամենայնիւ նրա գործունէութեան մէջ դեռ նշանակալի գաղտնիքներ կան: Այս տեքստը նրա կեանքի մասին ներառում է տարբեր ժամանակաշրջանների եւ մշակոյթների երեք տարբեր պատմութիւն: Յունական պատմութիւնը մանրամասներ քիչ ունի եւ հաւանաբար կազմուել է VI դարում Հիւսիսային Միջագետքում նեստորական հեղինակի կողմից: Արաբական պատմութիւնը հաւանաբար թուագրուում է VII կամ VIII դարերով, եւ նոյնպէս համառօտ է: Հայկական պատմութիւնը առաւել ամբողջականն ու մանրամասն է, եւ այստեղ անգլերէն լեզուով հրատարակուում

է առաջին անգամ, առանց կրճատումների»: Չնայած աշխատանքը հրատարակուել է 2014 թ., երբ արդէն այս կամ այն չափով տարածուել էր Բարթողղիմէոսի նահատակութեան վայրի մասին մասին Ռուս Ուղղափառ Եկեղեցու նախաձեռնած «նոր պատմութիւնը», դրան անդրադարձ չկայ:

Ինչպէս տեսնում ենք, Ռուս Ուղղափառ Եկեղեցին նոր աւանդապատումի/առասպելի յայտ է ներկայացրել Բարթողղիմէոս առաքելի գործունէութեան եւ նահատակութեան վայրի մասին, ընդ որում խեղաթիւրելով նաեւ այս առաքելի վերաբերեալ Ռուս Ուղղափառ Եկեղեցու 300 տարի առաջ ձեւաւորուած աւանդոյթը: Այս միանգամայն նորահնար առասպելը լայնօրէն տիրաժաւորուել է եւ շարունակուում է տիրաժաւորուել Ռուս Ուղղափառ Եկեղեցու Հանրագիտարանների եւ թեմերի ելեկտրոնային կայքերում ու այսպէս կոչուած գիտաժողովներում եւ գլխաւորապէս յղուում է «գիտական» յաւակնութիւններով որոշ ազրբեջանական գրքերում:

Ռուսական այս նոր առասպելաշինութիւնը, ճիշտ է խիստ ժամանակակից, այնուամենայնիւ արդէն փոքրիկ գործնական նախապատմութիւն ունի: 2001 թ. մի տեղեկութեան համաձայն՝ 2001 թ. Մայիսի 26-ին Մոսկուայի եւ Համայն Ռուսիայի պատրիարք Ալեքսի II-ը գնացել է Բաքու եւ «Հաղորդակցուել» Սուրբ Բարթողղիմէոսի Բաքուի եկեղեցում «պահուող» մասունքների հետ: «Մոսկուայի եւ ողջ Ռուսիայի սուրբ Պատրիարք Ալեքսի II-ը ի պատիւ Սուրբ Աստուածածնի Ծննդեան, 2001 թ. Մայիսի 26-ին Բաքում խոնարհուում է Բարթողղիմէոս առաքելի մասունքներին»³³:

Սա մի փոքր տարօրինակ է, քանի որ, ըստ այլ տեղեկութիւնների, Կոստանդնուպոլսի պատրիարք Բարթողղիմէոսը միայն 2003 թ. Ապրիլի 16-ին է Բաքուի «սուրբ Իւղաբեր կանանց» [Святых Жен-

Мироносиц]»³⁴ տաճարին նուիրել Բարթոլոմէոս առաքեալի մասունքներով տուփը³⁵: Այդ արարողութիւնը, ի հարկէ, կրկին հռչակագրել է, որ Բաքուն Բարթոլոմէոս առաքեալի նահատակութեան վայրն է: Բայց յայտարարուել է նաեւ, որ Բարթոլոմէոսը միաժամանակ Ազրբեջանի ուղղափառների հովանաւորն է. «Բաքու. Ինչպէս հաղորդում է ԻՏԱՌ-ՏԱՍՍ-ը, Կոստանդնուպոլսի պատրիարք Վարֆոլոմեյը Ապրիլի 16-ին Բաքուի եւ Մերձկասպեան [տարածքի] եպիսկոպոս Ալեքսանդրին փոխանցել է Սուրբ առաքեալ Բարթոլոմէոսի մասունքների մի մաս: Դա Ազրբեջանի ուղղափառ եպիսկոպոսութեան համար յատուկ սրբութիւն է, [քանի որ] այդ եպիսկոպոսութիւնն իր հովանաւորն է համարում Սուրբ Բարթոլոմէոսին, ով երկու հազար տարի առաջ իր տառապալի վախճանն է գտել ժամանակակից Բաքու քաղաքի տարածքում» [հաղորդման բնագիրը. БАКУ. Как передает ИТАР-ТАСС, Патриарх Константинопольский Варфоломей передал 16 апреля епископу Бакинскому и Прикаспийскому Александру часть мощей святого апостола Варфоломея. Это особая святыня для православной епархии Азербайджана, которая считает своим покровителем святого Варфоломея, принявшего две тысячи лет назад мученическую кончину на территории современного Баку]: Ուրեմն Բարթոլոմէոսի ի՞նչ մասունքների հետ է հաղորդակցուել Ալեքսի II-ը 2001 թուականին Բաքուում, եթէ այնտեղ դրանք յայտնուել են միայն 2003 թ.:

Բարթոլոմէոսի մասունքները 2003 թ. Բաքու բերելու մասին տեղեկութիւնը

ուղեկցուել է լրացուցիչ «բացատրութեամբ». «Բարթոլոմէոս առաքեալի վախճանի եւ թաղման վայրի՝ Ալբանա, Ալբանոպոլիս, Ուրբանոպոլիս, հետ կապուած տարածայնութիւններ կան: Աւանդաբար այդ քաղաքը նոյնականացում է Աերկայիս Բաքու քաղաքի տարածքում եղած քաղաքի հետ [բնականաբար, այս բացակայող «աւանդաբար»-ին որեւէ յղում կամ յիշատակութիւն չկայ - Ն. Խ.]: Ազրբեջանցի հնագէտները Բաքուի «կոյսի աշտարակի» մօտ պեղելիս յայտնաբերել են հին տաճարի մնացորդներ, որը նոյնականացուել է առաքեալի նահատակութեան վայրում կառուցուած բազիլիկի հետ [!!! - Ն. Խ.]: 2003 թ. Կոստանդնուպոլսի պատրիարք Վարֆոլոմեյը Բաքուում այցելել է առաքեալի թաղման ենթադրեալ վայր: Այլ վարկածով Բարթոլոմէոս առաքեալը թաղուել է Արեւմտեան Ազրբեջան նահանգում (այժմ Իրան), որտեղ 14-րդ դարում կառուցուած է եղել Սուրբ Բարթոլոմէոսի վանքը»³⁶: Այս մի փոքրիկ պարբերութիւնում մի շարք կեղծիքներ կան: Նախ՝ ի՞նչ է նշանակում «Արեւմտեան Ազրբեջան (այժմ Իրան)»: Իրանը Արեւմտեան Ազրբեջան է: Երկրորդ պատմական Ատրպատականում ներկայիս Իրանի հիւսիսում գտնուող Բարթոլոմէոսին նուիրուած վանք չկայ: Կայ Թաւրիզ քաղաքում գտնուող Բարթոլոմէոսի անուան եկեղեցի: Հայերի կողմից Սուրբ Բարթոլոմէոսի վանքը կառուցուել է XIII դարում՝ Մեծ Հայքի Աղբակ գաւառում, որը հայկական աւանդոյթով, ինչի մասին կը խօսուի ստորեւ, առաքեալի նահատակութեան վայրն է, եւ որն այժմ Թուրքիայի տարածքում է: Եւ վերջապէս՝ ռուսական

34 Քրիստոսի յարութեան յաջորդ օրուայ առաւօտեան մեղոնով Քրիստոսի մարմնի ծիսական օձման համար թաղման վայրը գնացած կանայք:
 35 Константинопольский Патриарх передал православным Азербайджана часть мощей св. апостола Варфоломея,- Седмица.RU, Церковно-научный центр «Православная Энциклопедия»

(<https://www.sedmitza.ru/text/283547.html>) (այցելութիւնը կայք՝ 01.08.2014)
 36 Варфоломей, Апостол,- <https://drevo-info.ru/articles/6107.html> (վերջին այցելութիւնը կայք՝ 28.05.2025).

կայքը, տեղեկութեան «պաշտամունք» (Почитание) բաժնում անփութորէն չնկատելով այդ վանքի անունը գրել է այնպէս, ինչպէս իրականում կայ՝ հայերէն լեզուով ուսուցիչի տառերով՝ «Сурб Варфоломеос» (Սուրբ Բարթոլոմէոս), ոչ թէ ուսուցիչի՝ «свѣтой Варфоломей»: Կամ՝ անունը «պատճենել է» հայկական կայքերից:

Այժմ Ռուս Ուղղափառ Եկեղեցու բոլոր թեմերի կայքերը մրցակցում են Բարթոլոմէոս առաքելին «Բաքում տեղափոխուելու» ջանքերում: Մոսկուայի պատրիարքութեան պաշտօնական կայք «...հեթանոս քրմերի մեքենայութիւնների հետեւանքով թագաւորի եղբայր Աստիագը բռնեց Առաքելին Ալբան քաղաքում (այժմ Բաքու քաղաքը) եւ կախեց գլխի վայր» [«...По проискам языческих жрецов, брат царя Астиаг схватил Апостола в городе Альбане (ныне город Баку) и распял вниз головой»³⁷]: Այստեղ արդէն «Ալբան, ներկայիս Բաքու քաղաքը» առանց որեւէ տարակուսանքի, վարկածի, մեկնաբանութիւնների, ծանօթագրութիւնների, «աւելորդ» լրացուցիչ բացատրութիւնների «Բաքու» քաղաքն է եւ Բարթոլոմէոսի նահատակութեան վայրը: Մի քանի օրինակ եւս. «հեթանոս քրմերի մեքենայութիւններով թագաւորի Աստիագ անունով եղբայրը Ալբան քաղաքում (այժմ Բաքու քաղաքը) բռնեց առաքելին եւ գլխի վայր խաչեց: ... Աստիագի հրամանով Առաքելին մորթագերծեցին եւ գլխատեցին. Հաւատացեալները նրա մնացորդները դրեցին տուփի մէջ եւ թաղեցին» [բնագրում. «По проискам языческих

жрецов, брат царя Астиаг схватил Апостола в городе Альбане (ныне город Баку) и распял вниз головой. ... по приказу Астиага, содрали с Апостола кожу и отсекли глав. Верующие положили его останки в оловянную раку и погребли»³⁸]: «Ալբան քաղաքում (այժմ Բաքու) սուրբ Բարթոլոմէոսին հեթանոս քրմերի մեքենայութիւնների հետեւանքով բռնել են եւ գլխի վայր խաչել. Բայց առաքելը շարունակում էր քարոզել Աստծոյ Խօսքը, եւ նրա մաշկը քերթեցին ու գլուխը հատեցին» [բնագրում՝ «В городе Альбане (ныне – Баку) свя того Варфоломея схватили по проискам языческих жрецов и распяли вниз головой. Однако апостол продолжал проповедовать Слово Божие и тогда с него содрали кожу и отсекли голову»]³⁹: Ռուս Ուղղափառ Եկեղեցու Մինսկի թեմի կայքը տեղեկացնում է. «առաքելին բռնել են Ալբան (այժմ՝ Բաքու, Ադրբեջանի մայրաքաղաքը) քաղաքում եւ գլխի վայր խաչել» [բնագրում. «Апостол был схвачен в городе Альбане (ныне Баку, столица Азербайджана) и распят вниз головой»]⁴⁰; 2024 թ. Յունիսի 24-ին «ուղղափառութիւնը Թաթարստանում» [«Православие в Татарстане»] կայքի խմբագրութիւնը տեղեկացնում է, որ Քրիստոսի 12 առաքելներից Բարթոլոմէոսը Փիլիպոս առաքելի հետ գնացին քարոզելու Միրիայում եւ Փոքր Ասիայում: Հիերոպոլիսում [հրաշքներ] գործեցին, [բայց] տեղի դատարանի որոշմամբ Փիլիպոս եւ Բարթոլոմէոս առաքելներին խաչ հանեցին: Սարսափելի երկրաշարժ սկսուեց, եւ գետինը կլանեց քաղաքի կառավարչին, քրմերին

37 Святой апостол Варфоломей,- <http://www.patriarchia.ru/db/text/910795.html> (վերջին այցելութիւնը կայք՝ 28.05.2025).
 38 Святые апостолы Нафанаил, Лука и Климент // https://www.crkvenikalendar.com/zitije_ru.php?pok=0&id=VABAVG (վերջին այցելութիւնը կայք՝ 28.05.2025).

39 Сегодня, 24 июня, Церковь вспоминает святого апостола Варфоломея. 1 мин., 24.06.2024 // <https://foma.ru/cerkov-vspominaet-svjatogo-apostola-varfolomeja.html> (վերջին այցելութիւնը կայք՝ 28.05.2025):
 40 Апостол из 12-и Варфоломей (Нафанаил),- <https://obitel-minsk.ru/svyatye/06/24/apostol-varfolomej> (վերջին այցելութիւնը կայք՝ 28.05.2025):

ու բազմաթիւ մարդկանց: Փիլիպոսը մահացաւ, իսկ Բարթոլղիմէոսը կենդանի մնաց. Աստծոյ կողմից բժշկուեց եւ զնաց Հնդկաստան: Բռնել են Ալբանում (այժմ Բաքու) եւ գլխիվայր խաչել, յետոյ մորթագործ արել ու գլուխը հատել»: Դժուար է, ի հարկէ, պատկերացնել, թէ ինչպէս է «Ալբանայժմ Բաքուն» յայտնուել Հնդկաստանում:

Իսկ ահա Ֆլորիդա նահանգի Ֆորաստ Մայերսի Ռուս Ուղղափառ Եկեղեցու Սուրբ Նիկողայի վանքում մի քայլ առաջ են անցել. այստեղ «Մեծ Հայքը»-ը «Մեծ Ալբանիա» է դարձել. «... ըստ աւանդութեան առաքելը զնացել է քարոզելու Հարաւայիմ Կովկասի Մեծ Ալբանիայում: Այդ հողերում ապրում էին հեթանոս կրակապաշտներ, որոնց մէջ սուրբը յաջողութեամբ քարոզում էր, ինչին նպաստում էին աւետմանը ուղեկցող հրաշքները: Մասնաւորապէս առաքելը բուժել է տեղական թագաւորի հիւանդ դստերը: Ըստ աւանդութեան՝ 71 թ. Ալբան քաղաքում, որը որոշ հետազօտողներ նույնականացնում են ժամանակակից Բաքուի հետ, հեթանոս քրմերը յաջողացրել են Բարթոլղիմէոս առաքելի ձերբակալութիւնը եւ դատաւարտումը... Ադրբեջանի մայրաքաղաքի հէնց կենտրոնում պեղումների ժամանակ գտնուել են առաքելի մահուան վայրում կառուցուած հին բազիլիկի աւերակները»⁴¹: Հասկանալի է ոչ մի խօսք այն մասին, թէ ինչպէ՞ս են նոյնականացրել առաքելի մահուան վայրը:

Բնականաբար, այս կեղծիքի տարածման գործում շատ ակտիւ է Ռուս Ուղղափառ Եկեղեցու Բաքուի եւ Ադրբեջանի թեմի «Ուղղափառութիւնը Ադրբեջանում» (Православие в Азербайджане) կայքը: Այն մասնաւորապէս բացատրում է, որ «Ադրբեջանը ոչ միայն Արեւելքի, այլեւ ողջ երկրագնդի հնագոյն ռեզիդենտներից մէկն է [տպաւորութիւն է, որ երկրագնդի վրայ

կան հին ու նոր ռեզիդենտներ, «Երկրագնդի ռեզիդենտները» ժամանակի ընթացքում «յայտնուել եւ/կամ անհետացել են», – Ն. Խ.): Նրա պատմութիւնն իր արմատներով հասնում է հնագոյն անցեալ: Ըստ Աստուածաշնչի հաղորդման հէնց այս տարածքն է այն վայրը, որտեղ ջրհեղեղից յետոյ հանգրուանել է հին կտակարանի նախահայր Նոյի փրկուած ընտանիքը: Ադրբեջանի եւ Հարաւային Կովկասի յարակից երկրների պատմութիւնը Առաջաւոր Ասիայի պատմագրութեան հետաքրքրագոյն էջերից է... ժամանակակից Ադրբեջանի եւ Հարաւային Դաղստանի հողերը պատմականօրէն մտել են Կովկասեան Ալբանիա պետութեան կազմի մէջ: Կովկասեան Ալբանիայում եղել է ինքնուրոյն, առաքելական սկիզբ ունեցող Ալբանական Եկեղեցի: Տարբեր պատճառներով այնպէս է ստացուել, որ ալբանական ժողովուրդը չի կարողացել պահպանել իր պետական եւ եկեղեցական ինքնուրոյնութիւնը: Այն պահին, երբ Կովկասեան Ալբանիայի Եկեղեցին գործնականում դադարեց գործել, ոչ առանց Աստծոյ կամքի փոխուեց Կովկասի աշխարհաքաղաքական քարտէզը: Ադրբեջանը եւ Դաղստանը մտան Ռուսական կայսրութեան ազդեցութեան գօտի, եւ այստեղ իր փրկչական առաքելութիւնն սկսեց Ռուս Ուղղափառ Եկեղեցին: Հէնց նրա շնորհիւ այս հողում քրիստոնէութիւնը չվերացաւ: Բաքուի թեմը դարձաւ պատմական Ալբանիայի-ներկայիս Ադրբեջանի եւ Դաղստանի առաքելական մշակութեան շարունակողը: Նրա առաքելութիւնը նաեւ երբեմնի Կովկասեան Ալբանիայի Եկեղեցու հիմնադրած փոքր հօտին հոգեւոր կերակուր տալն է: Կովկասեան Ալբանիայում քրիստոնէութեան տարածման սկզբնական փուլը կապուած է սուրբ առաքել Բարթոլղիմէոսի եւ Թադէոսի, ինչպէս նաեւ

41 Святой апостол Варфоломей (I в.),-

<http://floridamonastery.org/svyatoj-apostol-varfolomej-i-v/> (վերջին այցելութիւնը կայք՝ 28.05.2025):

Թաղէոսի աշակերտ սուրբ Եղիշէի գործունէութեան հետ»⁴²: Յօդուածն այնուհետեւ շարունակում է Ռուս Ուղղափառ եկեղեցու հոգեւորական նիկոնորովի վերը ներկայացուած տեքստը:

Այս կայքում «Կովկասեան Ալբանիան» յաճախ մոռացում է, առաջին դարի դէպքերը ծաւալուած են ուղղակի Ազրբեջանում. «Ազրբեջանի հողում քրիստոնէութիւնը յայտնուել է դեռեւս առաքելական ժամանակներում: Ըստ աւանդապատման՝ առաջին քարոզիչը եղել է Բարթոլոմէոս առաքեալը [հէնց այստեղ էլ տառապագին մահ է գտել]» եւն: Յօդուածագիրն այնուհետեւ տեղեկացնում է, որ «աղուանական ցեղային հին միաւորումից մնացել է քրիստոնէութեանը հաւատարիմ մի ժողովուրդ, ուղիները... որը ջանում է իր կրօնական ինքնորոշումը եւ կանոնական յարաբերութիւնները վերականգնել... նրանցից շատերն ուղղափառ են ... եւ աւելի քան հազարամեակով նախաքաղկեդոնիկ եկեղեցում մնալուց յետոյ վերադառնում են ուղղափառութեանը»⁴³: Անշուշտ «մոռացում է», թէ ինչպէս են հարիւրամեակներ շարունակ ուղիները ջանացել պահպանել իրենց կրօնական ինքնորոշումը՝ Հայ Առաքելական եկեղեցին⁴⁴: Նորահնար այս առասպելը զարդարում է նոյնքան նորահնար մանրամասներով՝ Բարթոլոմէոսին աւելանում է Թաղէոսը.

«Ազրբեջանի քրիստոնէական ժառանգութիւնը երկրի հնագոյն պատմութեան մէջ խոր արմատներ ունի եւ նշանակալի դեր է խաղացել նրա զարգացման գործում: Մ.թ. առաջին դարից քրիստոնէութիւնն այս տարածաշրջան է բերուել Բարթոլոմէոսի եւ Թաղէոս առաքեալների կողմից»⁴⁵:

Միշտ չէ, որ կայքի յօդուածագիրները հասկանում են, թէ ինչպէս հիմնաւորեն իրենց ցանկալի, բայց անցեալի աղբիւրներ չունեցող աւանդազրոյցները, եւ երբեմն նրանց տեքստերում յայտնում են Բարթոլոմէոսի գործունէութեան մասին հայերէն տեքստերի տեղանուններ: Օրինակ՝ Հայերէնից պատճենում են «Աղբակ» տեղանունը՝ գրելով «АзбаК», բայց անուան կողքը փակագծերում «Բաքու» գրելը չեն մոռանում. «Սուրբ Բարթոլոմէոս առաքեալը Աւետարանի իր խօսքը բերեց Փոքր Ասիա, անցաւ Հնդկաստանով եւ Խուլիսեան (Կասպից) ծովի ափին Ալբանոպոլիս-Աղբակ (այսինքն՝ Բաքու) քաղաքում խաչեցին խաչի վրայ» [բնագրում՝ «на берегу моря Хвалынского (Каспийского) в городе Альбанополе – Азбаке (т.е. в Баку)»]⁴⁶:

Այս ողջ հնարովի քարոզչական նիւթը դարձել է Ալբանիայի առաքելական եկեղեցու հիմնաւորումների ռեսուրս: 2013 թ. տեղի ունեցած մի գիտաժողովի ժամանակ, որը անուանուել է «Քրիստոնէութեան ընդունման 1700-ամեակը Դերբենդում որպէս

42 История христианства в Азербайджане, - https://pravoslavie.az/history/christianity_in_azerbaijan_history/ (21.04.2025)

43 Православие в Азербайджане, - <https://www.pravoslavie.ru/put/070126150112.htm#>

44 (Խառատեան) Առաքելեան Լ., Եղիշէ անաքեայի պաշտամունքն ուղիների մէջ եւ Ռուսի գաւառի տեղադրութեան հարցի շուրջ, - «Լրաբեր հասարակական գիտութիւնների» (Երեւան), 1991, № 6, էջ 69-86; Харатян Г., Удины: крах всех усилий самосохранения // Официальные этно-демографические показатели в Азербайджане в контексте поиска и кризиса идентичности азербайджанцев. - Удины: крах всех усилий самосохранения, Под ред. В. А. Захарова, Москва,

«Центриздат», 2015; Харатян Г., Идентификационные и самоидентификационные термины удин-христиан по материалам армянских и удинских письменных источников и удинских эпитафий, «Восток» (Oriens), 2021, № 5, с. 116-128.

45 Христианское наследие Азербайджана, 29.05.2023 // <https://ati.az/ru/blog/christian-heritage-of-azerbaijan>

46 История Православных храмов Азербайджана. Часовня святого апостола Варфоломея возле Девичьей башни в Баку, 23.12.2021, - https://pravoslavie.az/history/orthodox_churches_azerbaijan_history/?id=13668

Կովկասեան Ալբանիայի պետական կրօն», բազմաթիւ գիտական յաւակնութիւններով ելոյթներ եղան: Այս հաւաքին Դերբենդի քաղաքապետը բացման խօսքում «ամփոփել է» Ռուս Ուղղափառ Եկեղեցու վերջին յայտարարութիւնները Բարթոլոմէոսի առաքելութեան մասին, որում կան առաջին դարի պատմութեան բոլոր դերակատարները, բայց դրանք բոլորը յայտնուել են... Ալբանիայում. «Քրիստոնէութեան պատմութիւնը Կովկասեան Ալբանիայում իր ծնունդով պարտական է Բարթոլոմէոսու եւ Թադէոս առաքելներին... Սուրբ Բարթոլոմէոսը Փոքր Ասիայից եւ Հնդկաստանից ուղղուել է Կովկասեան Ալբանիա ... չնայած առաքելը բռնուել էր այդ երկրի (որ երկրի, Ալբանիայի՞ – Հ. Խ.) կառավարչներին մէկի հիւանդ դատերը եւ մկրտել նրա ընտանիքը, այստեղ կառավարչի եղբայր քրմերի կողմից ներշնչուած Աստիգին յաջողուած է բռնել սուրբ Բարթոլոմէոսին եւ բերել Ալբանիայի հին կրօնական կենտրոն քրմերի Բարուկ (Ալբանոպոլիս, Ալբանա, Բաքու) քաղաք, որտեղ զրադաշտական դախմայի (Կոյսի աշտարակ) ստորոտում, Արտայի տաճարի աստիճաններին գլխիվայր խաչում են: ...Սա տեղի է ունեցել մ.թ. 68-71 թթ.»⁴⁷:

Նոյն գիտաժողովում մէկ այլ գեկուցող, որպէս ազբիւր յղելով Մակարի Բուլգակովին, տեղեկացնում է լսարանին, որ «Բարթոլոմէոս առաքելը, եկեղեցական աւանդոյթի համաձայն, նոյնպէս քարոզել

է Քրիստոսի հաւատը Կովկասեան Ալբանիայում⁴⁸. Մ. Բուլգակովը, ինչպէս վերը տեսանք, գրել է Մեծ Հայքում Բարթոլոմէոսի գործունէութեան մասին: Այստեղ, փաստօրէն, շարունակուած է «Մեծ Հայքը» «Կովկասեան Ալբանիայով» փոխարինելու նորամուտ անպարարութիւնը:

Յիշեալ գիտաժողովում այս անպարարութիւնը աւելի է սրում մէկ այլ հեղինակ՝ Գ. Ալիեւ անունով: Վերջինս Ալբանիայում, որը, ըստ նրա, «հարաւային Դաղստանն է, Բարթոլոմէոսի առաքելական գործունէութեան մասին տեղեկութիւնների գլխաւոր աղբիւր համարում է «հայ պատմաբաններին» «գլխաւորապէս հայ պատմաբանների հաղորդած աւանդութիւններով Բարթոլոմէոս առաքելը քարոզել է Ալբանիայում, այսինքն՝ հարաւային Դաղստանում»⁴⁹: Պէտք է ենթադրել, որ Գ. Ալիեւը ինչ-որ ձեւով տեղեկակ է, որ վաղ միջնադարի Ալբանիայի մասին տեղեկութիւններ հաղորդողները «գլխաւորապէս հայ պատմաբանները» պատմագիրներն են եղել, եւ հարկ չի համարել ստուգել իր ասելիքը, կամ գոնէ որեւէ «պատմաբանի» անուն յիշել: Իրականում որեւէ հայ պատմագիր Ալբանիայում Բարթոլոմէոսի որեւէ գործունէութեան մասին ոչինչ չի գրել:

Այս զուեշտալի գիտաժողովում նման «մարգարիտները» շատ են: Նրա գեկուցողներից երրորդը գրում է. «IV դ. սկզբներին Գրիգորիսը քրիստոնէութիւն էր տարածում Հայաստանի հարեւան երկու երկրներում

47 Вступительное слово и доклад главы администрации городского округа «Город Дербент» И. М. Яралиева, - «1700-летие принятия христианства в Дербенте как государственной религии Кавказской Албании»: Материалы Всероссийской научно-практической конференции (г. Дербент, 14-15 ноября 2013 г.) / Отв. ред. Сеидова Г. Н. Махачкала: АЛЕФ, 2013, с. 6.

48 Абдурагимов Г. А., Кавказская Албания – первая христианская страна на Кавказе и отражение в Библии элементов шумеро-гумийской духовной

культуры, - «1700-летие принятия христианства в Дербенте как государственной религии Кавказской Албании»..., с. 50.

49 Алиев Г. А., К вопросу о принятии христианства в Дербенте, как государственной религии Кавказской Албании, - «1700-летие принятия христианства в Дербенте как государственной религии Кавказской Албании»..., с. 63.

Վրաստանում եւ Կովկասեան Ալբանիայում: Աստծուն ծառայելը յանգեցրեց նրա տառապալի զոհուելուն, ինչպէս Թադէոս եւ Բարթողիմէոս առաքեալներ յղեպքում»⁵⁰: Հարցը Թադէոսն ու Բարթողիմէոսն է՞լ են զոհուել «Վրաստանում եւ Կովկասեան Ալբանիայում» քարոզելիս բաց է մնում:

Այս կեղծիքները եւ թերասացութիւնները լրացնում է եւս մէկ զեկուցող Ռոբերտ Մորելին: Նրա զեկուցումը ուղիների մասին է, այսինքն Ալբանիայի բազմաթիւ էթնիկական միաւորներից քրիստոնեայ մնացած միակ ժողովրդի: 1988-1989 թթ. այս արդէն իսկ անհետանալու եզրին հասած ժողովրդի հիմնական մասը իր հայրենիքից Խորհրդային Ադրբեջանի Շաքիի, Կուտկաշէնի եւ Վարդաշենի շրջաններից փախաւ Ֆիզիկական բնաջնջման վտանգից, ուղիները մնացին միայն մէկ գիւղում՝ Նիժում, շուրջ 2 հազար մարդ: Այս ժողովրդի մասին Ռ. Մորելին գիտաժողովում յայտարարում է, որ «ուղիների քրիստոնէութիւնն ու նրանց եկեղեցին անհնար է պատկերացնել առանց դրա կրողների եւ հօտի, այսինքն առանց նրանց, ովքեր դաւանում են իսլամ, յուդայականութիւն, քրիստոնէութիւն եւ զրադաշտականութիւն»: Այդպէս էլ չբացելով «ուղիական քրիստոնէութեան կրողների եւ հօտի» գաղտնիքը, այսինքն «իսլամ, յուդայականութիւն, քրիստոնէութիւն եւ զրադաշտականութիւն» դաւանողների կապը ուղիների քրիստոնէական եկեղեցու հետ, Ռ. Մորելին անցնում է Ալբանիայի պատմական անցեալին գրելով. «Համարեա երկու հազար տարի առաջ [Ալբանիայում] սկսեցին ձեւաւորուել

քրիստոնէական Համայնքներ Բարթողիմէոս առաքեալի քարոզչութեան սկզբից եւ տանջալի մահից յետոյ, ինչը հնարաւոր է դարձնում ենթադրել, որ Ալբանիայում աւետարանական սերմերն առաջինը ցանել է առաքեալն անձամբ կամ իր մերձաւոր օգնականների հետ: Ալբանապոլիսում (ժամանակակից Բաքու) նրա ներկայութիւնն անժխտելի է, ինչպէս նրա մերձաւոր գործընկեր Եղիշէի առաքելական գործունէութիւնը»⁵¹: Այս զեկուցողը նոյնպէս որեւէ վկայութիւն կամ աւանդազրոյց Ալբանիայի տարածքում քրիստոնէութեան երկուհազարամեայ գոյութեան մասին չի յիշատակում, ինչպէս չի յիշատակում Ալբանոպոլիս/Բաքու քաղաքի գոյութեանը եւ այդ քաղաքում Բարթողիմէոսի քարոզչութեան մասին որեւէ աղբիւր, բայց «գիտի», որ դա «անժխտելի է»: Սակայն նա աւելացնում է, որ Բարթողիմէոսի քարոզչութիւնից յետոյ Ալբանիայի տարածքում ձեւաւորուել են քրիստոնէական Համայնքներ կրկին չյիշելով այդ Համայնքներից զոնէ մէկի մասին որեւէ աղբիւր, տեղեկութիւն: Նա միաժամանակ Բարթողիմէոսի մերձաւոր գործընկեր է յայտարարում Եղիշէին, կրկին աղբիւր չյիշելով. Անշուշտ որեւէ ակնարկ չի անում այն մասին, որ Եղիշէի անունն առհասարակ Հրապարակ է բերուել 7-րդ դարում միայն մէկ հեղինակի՝ Մովսէս Դասխուրանցու (Կաղանկատուացու) կողմից, ունեցել է քաղաքական նպատակ⁵², եւ մինչեւ 7-րդ դար այդ անունը քրիստոնէական աշխարհի որեւէ հեղինակի ծանօթ չէր: Ինչ վերաբերում է ուղիների կրօնին եւ «ուղիական հօտի» կապին այլ կրօնների հետ, ապա դրան բաւական մանրամասն

50 **Егназарян Т. Х.**, *Христианство в Дагестане*, - «1700-летие принятия христианства в Дербенте как государственной религии Кавказской Албании»..., с. 88.

51 **Мобили Р.**, *Удины и Албанская церковь*, - «1700-летие принятия христианства в Дербенте как государственной религии Кавказской Албании»..., с. 96.

52 **(Խառատեան) Առաքելեան Հ.**, *Եղիշէ առաքեալի պաշտամունքն ողիների մէջ*, էջ 69-86; **Акопян А. А.**, *Албания-Алуанк в греко-латинских и древнеармянских источниках*, с. 183-184; **Յակոբեան Ա.**, «Վաչագանի վէպ»-ը եւ Արշակունաց թագաւորութեան խնդիրը Դ.-Ջ. դարերի Արշակունւմ, ս. 71-74:

կարելի է ծանօթանալ ծագումով ուղի Ղազար քահանայ Յովսէփեանի XX դարասկզբի մանրամասն աշխատանքից եւ այդ նիւթի որոշ վերլուծութիւններէց⁵³, ինչը, կարծէք թէ, Ռ. Մորիլիին ծանօթ չէ:

«Եկեղեցական աւանդապատումի համաձայն՝ Հարաւային Կովկասում եղել են հինգ սուրբ առաքեալներ: Նրանցից չորսը 12-ից Անդրէասը, Մատթէոսը, Բարթուղիմէոսը, Յուզա Թադէոսը եւ մէկը եօթանասունից Թադէոսը, իսկ Կովկասեան Ալբանիայում Քրիստոսի հաւատը քարոզել է Բարթուղիմէոս առաքեալը», - գրում է մէկ այլ հեղինակ Ս. Դ. Նազիրովան⁵⁴: Այս հեղինակի տեղեկութեան աղբիւրը Ռուս Ուղղափառ Եկեղեցու Հոգեւորական Ալեքսի/Անդրեյ Նիկոնորովն է, ով իր հերթին յղում է Դմ. Ռուստովսկու Յայսմաւուրքի անհասկանալի, 1992 թ. աւելացած կեղծ ծանօթագրութեանը⁵⁵: Սա փակ շղթայ է. խնդրով շահագրգիռ բոլորը «գիտեն», որ Բարթուղիմէոսը «Ալբանիայի քարոզիչն է», «դա անժխտելի է», բայց 1992 թուականին աւելացրած ծանօթագրութիւնից աւելի վաղ ոչ մի տեղեկութիւն չկայ:

Ուշագրաւ է, որ 1998 թ. մի տարօրինակ, չնկատուած երեւոյթ է տեղի ունեցել նաեւ մէկ այլ յայտնի աշխատանքում: Խօսքը XVIII դ. հռոմա-կաթողիկէ եկեղեցու անգլիացի Հոգեւորական Ալբան Բատլերի կազմած 12 հատորանոց «Սրբերի վարքը»

աշխատանքի մասին է: Բարթուղիմէոսի մասին տեքստը ծրու հատորում է՝ Օգոստոս ամսին յիշուող սրբերի շարքում: Բազմաթիւ հրատարակութիւններ ունեցած այս աշխատանքի 1998 թ. ԱՄՆ Մինեսոտա նահանգում Burns&Oates հրատարակչութեան հրատարակած ծրու հատորը, John Cumming-ի նոր խմբագրութեամբ, Բարթուղիմէոսի վարքի նահատակութեան հատուածում Ալբանոպոլիս քաղաքի մասին լրացուցիչ ծանօթագրութիւն ունի, փակագծերում գրուած է. «Ժողովրդական աւանդագրոյցները եւ առասպելները ասում են, որ Բարթուղիմէոսը քարոզել է Հնդկաստանում, յետոյ գնացել է Մեծ Հայք: Շատ մարդկանց քրիստոնէական դարձի բերելուց յետոյ բարբարոսները նրան ողջ-ողջ մաշկահան են արել, որից յետոյ Աստիագ թագաւորը հրամայել է նրան գլխատել Ալբանոպոլիսում (Դերբենդ, Կասպից ծովի արեւմտեան ափին)» [բնագրում՝ «Popular traditions and legends say that Bartolomew prached the gospel in India, then went to Greater Armenia. After converting a number of people there he was flayed alive by the barbarians, where upon King Astiages ordered him to be beheaded of Albanopolis (Derbend, on the west coast of the Caspian Sea)»⁵⁶]:

Այս աշխատանքի առաջին 1756 եւ 1773 թուականներէ⁵⁷, ինչպէս նաեւ յետագայ բազմաթիւ հրատարակութիւններում

53 Յովսէփեան Ղ. քահ., Ակնարկներ ուտիացի եւ մահմեդական հայերի մասին, Թիֆլիզ, 1904; Խառատեան Հ., Ուղիների ողիսականը 18-19 դդ. (Պատմութիւն, էթնիկ գոյատեւում, ինքնահաստատում), - Հայոց Մեծ Եղեռն-90; Սիմոնեան Ա. (խմբ.), Երեւան, 2005, էջ 118-171; Նոյնի Եղիշէ ատաքեալի, Գրիգորիսի եւ Կովկասեան Աղուանքի քրիստոնէացւան հարցի շուրջ (Կովկասեան Աղուանքի հին կրկնագիր-ձեռագրի վերծանութեան հրատարակութեան առիթով), - «Բազմավէպ» (Վեցնետիկ), № 1-2, էջ 19-75; Նոյնի՝ Ուղիների կրօնը եւ հաստատիքները ԺԹ.-ի. դարերում, «Համդէս Ամսօրեայ» (Վիեննա), 2010, № 1-12, էջ 435-495:

54 Сеидова Г. Н., Христианство в Кавказской Албании, - «Вопросы культурологии», № 3, 2020.
 55 Иеромонах Алексей (Никоноров). История христианства в Кавказской Албании. 2-е изд. Махачкала: Издательский дом «Эпоха», 2012.
 56 St. Bartholomew,- Butler's Lives of the Saints: August. Vew full Edition, Revised by John Cumming, Burns&Oates, The Liturgical Press, Collegeville, Minnesota, 1998, p. 232 (https://books.google.am/books?id=O8O1_vnTS3QC&pg=PA232&redir_esc=y#v=onepage&q&f=false)
 57 The lives of the primitive fathers, martyrs, and other principal saints [electronic resource]: compiled from original monuments, and other authentic records: illustrated with the remarks of judicious modern critics

Albanopolis քաղաքի անունը միշտ կայ, այն Մեծ Հայքում է, եւ փակագծերում չկան «Derbend, on the west coast of the Caspian Sea» բառերը կամ որեւէ այլ ծանօթագրութիւն: Նոյնն է պարագան նաեւ 1998 թ. յաջորդած 2015 թ. գրքի ամբողջական հրատարակութեան մէջ: Այստեղ Օգոստոսի 24-ին տօնուող սրբերի շարքում ասուում է, որ Սուրբ Բարթոլղիմէոսը քարոզել է Ասիայում, Հնդկաստանում, «բայց Հնդկաստան ասելով պէտք է հասկանալ արաբներին եւ պարսիկներին», ապա Սուրբ Փիլիպոսի հետ գործել է Փոխգիայում՝ Հիերոպոլիս քաղաքում, ապա Լուկոնիայում: «Վերջում Սուրբ Բարթոլղիմէոսը տեղափոխուել է Մեծ Հայք, որտեղ կուռքերի պաշտամունքին նուիրուած վայրում յամառօրէն քարոզելու ընթացքում տանջալի նահատակութեան է ենթարկուել, ինչպէս յիշատակում է Գրիգոր Տուրեցին: Ժամանակակից յոյն պատմաբաններն ասում են, որ նրան խաչելու թեան է դատապարտել Ալբանոպոլիսի իշխանը» [*«St. Bartholomew's last removal was into Great Armenia, where praching in a Place obstantely addicted to the worship of idols, he was crowned with a glorious martyrdom, as St. Gregory of Tours mentions. The modern Greek historians say, he was condemned by the governor of Albanopolis to be cracified»*]⁵⁸: Այստեղ, ինչպէս տեսնում ենք, Ալբանոպոլիսը մնում է Մեծ Հայքի տարածքում: Ի՞նչ է կատարուել 1998 թ. հրատարակութեան ժամանակ, ինչո՞ւ է առաջացել լրացուցիչ կասկածելի ծանօթագրութեան «անհրաժեշ-

տութիւնը»: Կարելի է, ի հարկէ, ենթադրութիւններ անել ազրբեջանական «նաւթային դիւանագիտութեան» մասին: Միայն թէ հրատարակիչը կամ խմբագիրը, համաձայնելով Ալբանոպոլիսը «տեղափոխել» Կովկաս, չի համաձայնել այն նոյնականացնել Բաքու քաղաքի հետ եւ կանգ է առել Դաղստանի Դերբենդ քաղաքի վրայ: Հարց է մնում նաեւ, թէ ինչո՞ւ են յետազայում հանել այս ծանօթագրութիւնը: Ոչ Ռուս Ուղղափառ եկեղեցու, ոչ ազրբեջանական հեղինակներից որեւէ մէկը, կարծէք թէ, այս հրատարակութեանը յղում չունեն:

Բոլոր դէպքերում Ռուս Ուղղափառ Եկեղեցին շտապել է Բարթոլղիմէոս Առաքելի անունով շքանշան ստեղծել եւ նոյնիսկ որոշ անձանց այդ շքանշանով պարգեւատրել: Ինչպէս հաղորդում է Ռուս Ուղղափառ Եկեղեցու Բաքուի թեմը, Սուրբ Բարթոլղիմէոս Առաքելի շքանշանով պարգեւատրում են Ռուս Ուղղափառ Եկեղեցու Բաքուի թեմին յատուկ ծառայութիւններ մատուցած, հասարակութեան բարոյական վերածննդին ներդրում ունեցած այլակրօն եկեղեցական եւ պետական գործիչները, հասարակական կազմակերպութիւնները⁵⁹: Բարթոլղիմէոս առաքելի I աստիճանի շքանշանով պարգեւատրուել է Կրասնի Սլոբոդայի հրէական համայնքի ղեկավարը, «սուրբ Բարթոլղիմէոս առաքելի ոսկէ շքանշանով» պարգեւատրուել է Բաքուի թատրոնի ղեկավարը, իսկ «սուրբ Բարթոլղիմէոս առաքելի» շքանշանով Կովկասի մահմեդականների ղեկավար Շէյխ ուլ իսլամ Հաջի Ալլահշիւքիւր Փաշայ զադէն:

and historians / By the Rev. Alban Butler. The 3rd edition. In 12 Volumes. Butler, Alban, 1711-1773, Vols 8-12 bear the imprint: Edinburgh: Printed by J. Moir, for J. P. Coghlan, P. Keating; and E. Booker, London: and F. Coates, Newcastle. Presumed date of death of creator (latest date): 1773, Publication date: 1800; The Lives of The Fathers, *Martyrs*, on Other Principal Saints, London, Vol. VIII, The Lives of The Fathers, Marturs, on Other Principal Saints, London.

58 *The Lives of the Sains*. Complete Edition (from the Original Vols. I-XII). Catholic Way Publishing, 2015- https://www.google.am/books/edition/The_Lives_of_the_Saints_Complete_Edition/gBI2BwAAQBAJ?hl=en&gbpv=1&pg=PT3668&printsec=frontcover
 59 Новости Бакинско-Азербайджанской Епархии // <https://baku.eparhia.ru/news/?ID=637> (այցելութիւնը կայք՝ 10.07.2024):

իր էթնիկական, մշակութային, պատմական ինքնութեան որոնումներում կամ ծրագրային ցանկութիւններում Ադրբեջանում նոր առասպելներ են փնտրում, ձեւակերպում եւ ակտիւորէն տարածում, եւ դրանցից առնուազն մէկին ուղղակիորէն օժանդակում է Ռուս Ուղղափառ Եկեղեցին օգտագործելով նաեւ Բարթոլղիմէոսի մասին իրենց իսկ ստեղծած կոպիտ կեղծիքը: Հասկանալի է, որ Ադրբեջանում փնտրում են իրենց էթնիկական եւ մշակութային կապը այդ երկրի մի մասում վաղ անցեալում գոյութիւն ունեցած Ալբանիայի ժողովուրդների եւ ալբանական քրիստոնէութեան հետ: Բայց Ադրբեջանի բնակչութեան ո՛չ պատմական, ո՛չ սոցիալական, ո՛չ կրօնական, ո՛չ մշակութային յիշողութիւնը Բարթոլղիմէոսի մասին որեւէ ակնարկ չունի: Էթնակառուցողութեան հետազօտողներին, ի հարկէ, այս ծրագիրը հետաքրքիր է հետազօտութեան իմաստով, բայց սրա քաղաքական հեռանկարները անկանխատեսելի են: Առայժմ ամենաարտայայտուածը Ադրբեջանը աշխարհի առաջին քրիստոնեայ երկիրը լինելու մասին բարձրագոյն յայտարարութիւններն են, որը «Հիմնաւորում է» Ալբանիայում Բարթոլղիմէոսի մտացածին առաքելութեամբ: Բայց սա տարօրինակ ձեւով զուգադրում է նոյն առաքելային պատմագրութեան կողմից վերագրուող յուշարձանների քանդամբ, օրինակ՝ Նախիջևանի տարածքում:

XX դարի Ադրբեջանում սփռուած Հազարաւոր քրիստոնէական յուշարձաններ են մնացել: Որքան էլ այդ յուշարձանները քանդոււմ են, դրանք իսպառ չեն վերա-

նում: Նրանց բացարձակ մեծամասնութիւնը Հայկական է, բայց որեւէ կերպ դա պիտի ներկայացուի որպէս ալբանական քրիստոնէական մշակոյթի ադրբեջանական ժառանգութիւն: Միւս կողմից Ադրբեջանի տարածքի յատկապէս Հարաւի նիւթական մշակոյթի մահմեդական անցեալը Հիմնականում սկսում է X դարից յետոյ, իսկ Արցախ-Ղարաբաղի տարածքում ամենավաղ մահմեդական յուշարձաններն առհասարակ XIV դարի որոշ նմուշներ են, ընդ որում Հիմնական յուշարձանային անցեալը սկսում է Ղարաբաղի խանութեան ստեղծումով XVIII դարից: Սա մի կողմից վկայում է այդ տարածքի հիւսիսում մ. թ. I Հազարամեակում կենսունակ քրիստոնէութեան գոյութեան մասին⁶⁰, միւս կողմից Հազարամեակում նույն քրիստոնէութեան կենսունակութեան մասին նաեւ երկրորդ Հազարամեակում: Ադրբեջանի իշխանութիւնները փորձում են այդ ժառանգութեան տէր կարգել Ալբանիայի ժամանակներից քրիստոնեայ մնացած միակ կենդանի ժողովրդին՝ անհետացման եզրին գտնուող ուղիներին, բայց նրանք Հայ Առաքելական Եկեղեցու դաւանանքի հետեւորդներ են, ինչը խանդարում է այդ ժառանգութիւնը Հայերից հեռացնելու ցանկութեանը: Փորձեր են արւում ուղիական քրիստոնէութիւնը այլ Հակահայկական շղարշով ներկայացնելու, եւ այդ խնդրում «օգնութեան են կանչել» Ռուս Ուղղափառ Եկեղեցուն: Վերջինս փորձում է օգնել նրանց ալբանական քրիստոնէութիւնը նախաքաղկեդոնիկ շրջանից ինքնուրոյն առաքելական դարձնելով: Բայց այդ «օգնութիւնը» առայժմ շատ կոպիտ է ոչ աւանդութիւն կայ, ոչ

60 Խառատեան Հ., Եղիշէ առաքելայի, Գրիգորիսի եւ Կովկասեան Աղուանքի քրիստոնէացման հարցի շուրջ (Կովկասեան Աղուանքի հին կրկնագիր-ձեռագրի վերծանութեան հրատարակութեան առիթով), - «Բազմավէպ» (Վենետիկ), 2010, № 1-2, էջ 19-75; Խառատեան Հ., Քրիստոնէութիւնը Բուն Աղուանքում զարգացած միջնադարում,

«Հայաստանը եւ Քրիստոնեայ Կովկասը». Կովկասեան Աղուանքում եւ Վրաստանում քրիստոնէութեան ընդունման 1700-ամեակին նուիրուած հանրապետական գիտաժողովի զեկուցումների դրոյթներ (խմբ.՝ Յակոբեան Ա., Բոզոյեան Ա. Սաֆրաստեան Ռ.), Երեւան, «Գիտութիւն», 2015, էջ 106-120:

աղբիւր ոչ բովանդակութիւն, ոչ հետեւորդ: Նորաստեղծ առասպելներն անմիջապէս իրենց հերթին ծնում են նոր երեւակայական պատումներ, այդ թւում՝ զառանցանքի հասնող երեւակայական թռիչքներ, ինչպէս, օրինակ, 2021 թ. Մարտի 3-ին դոքտոր Զատուր Ալիևի անունով ազգայնորէն լեզուով տարածուած «Յիսուս Քրիստոսի առաքեալ Բարթոլոմէոսի գերեզմանը գտնուել է Բաքուում» վերնագրով յայտարարութիւնն է: Մարդը յայտարարում է, որ 1964 թ. Բաքուում յայտնաբերուել է աշխարհի հինգ մեծագոյն գաղտնիքներից մէկը, որը փոխել է աշխարհի ողջ լանդշաֆտը. «Հնագէտները [Բաքուի] հին քաղաքում՝ Աղջկայ բերդի մօտ յայտնաբերել են հին սրբապատկերներով, դրամներով եւ ձեռագրերով մի դամբարան, որի վրայ հին ադուաներէն լեզուով գրուած է եղել «Յիսուս Քրիստոսի առաքեալ, Աստուծոն Հաւատարիմ առաքեալ Վարտալոմէոս»: Լուրը հասնում է Մոսկուա, այնտեղից գալիս են սովետական անվտանգութեան ծառայութեան աշխատակիցները, Հնագէտների հետ զրուցում են, եւ գերեզմանը տուփի մէջ դնելով տանում: Որոշումը հիմնաւորուել էր նրանով, թէ «որպէսզի կրօնական քարոզչութիւն չլինի, գերեզմանը հարկաւոր է թաքցնել, պեղումները դադարեցնել եւ եկեղեցին քանդել»: Իլիւմինատորները համաշխարհային գաղտնի կազմակերպութիւնները [անյայտ է մնում՝ որեւէ կոնկրէտ, թէ՞ ընդհանրական ինչ-որ «գաղտնի կազմակերպութիւն» – Հ. Խ.] այս տեղին յատուկ նշանակութիւն էին տալիս: Նրանք Յրանսիայից, Իրանից, Թուրքիայից, Մեծ Բրիտանիայից գաղտնի եկել էին այստեղ...»⁶¹: Այստեղ նոյնիսկ երկրների ընտրութիւնն է տարօրինակ:

Յայտնի է, որ Աւետարաններում որեւէ ուղղակի վկայութիւն չկայ Բարթոլոմէոսի առաքելական գործունէութեան մասին: Մի փոքր ակնարկով անդրադառնանք Բարթոլոմէոսի մասին Հայկական տեղեկութիւններին: Առաքեալների գործունէութեան մասին քրիստոնէական աւանդոյթն առհասարակ զգալիօրէն ձեւաւորուել է, ինչպէս վերն ասուեց, III դարից յետոյ Հաւաքուած պատմութիւնների, բանաւոր յիշողութիւնների հիման վրայ: Բարթոլոմէոսի կեանքի եւ գործունէութեան մասին տարբեր դարերում գրուել է Հայկական Յայսմաւուրքներում, միջնադարեան գրաւոր ժառանգութիւնում կան նրան նուիրուած բազմաթիւ ճառեր, տաղեր, աղօթքներ, այդ թւում ժողովրդական աղօթքներ: Ղեւոնդ Ալիշանի կազմած եւ 1853-1861 թթ. ընթացքում Վենետիկում հրատարակուած «Սոփերք Հայկական» մատենաշարի 8-րդ եւ 19-րդ հատորները հաւաքաբար ներկայացնում են առաջին դարում 12 առաքեալներից քրիստոնէութիւնը Հայաստան բերած երկուսի՝ Թադէոս եւ Բարթոլոմէոս առաքեալների վկայաբանութիւնները, որոնք ընկած են Հայաստանում նրանց առաքելական գործունէութեան մասին գիտելիքի հիմքում եւ կազմում են վաղ քրիստոնէական շրջանի Հայաստանեան քրիստոնէական աւանդոյթի առանցքը: 1904 թ. Վենետիկում հրատարակուած «Անկանոն գիրք առաքելականաց»-ում միայն Բարթոլոմէոսի մասին երեք «կենսագրական» վարք է հրատարակուած «Վկայաբանութիւն Սրբոյ Առաքելոյն Բարդողոմէոսի», «այլ օրինակ. Համառօտ վկայաբանութիւն սրբոյն Բարթոլոմէոսի եւ Յուդայի առաքելոցն Քրիստոսի», «Գիւտ նշխարաց Սրբոյ Առաքելոյն Բարթոլոմէոսի» միշտ հաւատարիմ մնալով աղ-

61 Յիսուս Քրիստոսի առաքեալ Բարթոլոմէոսի գերեզմանը գտնուել է Բաքուում,-

<https://qaynarinfo.az/az/bakida-mezare-tapilan-isa-peyemberin-apostolu-varfolomey/>

բիւրին եւ նոյնիսկ առաքելի անունը պահելով ազբիւրում նշուած տարբերակներով Բարթողիմէոս, Բարթողոմէոս, Բարթողովմէոս, Բարդողոմէոս⁶²:

Իրանց վերաբերեալ XIX դարից սկսած Հայ հեղինակների կողմից կատարուել են մեծ ծաւալի վերլուծութիւններ՝ անդրադառնալով նաեւ առաքելների, այդ թւում նաեւ Բարթողիմէոսի գործունէութեան մասին տեղեկութիւններին այլ ժողովուրդների միջավայրում: Հրատարակուել են նոր տեղեկութիւնների աղբիւրներ: Օրինակ Բարթողիմէոսի կողմից պարթեւների դարձի բերելու մասին յունարէն թարգմանութեամբ պատումը 700-ական թուականների *Narratio de rebus Armeniae* Հայ քաղկեդոնական գրուածքում. «lin. 21-28. Արշակի ժամանակ Հայաստանը բաժանուեց, կառուցուեց Թէոդոսուպոլիսը, որը նախկինում գիւղ էր եւ կոչուում էր Կալէ Արխէ այն պատճառով, որ մեծ առաքեալ Բարթողիմէոսը Պարթեւստան գնալիս եփրատ գետում մկրտեց Պարսից արքայի եղբորորդուն եւ նրա հետ միասին երեք հազար մարդ, այնտեղ նա կառուցեց ամենասրբուհի Աստուածածնի անուան տաճար, եւ այդ վայրում գտնուող գիւղն անուանեց Կալէ Արխէ (Բարի սկիզբ)»⁶³:

Միշել Վան էսբրուկը գրում է, որ Բարթողիմէոսի պարթեւական լեզենդի մի տարբերակ էլ կայ լատիներէն, յունարէն չհրատարակուած, եւ հայերէն՝ նոյնպէս չհրատարակուած, ՄՄ (=Մաշտոցի ա-

նուան Մատենադարան) թիւ 7853 ձեռագրում (1366 թ., 374բ-380ա): Ըստ այդ պատմութեան՝ նահատակուելուց յետոյ Բարթողիմէոսի նշխարները բարեպաշտ մարդիկ տարան «յերկիրն Հայոց» եւ թաղեցին: Պ. գ. դ. Գոհար Մուրադեանը 2017 թ. հրատարակել է ՄՄ թիւ 7853 ձեռագրում պահպանուած յունարէնից թարգմանուած հայերէն բնագիրը, որը ներկայացնում է Բարթողիմէոսի գործած հրաշքները եւ աւարտում Բարթողիմէոսի նահատակութեան նկարագրութեամբ (որն աւարտում է «եւ բարեպաշտ ոմանք գաղտ հանին զնշխարս առաքելոյն եւ տարան յերկիրն Հայոց եւ անդ թաղեցին ի բարեխաւսութիւն անձանց մերոց» տողերով)⁶⁴:

Թաղէոս եւ Բարթողիմէոս առաքելների Հայաստանեան գործունէութեան մասին Հայկական միջնադարեան վաղուց յայտնի պարականոն (սպոկրիֆիկ) տեղեկութիւնների հաւաքածոն վերջերս կազմել, թարգմանել եւ հրատարակել է Վալենտինա Կալցոլարին⁶⁵:

Այստեղ մի փոքր կը խօսուի այն մասին, որ այս կամ այն անձի առաքելականութիւնը, կամ այդ առաքելականութեան մասին պատկերացումները, քննարկումները, աւանդագրոյցները, նրանց վարքերի տեղական պատկերացումները, դրանց վերաբերեալ գրաւոր եւ բանաւոր տեքստերը, ծէսերը (տօնակատարութիւններ, աղօթքներ, ուխտագնացութիւններ) ուղղակի կամ անուղղակի երկխօսութիւն է քրիստոնէական աշխարհի ներսի դերակատարների

62 Անկանոն գիրք Առաքելականք / [Հրատ. Քերով-բէ Չրաքեան], Վեներտիկ, տպ. Ս. Ղազար, 1904, էջ 333-357; էջ 357-364; էջ 365-368:
63 Բարթիկեան Հ., «Narratio de rebus Armeniae» յունարէն թարգմանութեամբ մեզ հասած մի հայ քաղկեդոնական սկզբնաղբիւր, «Բանբեր Մատենադարանի», 6, 1962, էջ 457-470:
64 Մուրադեան Գ., Թաղէոս եւ Բարդողիմէոս առաքելների մասին լեզենդի տարբերակները միջնադարեան բնագրերում, «Արշալոյս քրիստոնէութեան հայոց», Միջազգային գիտաժողովի

նիւթերի ժողովածոյ, Երեւան, «Գիտութիւն», 2017, էջ 140,- <https://arar.sci.am/dlibra/publication/402743/edition/372785/content?ref=L3B1Ym9uLzZlZG10aW9uLzZlZm3NjM4NA>
65 *Les Apotres Thaddée et Barthelemy Aux origines du christianisme armenien. Martyre et Decouverte des reliques de Thaddee.* Martyre et Decouverte des reliques de Barthelemy par Maroutha Introduction, traduction et notes par Valentina Calzolari. Brepols Publishers. January 2011.

Հետ սեփական ինքնութեան, մշակութային վարքի շարունակականութեան ձեւի ու բովանդակութեան պահպանութեան կամ զարգացումների շուրջ: Վայրերը, որտեղ եղել են առաքելները, այս կամ այն գործը, խօսքը, որ ասել կամ արել են նրանք, կամ առնուազն այդ մասին խօսուել է ժողովրդի մէջ, դրանց մասին պատմութիւններն ազդել են վայրի եւ դրա բնակիչների յետագայ կեանքի վրայ, տարբեր կերպ ձեւաւորել են տարածքի հասարակական ու մշակութային կեանքը: Դրանցում նշուած տեղանունները կողմնորոշիչներ են նաեւ այս կամ այն կոնկրէտ վայրերի բնակչութեան յիշողութեան մասին: Հասկանալի է, որ ստորեւ բերուող տեղեկութիւնները Բարթոլղիմէոսի կամ առհասարակ առաքելներից որեւէ մէկի գործունէութեան վերաբերեալ «ապացուցողական» նպատակ չեն հետապնդում: Խօսքը տարբեր դարաշրջաններում նրանց մասին ակտիւացող կամ նուազող յիշողութիւնների, կամ այդ յիշողութիւնների վրայ ազդող քաղաքական, կրօնական եւ ժողովրդական մշակոյթի մասին է:

Դեռեւս V դարի Հայրապետ Սահակ Պարթեւը (348-439), 431 թ. Եփեսոսի տիեզերական ժողովից յետոյ, նեստորականների մասին գրելիս, անդրադառնում է առաջին դարին առաքելների գործունէութեանը, այդ թւում Հայաստանում. «...բարերարն Աստուած... առաքեաց զմի յաշակերտաց

իւրոց զԹադէոս առաքեալ... Որոյ եկեալ սերմանեաց զբանն ճշմարիտ հաւատոցն ի սմին աշխարհի կատարեալ փոխեցաւ առ այն, որ առաքեցաւ զնա... եւ զկնի նորա Բարթողիմէոս ընկեր նորին զխորհուրդ առաքելութեանն ի սմին աշխարհի աւարտեալ, զի ի ձեռն երկուց աստուածային արանց հաստատեցի ի մեզ վկայութիւն ճշմարիտ հաւատոցն բանի, անխախտելի մնալ մինչեւ իսպառ, որ եւ եղել իսկ...»⁶⁶:

Հայաստանում առաքելների գործունէութեան մասին խօսելիս Մովսէս Խորենացին մանրամասն նկարագրում է Թովմաս եւ Թադէոս առաքելների գործերը⁶⁷ յաճախ յիշեցնելով, որ ինքը միայն համառօտ յիշատակում է նրանց (Թադէոս, Ադդէ, Սիմոն), քանի որ. «ինչպէս ասացինք, մեզանից առաջ պատմուած է ուրիշներից, ուստի կարեւոր չհամարեցինք մանրամասն կրկնել», եւ շատ համառօտ Բարթոլղիմէոսի մասին գրում է «վիճակեցաւ Հայոց եւ Բարդուղիմէոս Առաքեալ, որ եւ կատարեցաւ առ մեզ յԱրեւանոս⁶⁸ քաղաքի»⁶⁹: Այլ կերպ ասած V դարում առաքելների, այդ թւում կոնկրէտ Բարթոլղիմէոսի գործունէութիւնն այնքան յայտնի էր ու տարածուած, որ դրա մասին մանրամասն գրելն անիմաստ էր: Խորենացու Սահակ Արծրունուն յղած թղթում պատմւում է, որ Բարթոլղիմէոսը Աստուածամօր պատկերը բերեց Հայաստան⁷⁰:

66 Բացայայտութիւն..., ասացեալ սրբոյ վարդապետին Սահակայ Հայոց կաթողիկոսի եւ մեծի թարգմանչի ընդդէմ երկաթնակաց անստորականացն,- Գիրք թղթոց, էջ 414:
 67 Սրբոյ հօրն մերոյ Մովսէսի Խորենացոյ Պատմութիւն Հայոց, Տիֆլիս, 1913, Տպ. Աղանեսանի, էջ 146-153:
 68 «Այլք Արեւարոնոս, կամ Արեւորոնոս, կամ Արեւորոնոս» – Սրբոյ հօրն մերոյ Մովսէսի Խորենացոյ Մատենագրութիւնը, Վեներտիկ, 1843, էջ 112-ի երկրորդ ծանօթագրութիւն:
 69 Սրբոյ հօրն մերոյ Մովսէսի Խորենացոյ Պատմութիւն Հայոց, էջ 154: Հմմ. Մովսէս Խորենացի, Հայոց պատմութիւն, Թարգմանութիւնը, Աերա-

ծութիւնը եւ ծանօթագրութիւնները Ստ. Մալխասեանի, Եր., Հայաստան, 1990, էջ 101 («հայերին վիճակուեց Բարդուղիմէոս առաքեալը եւս, որը նաեւ նահատակուեց մեզ մօտ Արեւանոս քաղաքում»): Ըստ Ստեփան Մալխասեանի ծանօթագրութեան՝ Խորենացին մէկ այլ տեղ (Աստուածամօր պատկերի պատմութիւնը, Թուրք առ Սահակ Արծրունի, Մատեն. Խոր. էջ 295) Բարթողիմէոսի նահատակութեան վայրի անունը գրում է Ուրբանոս (Մովսէս Խորենացի, Հայոց պատմութիւն: Թարգմանութիւնը, Աերածութիւնը ... Ստ. Մալխասեանի, էջ 266, ծմթ. 137):
 70 «Պատասխանի թղթոյն Սահակայ», Սրբոյ հօրն մերոյ Մովսէսի Խորենացոյ Մատենագրութիւնը, Վեներտիկ, 1843, էջ 294: Այդ թուղթը համարուել է

Բարթոլոմեոսն աւելի մանրամասն է ներկայացուած «Սրբոյ Հօրն մերոյ Մովսէսի Խորենացոյ Մատենագրութիւնք» ժողովածոյում: Այստեղ պատմուած է, թէ ինչպէս Բարթոլոմեոսը, վշտացած լինելով, որ Մարիամ Աստուածածնի մահուան պահին ինքը Նրուսաղէմում չի եղել, փայտի վրայ կերտել է տալիս նրա պատկերը, ապա Սուրբ Հոգուց պատուէր է ստանում զնալ Հայաստան աւետարանելու: Գնում է Պարսկաստան, Խորասանում քարոզում, այնուհետեւ անցնում է Հայաստան «Անձաւացեաց յաշխարհն» մի համբաւաւոր քարի մօտ, որում Անահիտին [հեթանոսական Աստուածուհուն] սպասարկող բազմաթիւ դեւեր էին ապրում, եւ այդ վայրը կոչուած էր Դարբնաց քար...⁷¹: Աստուծոյ սուրբը հալածուած է դեւերին եւ այդտեղ մի խաչ կանգնեցնում: Դա Տիգրիս գետի մօտ «Կանգուար բերդի»⁷² եւ Ագուաց քարի միջեւ այն վայրն է, որտեղ յետոյ, 4-րդ դարում Գրիգորիս Հայրապետն էր քարոզում, իսկ յետոյ այստեղ եղաւ Տրդատ Թազաւորի գերեզմանը: Սուրբ առաքեալ Բարթոլոմեոսն այստեղ շինուած է մի փոքրիկ ե-

կեղեցի, որտեղ թողնուած է Մարիամ Աստուածածնի պատկերի փայտէ փորագրութիւնը եւ որն անուանուած է Սուրբ Աստուածածին, ապա կից կառուցուած է կուսանոց եւ վայրը «յանուն Տիրամօր է անուանուած «Հոգեաց վանք»: Իսկ ինքը՝ սուրբ Առաքեալը աւետարանելը Հայաստանում շարունակուած է, եւ «կատարեցաւ [նահատակուեց] յՈւրբանոս քաղաքի»՝ մի վայրում, որ Բարսա⁷³ կոչուեց առաքեալի պատուին⁷⁴:

«Հոգեաց վանքը» XIX դ. կէսերին, չնայած հայ բնակչութեան նուազմանը, դեռ գործում էր որպէս կարեւոր ուխտատեղի: Ղ. Ալիշանի տեղեկութեամբ «Անձեւացեաց գաւառում... կայ անուանի եւ հին ուխտատեղի Հոգուաց վանք՝ շինեալ ի Բարթոլոմեոսայ առաքելոյ ի պատիւ Վերափոխման Տիրամօրն, զորոյ եւ զպատկեր փայտեայ զձեռագործ Յովհաննու Աւետարանի եղ ի նմա, եւ ցարդ թուի լինել անդ»⁷⁵: XIX դ. 60-ական թթ. Գարեգին Սրուանձտեանցն այցելել է գործող վանքը եւ գրել է. «... Վասպուրական նահանգի ութերորդ գաւառն է Անձեւացիք, որուն մէջն է Հոգուոց

աւելի ուշ ժամանակի գրուածք, քանի որ V դարում դեռեւս չկար նրանում յիշատակուող վասպուրական նահանգը: Սակայն Ա. Մուշեղեանը (Մովսէս Խորենացոյ դարը, Երեւան, 2007, էջ 296) ապացուցել է, որ դա տեղանունն չէ, այլ տիտղոս, հետեւաբար այլեւս հիմքեր չկան թուրքը Խորենացունը շխմանարելու համար:

71 Ղ. Ալիշանը պատմում է, որ Վանայ երկրի հարաւ արեւմտեան կողմերում քրիստոնէական սկզբի դարից Ս. Բարթոլոմեոսի առաքելութեան հետ կապուած յիշում է, որ Անձեւացեան գաւառում Կանգուար եւ Ագուաի քար կոչուած լեռների միջեւ մի յատուկ քար կամ քարայր կար, որտեղ ըստ աւանդութեան դարբինների մուրճերի հարուածների ձայների տակ ահաւոր հրաշքներ գործող բազմաթիւ դեւեր էին բնակուում, իսկ մարդիկ դեգերում էին քարայրի մօտերքում: Այդ վայրը կոչվում էր Դարբնաց-քար: Առաքեալը հալածեց դարբիններից, մուրճերը շարդեց: Այստեղ վախեցնողը հէնց խարդախ դարբինների մուրճերի ձայներն էին քարայրից... (Ալիշան Ղ. Ղ., Հին հասարակ կամ հեթանոսական կրօնք հայոց, Վեներտիկ, Ս. Ղազար, 1910, էջ 42):

72 Կանգուար, Ագուավաց քար, Ագուավաքար, Դարբնացքար, Դարբնաքար. Կանգվառ, Կանգուառ, Կանգուար, Կանգումար, Կանգուր, Կինիկվար, Քինիկվար, ամրոց Մեծ Հայքի Վասպուրական աշխարհի Անձեւացիք գաւառում: XII դ. արաբ աշխարհագիր Յակուտը Կանգուարը յիշում է «Քինքիվար» ձեւով, որպէս «ամրակառոց բերդ» Զաւագանում (Անձեւացիք): Կանգուարի տեղում այժմ Կեմզեվեր (Կանքվառ) գիւղն է, որը XX դարակազմին ունէր 50 տուն հայ բնակիչ (Յակուբեան Թ. Խ., Մելիք-Բախշեան Ստ. Տ., Բարսեղեան Յ. Խ., Հայաստանի եւ յարակից երկրների տեղանունների բառարան (խմբ.՝ Մամուկեան Լ. Գ.), հտ. 1, Երեւան, 1986, էջ 1975-1976):

73 Բարս, Բարսա, – Բնակավայր Մեծ Հայքի Վասպուրական աշխարհի Աղբակ գաւառում: Մարկուարտը եւ այլոք նոյնացնում են Արեւաբանոս քաղաքի հետ (Հայաստանի եւ յարակից շրջանների տեղանունների բառարան, հտ. 1, էջ 665):

74 Սրբոյ հօրն մերոյ Մովսէսի Խորենացոյ Մատենագրութիւնք, Վեներտիկ, 1843, էջ 294-295:

75 Ալիշան Ղ. Ղ. Տեղագիր Հայոց Մեծաց, Վեներտիկ, 1855, էջ 53:

վանքը... Քիչ մը յառաջ գալով կը տեսնենք այն բազմաքար ըսուած տեղը, ուր մեծամեծ քարեր դիզուած են. ասոր վրայի լեռն է Գրգուռը, յոր ապաստանեցան դեւքն եւ ապա հալածուեցան շնորհիւ Ս. Խաչին՝ ի ձեռն Բարդուղիմէոսի առաքելուն... վանից Արեւելեան լեռ իւր ստորոտին մերձը ապառած մը ունի, զոր Դարբնաքար կը կոչեն կամ Դիւաց քար...»: Ըստ Սրուանձտեանցի՝ վանքի սրբազան մասունքներինց էին Քրիստոսի Գեղարդը, Սուրբ նշան Կենաց փայտը, Սուրբ Գէորգ զօրավարի մատը: Վանքն ինքը շատ համբաւաւոր էր, ուր գալիս էին մեծաթիւ ուխտաւորներ⁷⁶:

Ըստ Խորենացու պատմութեան՝ III դարում Արտագում⁷⁷ է գիշերել Գրիգոր Լուսաւորչի հայրը՝ Անակ պարթեւը, «մի դաշտավայր տեղ, որտեղ յայտնուեցին մեր մեծ եւ սուրբ Թաղէոս առաքեալի նշխարները... նրա գիշերելու տեղը խորանի ներսի դին, պատահեց սուրբ առաքեալի գերեզմանի մօտ անկողինը, եւ ասում են, այստեղ է յղուեթիւն առել մեր սուրբ եւ մեծ Լուսաւորիչը»⁷⁸: Յետագայում Անտիոքի եպիսկոպոսին ուղղուած նամակում Ստեփանոս Օրբէլեանն է գրում. «բնակչաց Հայաստան աշխարհիս ...վերայ եղաւ հեղումն արեան առաքելոյն Բարթողոմէոսի եւ Թաղէոսի... Որպէս ի գալն Անակայ ի Հայք, աւթեւան

եղեւ ի վկայարանի սրբոյ առաքելոյն Թաղէոսի, եւ ննջելն ի կնոջն իւրում եղեւ ընձայումն յղութեան մերոյ Լուսաւորչին, եւ ըստ շնորհաց Հոգւոյն սրբոյ որչի տուր առաքելոյն Թաղէոսի, եւ փոխանորդաց զնորին առաքելական աթոռ երիցս երանելին Գրիգորիոս...»⁷⁹:

X դարից շատ տեղեկութիւններ կան Նախիջեւանի Աստապատ գիւղի մօտ գտնուող «Մաղարթայ վանքի» մասին, որը, ըստ Ստեփանոս Օրբէլեանի, կառուցել է Բարթողիմէոս առաքեալը եւ եկեղեցու հիմքում պահել Իսրայէլից բերուած երեք մանանա⁸⁰: Մաղարթայի վանքը ծանօթ է նաեւ «Մաղարթայ Ս. Ստեփաննոս նախավկայի վանք» անունով⁸¹, չնայած յայտնի են նաեւ Կարմիր վանք, Քարատակի վանք, Աստապատի վանք անունները: Ղ. Ալիշանը XIX դարի համար գրում է, որ Մաղարթայ լեռան ստորոտում գտնուող վանքի մասին ասում են, որ այն հիմնադրել են Թաղէոս եւ Բարթողիմէոս առաքեալները «եւ ի հիման եկեղեցւոյ ասի եղեալ Ս. Բարդուղիմեայ երիս հաստ մանանայի», ... «եւ շէն եւ պայծառ է տեղիս, ուր ցուցանեն յիշատակս գառաքելոյն Բարթողիմեայ, աղբիւր եւ խաչ երկաթի եւ դրոշմածս խաչածեւս ի վիմի, եւ պարգեւս արքայադուստրս ի Բագրատունեաց»⁸²:

76 Սրվանձտեան Գ., Երկեր, հտ. 2, ՀՍՍՒ ԳԱ հրատ., Երեւան, 1982, էջ 13:
 77 Վասպուրական նահանգի Արտագ գաւառը, ըստ Խորենացու՝ նախապէս Ծաւարշական էր կոչուում: Այն մ. թ. ա. II դարում Արտագ է անուանուել Ալանաց երկրի Արտագ (Արդոգ, Արդոգական) գաւառի անունով, երբ Արտաշէս Ա-ն այնտեղ բնակեցրել է այլան գերիների. «մինչեւ այսօր էլ Արտագ է կոչուում այն աշխարհը, որտեղից նրանք գերուեցին» (Մովսէս Խորենացի, Հայոց պատմութիւն, Թարգմանութիւնը, ներածութիւնը ... Ստ. Մալխասեանի, էջ 101, 118):
 78 Անդ, էջ 138-139:
 79 Միւնեաց եպիսկոպոս Ստեփանոսի պատասխանը Անտիոքի եպիսկոպոսին, Գիրք թղթոց, էջ 323:

80 Ստեփաննոս Օրբէլեան, Պատմութիւն նահանգին Սիսական, Թիֆլիս, Տպ. Ն. Աղանեանի, 1910, էջ 341: Աստապատ (այժմ՝ Աստաքաղ) գիւղի քրիստոնէական բոլոր յուշարձանները՝ Սր. Վարդան, Սր. Աստուածածին, Սր. Գէորգ, Սր. Պօղոս-Պետրոս, Սր. Յովնաննես, Սր. Ստեփանոս (Կարմիր վանք) եկեղեցիները, հսկայական գերեզմանոցները խաչքարերով այժմ ամբողջովին ոչնչացուել են Ադրբեջանի կառավարութեան կողմից:
 81 Քիւրտեան Յ., Ս. Ստեփաննոս նախավկայի վանքը, «Հասկ», Պաշտօնական ամսագիր կարողիկոսութեան Հայոց Մեծի տանն Կիլիկիոյ, Կ. Տարի, 1991, Օգոստոս-Սեպտեմբեր, թիւ 8-9, էջ 403:
 82 Ալիշան Հ. Ղ., Տեղագիր Հայոց Մեծաց, էջ 82:

XII դարի Միքայել Ասորու «Յաղագս քահանայութեան» երկի հայերէն թարգմանութեան մէջ այդ մասին կարդում ենք. «եւ քանզի երեք Առաքեալք մտին ի Հայք, Թադէոս եւ Բարթողոմէոս եւ Յուդայ Յակովբայն. եւ թէպէտ զառաջինն Թադէոս եկն եւ ապա Բարթողոմէոս եւ Յուդայ, այլ զի ոմանք ասեն թէ Թադէոս ի յեւթանասինցն է, վասն այնորիկ դիցուք զլուի քահանայութեան նոցայ զԲարթողոմէոս եւ ապա զԹադէոս եւ ապա զՅուդայ եւ զայլ առաջնորդս ըստ կարգի»⁸³: Առաքեալների թուարկման նոյն հերթականութիւնն առկայ է նաեւ Միքայել Ասորու «Ժամանակագրութիւն» երկի հայերէն թարգմանութեան մէջ. «Զ (6) Բարթողոմէոս յազգէն Իսաքարայ յԱդաւիր գեղջէ, քարոզեաց ի Հայաստանեայս, եւ անդ կատարեցաւ սքանչելի նահատակութեամբ ի յՈւրբանիոս քաղաքի, որ այժմ կոչի Հաղբակ, ի Սանատրկոյ յամբարիշտ եւ յանօրէն թագաւորէն»..., «Ժ (10) Յուդայ որ կոչեցաւ Թադէ. որ վասն իմաստութեան իւրոյ ասէին Ղերէոս, որ է սիրտ եւ հոգի, քարոզեաց ի Հայս եւ յԱսորիս, եւ կատարեցաւ ի Սանատրկոյ ի Հայս...»⁸⁴:

Յովհաննէս Դրասխանակերտցի կաթողիկոսը հայոց կաթողիկոսական դաւադանագրքում գրում էր. «Իրաւունս եւ զայս ես Յովանէս կաթողիկոս Հայոց համարիմ գրով դրոշմել զանուանս հայրապետացն Հայոց զարանց Աստուծոյ, որք արժանի գտան արթոյ սրբոց առաքելոցն Բարդուղիմէոսի եւ Թադէոսի եւ նոցունց հետեւողի սրբոյն Գրիգորի...»⁸⁵:

Հասկանալի է, որ տարբեր քաղաքական իրավիճակներում նաեւ «առաքեալները» կամ նրանց մասին աւանդապատումներն են դարձել քաղաքական ազդեցութիւնների առարկայ: Ինչպէս դիպուկ նկատում է Վ. Թորոսեանը, X-XIII դարերում, օրինակ, Բարթուղիմէոսը հայ-լատինական կրօնա-դիւանագիտական իւրայատուկ յարաբերութիւնների հետեւանքով դարձել է «աւելի կարեւոր առաքեալ»⁸⁶ (չակերտներն իմն են – Ղ. Խ.): Բնական է, որ այդպիսի շրջաններում նրանք դառնում են ժամանակի մտաւորականների սեւեռուն ու շաղրութեան առարկան:

XIII դ. կէսերին, երբ Կիլիկիայում ստեղծուած հայկական թագաւորութիւնը սերտ կապերի մէջ էր Եւրոպայի երկրների եւ Մերձաւոր Արեւելքում ստեղծուած իսաչակիրների, ինչպէս նաեւ մոնղոլական իշխանութիւնների հետ, իսկ հայկական կաթողիկոսութիւնը հաստատուել էր Հռոմկլայում, Հռոմի պապը 1246 կամ 1228 թ. յատուկ գրութեամբ Կիլիկիայի Հեթում առաջին թագաւորին առաջարկում է դաւանանքով միանալ կաթոլիկ աշխարհին. քանի որ Կաթոլիկ եկեղեցին հիմնադրել է Քրիստոսի սիրեցեալ Պետրոս առաքեալը, ուստի, ըստ պապի, բոլորը պարտաւոր են ճանաչել նրա յաջորդը համարուելու պապի գերիշխանութիւնը: Այդ կապակցութեամբ Հեթում թագաւորը հարցում է անում կաթողիկոս Կոնստանդին Բարձրբերդցուն, որի պատասխանը⁸⁷ շարադրել է Վարդան Արեւելցին այսպէս. Քրիստոսի 12 առաքեալները համահաւասար պատիւ եւ իշխանու-

83 Ժամանակագրութիւն Տեառն Միխայիլի Ասորոց պատրիարքի, Յերուսաղէմ, 1871, էջ 82:
 84 Անդ, էջ 147:
 85 [Յովհաննու կաթողիկոսի Դրասխանակերտցոյ] Ծարից հայրապետացն Հայոց յայտարարութիւնք, Գիտա-քննական բնագիրը՝ Գ. Տէր-Վարդանեանի, «Մատենագիրք Հայոց», հտ. ԺԱ, Ժ դար, Անթիլիաս, 2010, էջ 602:

86 Թորոսեան Վ., Սուրբ Բարդուղիմէոս առաքեալի աւանդույթը հայ-լատին եւ հայ-բիզանդական եկեղեցական յարաբերութիւնների համատեքստում (X դ. – XIII դ. կէսեր), «Հայոց պատմութեան հարցեր», 2(27), 2023, էջ 24-47:
 87 Թուղթ Կոստանդնուպոլսի կաթողիկոսի հայոց, զոր գրեաց առ Հեթում թագաւորն..., Գիրք թղթոց, էջ 503-509; Ժամանակագրութիւն Տեառն Միխայիլի Ասորոց պատրիարքի, էջ 32:

Թիւն են ունեցել, եւ Հայաստանում էլ առաքեալներ եղել են թէ՛ 12-ից, թէ՛ 70-ից, ըստ այդմ ճիշտ կը լինի, որ Հայաստանի դէպքում նրանց յիշեն⁸⁸: Ակադեմիկոս Լեւոն Խաչիկեանը գրում է, որ Կոնստանդին Բարձրբերդցի կաթողիկոսը շատ էր կարեւորում այն հանգամանքը, որ Հայաստանեայց եկեղեցու հիմքերը դրել են Բարթողիմէոս ու Թադեւոս առաքեալները, որոնք իրենց վախճանը գտել են Հայաստանի Արտազ գաւառում: Կաթողիկոսական պաշտօնական թղթերում նա իր տիտղոսից «Մառայ Քրիստոսի եւ շնորհօք նորին կաթողիկոս Հայոց»-ից յետոյ աւելացնում էր «ընդ իշխանութեամբ գաւազանի սրբոցն առաքելոցն Թաթէոսի եւ Բարթողիմէոսի» լինելու պարագան⁸⁹: Ըստ Լ. Խաչիկեանի ուշագրաւ քննութեան հէնց այդ շրջանում է կաթողիկոսը յղանում Արտազում դեռեւս մահմեդականութիւն չընդունած մոնղոլների իշխանութեան կենտրոն Ատրպատականում Հայ Առաքելական Եկեղեցու նոր թեմ ստեղծել եւ վերաշինել Թադէոս առաքելի վանքը՝ անշուշտ կանխատեսելով *Յակոբ Գրեկ հարեւան հարգոյն Սիւնիքի եւ Վասպուրականի թեմերի հոգեւոր առաջնորդների հետ հնարաւոր բարդ յարաբերութիւնները*⁹⁰: «Արտազի կարեւորութիւնն» ընդգծելը, թերեւս, «ստիպում է», որ այդ նոյն XIII դարավերջին Սիւնիքի մետրոպոլիտ Ստեփանոս Օրբէլեանը (1287-1303) գրի, որ առաքեալները Սիւնիքում յայտնուել են աւելի շուտ, քան Հայաստանի միւս գաւառներում, եւ մանրամասնի նաեւ Բարթողիմէոսի գործունէութիւնը Սիւնիքում. «Ձրոյցք հին ժամանակաց, որ վասն գալոյ սուրբ Առաքելոյն Բարդուղիմէի յաշխարհս Սիւնեաց, եւ վասն շինելոյ եկեղեցի ի գաւառին Գողթն, եւ դարձուցանելոյ ի հաւատս զմեանքս, եւ հաստատելոյ

սեղան եւ ձեռնադրելոյ Եպիսկոպոս». նաեւ թէ ինչպէս «...ի դառնալն Բարդուղիմէոսի ի Պարսից անցեալ ընդ գետն Երասխ՝ մտանէ ի սահմանս Սիսականու, եւ սկիզբն արարեալ քարոզչութեան յՈրդուատ [այժմ՝ Օրդուբադ պատմականօրէն Մեծ Հայքի Վասպուրական նահանգի Գողթն գաւառում – Հ. Խ.] գէօղ եւ Արեւիս գաւառ [Սիւնիքի ամենահարաւային գաւառը, ներկայիս Մեղրու շրջան – Հ. Խ.] ի տունն Բաղաց [ներկայիս Կապանի շրջանը – Հ. Խ.] եւ ի Գողթն [գաւառ Վասպուրական նահանգի հիւսիս-արեւելքում, ներկայիս Օրդուբադի շրջան, երբեմն ընդգրկուել է Սիւնիքի կազմում]...»: Առաքելը Գողթնում եկեղեցի է շինում Տեառնընդառաջ անունով, եւ այստեղ եպիսկոպոս է նշանակում Կումս անունով աշակերտին: Վանանդ գիւղում (այժմ նոյնպէս Վանանդ, Օրդուբադի շրջանում), որտեղ վախճանւում է նրա Լուսիկ անունով աշակերտը, նրա գերեզմանին մատուռ է շինում: Այնուհետեւ մի բազին հեթանոսական տաճար է կործանում եւ նրա տեղը կառուցում է սուրբ Թովմայ անունով եկեղեցի⁹¹: Կումս եպիսկոպոսի մահից յետոյ նրա մարմինը թաղել են այդ եկեղեցու մերձակայքում եւ վրան մատուռ են կառուցել Կումսի կամ Ամենափրկիչ անունով: Այս ամենը, ի հարկէ, ուղեկցւում է հրաշքներով՝ հիւանդների առողջացմամբ եւն: Մէկ այլ հատուածում Ստեփանոս Օրբէլեանը գրում է. «Սուրբ, անբիծ, անարատ եկեղեցիս Հայոց՝ անբասիր եւ անշաղախ հարսնս երկնաւոր Փեսային, տնկեալս եւ հիմնադրեալս է սրբոց առաքելոցն Թադէոսէ եւ Բարդուղիմէոսէ...»⁹²:

Ստեփանոս Օրբէլեանի համար պէտք է որ ծանր լինէր Արտազի Թադէոսի վանքը Առաքելոց վանք անուանելու արմատացող սովորոյթը, յատկապէս Արտազի թեմում

88 Թողոթ Կոստանդինայ կաթողիկոսի հայոց, էջ 504:
 89 Խաչիկեան Լ., Արտազի հայկական իշխանութիւնը եւ Մործորի դպրոցը, - «Բանբեր Մատենադարանի», թիւ 11, Երեւան, 1973, էջ 133:

90 Ա.Աղ., էջ 134:
 91 Պատմութիւն Ասիական Սիսական, էջ 21:
 92 Ա.Աղ., էջ 480:

Զաքարիա եպիսկոպոսի կառավարման շրջանում, ով մեծ քաղաքական կշիռ եւ հեղինակութիւն ունէր, ի թիւս այլոց, նաեւ Առաքելոց աթոռի հեղինակութեամբ⁹³: Ինչպէս գրում է Լ. Խաչիկեանը, «Զաքարիան իրեն համարում էր հիմնականում Թադէոս առաքեալի յաջորդը, բայց ըստ հարկի պճնւում էր նաեւ Բարթոլղիմէոսի եւ Սիմոնի հեղինակութեամբ, կոչուելով նաեւ առաքելոց եպիսկոպոս»: Սիւնեաց թեմի առաջնորդ Ստեփանոս Օրբէլեանը պէտք է որ ինքն իրեն Առաքելական աթոռի շարունակող համարէր Բարթոլղիմէոս առաքեալի գործունէութեան հետեւանքով եւ իրեն կողոպտուած զգար «Բարթոլղիմէոսի աթոռին» նոյնպէս յաւակնող Զաքարիայի կողմից: Բայց ամեն ինչից զատ Զաքարիան միացել էր «կաթոլիկական կուսակցութեանը», այսինքն՝ Կիլիկեան Հայաստանում ամրացած «լատինասէր» քաղաքականութեան կողմնակից կաթողիկոսների, բարձրաստիճան հոգեւորականների ու աշխարհիկ իշխանութեան ներկայացուցիչների խմբին, եւ նոյնիսկ ընդունել էր կաթոլիկութիւնը, իսկ Օրբէլեանն ինքը եւ առհասարակ Սիւնեաց եպիսկոպոսներն արմատական դիրքորոշում ունէին ազգային եկեղեցու աւանդոյթները պահպանելու հարցում:

Իսպանացի դոմինիկեան հոգեւորական, միսիոներ ժողովին դէ Սեւերակը 1320 թ. Հնդկաստան գնալու ճանապարհին անցել է Հայաստանով, եղել է նաեւ Արտազում եւ գրել հետեւեալը. «Մեծ Հայքը շատ է տառապել: Այստեղ տառապալի վախճանով նահատակուել են երեք առաքեալներ Բարթոլղիմէոսը, Սիմոնը եւ Յուդանը⁹⁴: Տեսել եմ այն գնդանը, որտեղ տանջուել են

Սիմոնը եւ Յուդան, եւ աղբիւրները, որոնք առաքելական գաւազանով ժայթքել են կենդանի քարից: 8, 10, 17 անգամ գաւազանը կպել է քարին, եւ հիմա այստեղ այդքան էլ աղբիւրներ կան, եւ դրանց մօտ կառուցուած է մեծ եւ գեղեցիկ եկեղեցի»⁹⁵: (Խօսքը Արտազի Ա. Թադէոս եկեղեցու մասին է – Լ. Խ.): Ակնյայտ է, որ տարածքում ակտիւորէն պատմւում եւ տարածւում էին առաքեալների մասին աւանդազրոյցները, դրանք դառնում էին քաղաքական ծրագրերի հիմնաւորումներ, առաքեալների անցած վայրերը ուխտավայրեր, տարածքի վերաբերեալ ժողովրդական գիտելիք, նոյնիսկ պոէզիայի նիւթ:

Բարթոլղիմէոսի Հայաստանեան առաքելութիւնը, մասնաւորապէս նաեւ այդ առաքելութեան դրուագները Աղբակ գաւառի «Հոգեաց վանքում» եւ Բարմայ-Ուրբանիս քաղաքում «որ այժմ Աղբակ կոչի», ներկայացնում ու գովերգում է XVI-XVII դդ. վանեցի բանաստեղծ Ներսէս Մոկացին «Ներբողէան Վիպասայ[նա]կան ի փոխումն Աստուածածին Կուսին եւ յաղագս պատկերին սրբոյ, որ բերեալ յանգուցաւ [տ]եսչութեամբ Հոգոյն ի սահմանս Անձեւացեաց, ի տեղին կոչեցեալ Հոգոց Վանք»⁹⁶: Մոկացին ներբողեանում ներկայացնում է Բարթոլղիմէոսի Հնդկաստանից յետոյ Հայաստանի ընտրութեան կարեւորութիւնը, որպէս «Հոգու տնօրինութիւն», թուարկում է Հայաստանի այն վայրերը, որտեղ նա գործել է, ում վրայ ազդել է:

Այն ինչ Հոգոյն տնօրինեալ
 Բարդուղիմէոս յետոյ հասեալ՝
 Այն որ ի Հայս շրջագայեալ
 Եւ ընդ Թովմայի Հնդիկն գնացեալ:

93 Խաչիկեան Լ., Արտազի հայկական իշխանութիւնը եւ Մործորի դպրոցը, էջ 146:

94 Յուդան Թադէոս առաքեալի միմչառաքելական շրջանի անունն էր:

95 Журден де Северак. Описание чудес. После Марко Поло. Путешествие в страны трех Индий, Москва, «Наука», 1968, с. 137.

96 Ներսես Մոկացի, Բանաստեղծութիւններ, Աշխատասիրութեամբ՝ Ա. Դոլուխանեանի, Եր.: Սովետական գրող, 1985, էջ 77-143:

Առեալ ի սոսք մեծի նստէր
 Եւ եղկելով գանձն կոծէր,
 Յողջոյն սուրբ մօրըն փափաքէր,
 Ընդ օրհնութիւնս տոչորէր:

Կրկին ի սոսք նա մտանէր,
 Որ եւ մարմնոյն ոչ ժամանէր,
 Խղճի մտացն աւաղէր
 Եւ անձամբ գանձն ըստգտանէր:

Վասն այս էր սոսք **Բարդուղէմիւն**,
 Զի լուսւոյ գօրհնէրգութիւն,
 Զոր հնչէին դասք սրովբէին
 Եւ ոչ զդին ի տապանին:

Մինչ ի Հոգոյն բան ազդեցաւ՝
 Գնդին սրբոյ յայնժամ ցուցաւ,
 Նշխար փայտին, որ շնորհեցաւ՝
Բարդուղիմայ վիճակեցաւ:

Ետուն նմա մխիթարիչ,
 Առ ընկալաւ իբր սփոփիչ,
 Երկրպագեաց սուրբ համբուրի
 Զտրտմութեանցն ապաքինիչ:

Անդրէն յօփունց ախտաժեռաց
 Հրէաստանէն եւ որք յեկաց,
 Անդորրութիւն գտան վշտաց
 Սուրբ պատկերէն եւ յօժանաց:

Ապայ զեղբարըն ողջունեալ,
 Ընդ արեւելս կրկին դիմեալ,
Ի վիճակն պարտ էր գնալ,
Յոր Սանատրուկ զԹաղէ սպանեալ:

Զանդրժելի գանձն բարձեալ
 Ընդ միջերկրայս տարակացեալ,
 Զվիճական այնու զանցեալ
 Ընդ մոգաստանս գնայր դարձեալ:

Մինչ ի քաղաքն Խորասան
 Աթոռ նոցայ արհայութեան,
 Ուր եւ շիջոյց զկրակարանն
 Եւ լոյս կանգնեաց հրոյն փոխան:

Եւ զլուսատուն մարդկան հոգոց
 Արեգականն ընդդէմ կացոյց՝
 Զակն լուսոյ այս փորուածոյս
 Երէք ժամաւ խաւարեցոյց:

Բայց ապառաժն անպտղական
 Ոչ անեցոյց ըստ սուրբ սերման,
 Միայն իւրից որք ընտրեցան
 Եւ ի նմանէ մկրտեցան:

Նոսօք դառնայ ի նոցանէ,
 Կրկին ի Հայս դարձեալ դիմէ,
 Ի Գողթ գաւառն մտանէ,
 Զբագումս ի Տէր դարձուցանէ:

Զանբիծ հաւատն անդ հաստատեաց,
 Զարսն նոցայ զլուխ կարգեաց,
 Առեալ գոմանս, որք ի կանանց,
 Եկեալ յերկիրն Անձեացեաց:

Առ ի համբաւ քարի միոջ,
 Յոր էր աղուէսն ամրացեալ յօրջ,
 Ընդ Անահտայ բնակէր տիկնոջ՝
 Մարդախոշոշ կոանագոջ:

Քանզի փայլակն ի վայր անկեալ,
 Ի Դարբնաց քարս արկեալ,
 Զդեղն, որ կազմէր ախտի խառնեալ,
 Յուռութ ուրունս մակարդացեալ:

Որպէս եւ նառն պատմական
 Ուսուցանէ մեզ միաբան
 Եւ զվիշապին հին մեհենայն
 Կիպրիանոս այր սրբագան:

Զի հին վիշապն անդ բունէր
 Եւ կոանին համաձայնէր.
 Բախմամբ թնդմանն ան արկանէր,
 Զնոսայ յուշոյ միշտ խափանէր:

Իսկ արք տեղոյն զերդ խելագար
 Անդ խոնէին դեգերաբար,
 Թարախածոր առեալ ծրար
 Եւ կոչէին Դարբընաբար:

Յայս վայր հասէալ առաքելոյն
 Փութով խափան առնէր գործոյն,
 Դարբնական բախման թընդոյն,
 Որ գործօնեայք էին նիւթոյն:

Եւ զդիցամայրն խորտակեաց,
 Զբոնութիւն քակեալ դիւաց,
 Քարանձաւէն յայն հալածեաց
 Եւ սրբութեան տեղիք գործեաց:

Իսկ չար զինուորին գունդ առնէին
 Ընդ հիսիսի բարձրու լերինն,
 Վիրգս ի վիմացն յայն հոսէին,
 Ընդ այն եւ ճիշս արձակէին:

Բարդուղիմէայ զայն տեսանէ,
 Բարձրասանդակ լեառն ելանէ,
 Խաչ փոքրիկ անդ օծանէ,
 Քարի մի զփաջին արտահանէ:

Չոր եւ յետոյ սուրբն Գրիգոր
 Չարձանն առեալ պահէր ընդ իւր,
 Մինչ Տրդատայ մահուանն յատր
 Երեսին եղ պսակատր:

Կանգնէ եւ անդ կրկին նշան
 Յստորոտով լերինն յայն,
 Կարկառակոյտ մի սուգական
 Ձեռնադրեալ ի մեծ արձան:

Եւ է տեղին յոյժ լեռնափակ,
 Պատեալ վիմօք երկնադիտակ,
 Իսկ մէջ ծոցոյն հարթայտակ,
 Հոսանահերձ վիսափտակ:

Զի Տիգրիսին մեծի կայլակ,
 Որ յԱդեմայ քառորդ վտակ,
 Յասմամբ խաղայ միշտ համարձակ
 Ընդ գոգ հովտին արագ-արագ:

Մերձ Կանգուար մեծ ամրոցին,
 Որ Ագռաւոց քար կոչէին,
 Ուստի լեռանցն շուրջ հոսէին
 Եւ գետանան ընդ գարնան մասին:

Գայ գառիվայր առապարին,
 Անցեալ ընդ հիմն տանարին,
 Ընդ արֆային շիրմով պարին,
 Ապա ի մի խառնեալ յարին:

Հիմն արկանէ անդ հաւատոյ
 Ընդ խորանին կառուցելոյ,
 Շինեալ յանուն Կուսին հոգայ
 Եւ պատկերին, որ անդ սրբոյ:

Արդ առաքեալ Բարդուղիմին
 Կառուցանէ իւրով ձեռին,
 Փոքր ձեռով զեկեղեցին
 Եւ անուանէ Աստուածածին:

Զտեղին Հոգաց վանք անուանէ
 Եւ ի բլերս կանայս յանձնէ,
 Խրեիք փոքրիկ նոցայ շինէ
 Եւ ի դերբուկս բաժանէ:

Կացուցանէ զփոյրն Յուսահատայ՝
 Մայրապետ կրօնից՝ գլովս նոցայ,
 Զփոյրն Օրմզդայ եւ Մաքովտայ
 Եւ զայլ կանայսն յետ նոցայ:

Եւ ինքն ի Հայս դարձեալ երթայ
 Ի յՈւրբանիս քաղաք Բարմայ,
 Որ այժմ Աղբակ կոչի նորա
 Յովբիանոս անուանի նա:

Վասն սրբոյ առաքելոյն,
 Որ չարչարեալ եղև ի նոյն,
 Քրով հարեալ յեկարագոյն,
 Ըստ այսմ կոչի անուն տեղոյն:

...

Իսկ Մարիամ առանձնացեալ
 Քոյր Յուսահատայ՝ Յուսկանն կոչեցեալ,
 Յայն կոյս գետինն մեծի անցեալ,
 Առ ոտս փոքու վիմի կացեալ:

... Ինքն հետեւեալ սրբոց յետոց,
 Շինեալ խրեիք աղօթանոց,
 Գագաք վիմին ամրակառոց,
 Որ եւ կոչի քար Գարբնոց:

.....

Այնուհետեւ բանաստեղծը պատմում է, որ Հոգեաց վանքը Սուրբ Աստուածածնի շնորհիւ շարունակուած է բուժել հիւանդներին, եւ փառաբանում է նրան:

Վասպուրականի Աղբակ գաւառը եւ Աղբակի վանքը, որտեղ, ըստ աւանդութեան, նահատակուել ու թաղուել է Բարթողիմէոս առաքեալը, XVI-XVII դդ. շարունակուած էր լինել ժողովրդական սիրուած ուխտավայր: 1647 թուականին Սուրբ Բարթողիմէոսի վանքը եւ Վարագավանքը ընդհանուր միաբանութիւն են կազմել: XIX դարում վանքում բացուել է վարժարան, վանքի թեմն են կազմել Աղբակ, Գաւառ, Զուլամերիկ, Սալմաստ եւ

Ուրմիա գաւառները՝ 100-ի հասնող հայաբնակ գիւղերով: «Հոգեաց վանքը» XIX դ. կէսերին, չնայած հայ բնակչութեան նուազմանը, դեռ գործում էր որպէս կարեւոր ուխտատեղի: Ղ. Ալիշանի տեղեկութեամբ՝ «Անձեւացեաց գաւառում... կայ անուանի եւ հին ուխտատեղի Հոգուաց վանք շինեալ ի Բարթողիմէայ առաքելոյ ի պատիւ Վերափոխման Տիրամօրն, զորոյ եւ զպատկեր փայտեայ զձեռագործ Յովհաննու Աւետարանի՝ եղ ի նմա, եւ ցարդ թուի լինել անդ»⁹⁷: XIX դ. 60-ական թթ. Գարեգին Սրուանձտեանցն այցելել է գործող վանքը եւ գրել. «...Վասպուրական նահանգի ութերորդ գաւառն է Անձեւցիք, որուն մէջն է Հոգուոց վանքը... Քիչ մը յառաջ գալով կը տեսնենք այն բազմաքար ըստած տեղը, ուր մեծամեծ քարեր դիզուած են. ասոր վրայի լեռն է Գրգուռը, յոր ապաստանեցան դեւքն եւ ապա հալածուեցան շնորհիւ Ա. Խաչիճի՝ ի ձեռն Բարդուղիմէոսի առաքելոյն... Վանից Արեւելեան լեռ իւր ստորոտին մերձը ապառաժ մը ունի, զոր Դարբնաքար կը կոչեն կամ Դիւաց քար...»: Ըստ Սրուանձտեանցի՝ վանքի սրբազան մասունքներից էին Քրիստոսի Գեղարդը, Սուրբ նշան Կենաց փայտը, Սուրբ Գէորգ զօրավարի մատը, վանքն ինքը շատ համբաւաւոր էր, ուր գալիս էին մեծաթիւ ուխտաւորներ⁹⁸: 1915 թ. հայերի Յեղասպանութիւնից յետոյ շրջատարածքը լիովին հայաթափուել է. Վանքից այժմ մնացել են աւերակներ:

1734 թ. Կ. Պոլսում հրատարակուած է Թովմայ Ագուլեցու Պատմութիւնը, որում՝ «Վասն գնալոյ սրբոյ առաքելոյն Բարդուղիմէոսի ի յԱգուլիս եւ վասն գնոսայ լուսաւորելոյն եւ զամենագով վանքն նոցայ շինելոյն յանուն սրբոյ առաքելոյն Թումայի» բաժինը մասամբ կրկնում է երկու առաքելների գործունէութիւնը Մեծ Հայքում,

այդ թւում՝ Բարթողիմէոսի քարոզչութիւնը մասնաւորապէս Ագուլիսում: Այստեղ հեղինակը գրում է, որ Թովմաս սուրբ առաքելը Հնդկաստանում քարոզչութեան ընթացքում իմանում է, որ Մեծ Հայքի յատկապէս երկու գաւառ ծածկուած են կռապաշտութեան քօղով: Տիրում է, որ Հայկից սերուած զարմը չի ճանաչում Աստուծոն: Նամակ է գրում այդ ժամանակ Պարսկաստանի Խորասանում քարոզչութեամբ զբաղուած Բարթողիմէոսին եւ խնդրում, որ նա շտապի մեկնել Գողթան գաւառ եւ համայն կոտ Հայաստան: Բարթողիմէոսն իսկոյն անցնում է Երասխ գետը եւ Յորտըվար քաղաքում (ներկայիս Օրդուբադ – Հ. Խ.) սկսում լուսաւորել մարդկանց: Եկեղեցի է կառուցում, որն այժմ պարսից ազգի մօտ է եւ նրանք որպէս մզկիթ են օգտագործում, գրում է Թովմայ Ագուլեցին: Ապա փառաւոր տաճար է կառուցում, եւ որովհետեւ տեղեկութիւն է ստանում, որ Թովմայ առաքելը Հնդիկների մօտ նահատակուել է, վանքը կոչում է Թովմայի անունով: Կոմս անունով առաքելին տեսուչ է կարգում, իսկ նրա մահից յետոյ մարմինը թաղում է տաճարի մօտ, եւ Ամենափրկիչ է անուանում: Այստեղ շատերին բժշկելուց յետոյ Բարթողիմէոսը գնում է Վանանդ, եկեղեցի կառուցում, ողջ քաղաքը լուսաւորում: Բարթողիմէոսը Արարատեան Մեծ Հայքում, այդ թւում Նախիջեւանի Գողթան երկրում շատ եկեղեցիներ է կառուցում, Արտաշատում խաչ է կանգնեցնում⁹⁹: Այնուհետեւ հեղինակը սկսում է Թովմայ առաքելի փառաբանութիւնը:

1784 թ. Վենետիկում հրատարակուած է Միքայէլ Չամչեանի «Պատմութիւն Հայոց» գրքի առաջին հատորը, որում վարդապետն անդրադառնում է նաեւ Բարթողիմէոս առաքելին: Ըստ այս շարադրանքի՝

97 Ալիշան Հ. Ղ., Տեղագիր Հայոց Մեծաց, էջ 53:
 98 Սրվանձտեան Գ., Երկեր, հտ. 2, Երեւան, ՀՍՍՌ ԳԱ հրատ., 1982, էջ 13:

99 Թովմայ Ագուլեցի, Պատմութիւն Թովմայի Առաքելոյն, Կ. Պոլիս, Տպ. Մարտիրոս Սարգսեանի, 1734, էջ 54-63:

[Թաղէոսից յետոյ] Հայաստան եկաւ Բարթոլղիմէոս առաքեալը՝ իր հետ բերելով արդէն մահացած Տիրամօր փայտաքանդակ պատկերը, որի զօրութեամբ հալածում էր դեւերին: Այդ գործը շատ նկատելի էր յատկապէս Դարբնաց քար կոչուող վայրում, որտեղ կար Անահիտ չաստուածուհու կուռքը: Այստեղ առաքեալը կանգնեցրեց մի խաչ եւ գետի ափին կառուցեց Սբ. Աստուածածին անուկով եկեղեցի: Այնուհետեւ այդտեղ թողնելով իր աշակերտներին՝ ինքն աւետարանում էր Ստորին Հայքում, որտեղ շատերին հաւատի բերեց, այդ թւում Թագաւոր Սանատրուկի Թագուհի անուկով քրոջը եւ հազարապետին: Այս լսելով՝ Սանատրուկը Արեւաբանոս քաղաքում սպանեց ու մաշկահան արեց Բարթոլղիմէոսին, մի վայրում, որը յետոյ կոչուեց Բարթոլղիմ, իսկ աւելի ուշ՝ Աղբակ¹⁰⁰, եւ նրա մարմինն այնտեղ թաղեց: Ժամանակ անց մարմինը տեղափոխուեց մարտիրոսների քաղաք՝ Նփրկերտ¹⁰¹ (ներկայիս Թուրքիայի հանրապետութեան Դիարբեքիր վիլայեթի Սիլուանի գաւառ – չ. Խ.):

1874 թ. Վենետիկում հրատարակուած «Վարք եւ վկայաբանութիւնք սրբոց: Հատընտիր քաղեալք ի ճառընտրաց» ժողովածոյի Ա հատորի 200-211 էջերում ներկայա-

ցուած է «Վկայաբանութիւն սրբոյն առաքելոյն Բարդողոմէոսի» բնագիրը: Այն վաղուց դասականացուած պատմութիւնն է. Քրիստոսի 12 առաքեալների հետ միասին երուսաղէմում Սուրբ Հոգու կողմից Բարթոլղիմէոսը ստանում է ցաւերից, հիւանդութիւններից բուժման եւ սատանայի հալածանքներից մարդկանց ազատելու շնորհ, եւ գնում է իրեն վիճակ ընկած երկրներն ու ժողովուրդներին լուսաւորելու, դարձի բերելու եւ մկրտելու: Թովմայ առաքեալի հետ գնում է նախ՝ հնդկների սահմանի մօտի Եդեմ քաղաքը, որտեղ յաջողութեամբ ապացուցում է քրիստոնէութեան ճշմարտացիութիւնը, շատերին դարձի է բերում: Այստեղից գնում է «ի կողմս Մարաց եւ Ելիմացւոց», բայց այնտեղ անյաջողութեան է մատնւում. «ոչ կարացաւ անդ կատարել զօրութիւնս»: Սակայն տեղում ոմանք միանում են Բարթոլղիմէոսին եւ նրա հետ միասին գնում «ի Բուստր քաղաք Խորին Ասորւոց»: Այստեղ առաքեալը կենդանացնում է մի մահացած պատանու, ինչի հետեւանքով մեծ յաջողութիւն է ունենում, ամբողջ ազգը դառնում է Քրիստոսի հաւատացեալ եւ մկրտում է: Բուստրից առաքեալը գնում է «յաշխարհն Գերմանիկեցւոց»¹⁰², շատերին դարձի բերում, բայց հալածւում է Թագաւորի կողմից: Այստեղից

100 «Աղբակ, Ալբաղ, Ալբան, Ալբանոս, Հաղբակ...-ը» գաւառ էր Մեծ Հայքի Վասպուրական նահանգում՝ Զաւ (Մեծ Զար) գետի վերին աւազանում: Այստեղ էին գտնուում Արծրունի հայ նախարարների իշխանանիստ Հաղամակերտ գիղաքաղաքը եւ Ս. Բարդողիմէոս յայտնի վանքը (տե՛ս Յակոբեան Թ. Խ., Մելիք-Բախշեան Ստ. Տ., Բարսեղեան Յ. Խ., Հայաստանի եւ յարակից շրջանների տեղանունների բառարան, հտ. 1, Երեւան, 1986, էջ 161): Աղբանոս անունով գիղ կար Դերսիմում, Մճնոր լեռան լանջին, Օվանիկի դաշտում (Անդ, էջ 162):

101 Զամչեանց Հ. Միքայէլ, Պատմութիւն Հայոց: Ի սկզբանէ աշխարհի մինչեւ ցամ Տեառն 1784, հտ. Ա, Վեճեակ, 1784, էջ 297-298:

102 Գերմանիկը Մարաշ քաղաքի երկրորդ անունն է՝ Գերմանիկ(է): Մ. Թ. I դարում՝ առաքեալների գործունէութեան շրջանում Մարաշը Կոմագենի

թագաւորութեան կազմում էր: Հռոմէական Տիրերիոս կայսեր Գերմանիկոս անունով զօրապետը 17 թուականին Հռոմէական կայսրութեանն է միացրել Կապարովկիայի, Կոմագենի եւ Կիլիկիայի թագաւորութիւնները: 18 թուականին նա Հայաստանի թագաւոր է կարգել Պոնտոսի Պոլեմոն թագաւորի որդի Զեռոնին (որին հայերը վերանուանել էին Արտաշէս): Մարաշ-Գերմանիկէն, հայերից գատ, զգալի քանակութեամբ ասորի եւ հրեայ բնակչութիւն ունէր: Բիզանդական կայսր Յուստինիանոսի կողմից հակաքաղկեդոնական լինելու պատճառով արքայազն Եպիսկոպոսներից մէկն էր՝ «Թոմաս Գերմանիկիոյ, որ է Մարաշ» (տե՛ս Ժամանակագրութիւն Տեառն Միհայիլի Ասորւոց պատրիարքի, էջ 220): Մարաշի շուրջը ընդհուպ XX դարի սկզբները մեծ քանակութեամբ ճգնարաններ կային, որոնք վկայում են քրիստոնէականի դէմ հալածանքների

գնում է «յերկիրն Պարթեւաց եւ Մարաց եւ էլիմացւոց», կարողանում է մարդկանց լուսաւորել: Ապա «եւ անցեալ գնաց ի Գողթն գաւառ Հալոց», որտեղ շատերին է մկրտում: Այստեղից գնում է Հայոց Հէր եւ Զարեանդ գաւառները, լուսաւորում է ու մկրտում: Այնուհետեւ «ինքն գնացեալ եկն Յուրբիանոս քաղաք Հալոց», շատերին բժշկում է եւ մկրտում, այդ թւում թագաւոր Սանատրուկի քոյր Ոգուհուն... Զայրացած թագաւորը Տերետիոս անունով հազարապետին ուղարկում է առաքեալին իր մօտ բերելու, բայց հազարապետը դառնում է Բարթողիմէոսի հետեւորդը: Թագաւորը հրամայում է առաքեալին ու նրա հետեւորդներին ձերբակալել, եւ երբ նրանց բերում են, Բարթողիմէոսին դաժանաբար խոշտանգում են եւ նա վախճանւում է, իսկ Ոգուհուն, հազարապետին ու դարձի եկած այլ հետեւորդների սպանում են սրով¹⁰³:

Սարգիս Զալալեանցը 1850-ական թթ. իր շրջագայութեան ժամանակ երկու առիթ է ունեցել «Հանդիպելու» Բարթողիմէոս առաքեալի յիշատակներին, որոնցից մէկը Արցախում, Աւետարանոց գիւղում, միւսը Սիւնիքում. «եկայ Աւետարանոց գիւղաքաղաք, որը գտնւում է Արցախ աշխարհի Վարանդայ նահանգում, մի բլրի գառիվայր ստորոտին... Այստեղ կայ նաեւ Թաղէոս եւ Բարդուղիմէոս առաքեալների նշխարների մասունքներ[ով] [տուփ], որոնց վրայ գրուած է. «այս սուրբ նշխարատուիդ Թաղէոս եւ Բարդուղիմէոս առաքեալների յիշատակն է. ՌՃԾ (1150) թուին»¹⁰⁴: Աւետարանոցի Սուրբ Աստուածածնի եկեղեցում XIX դարավերջին «առաջին լուսաւորիչներ Թաղէոսի եւ

Բարդուղիմէոսի» մասունքերը տեսել է նաեւ Մակար Բարխուդարեանցը¹⁰⁵: Բարթողիմէոսի մասունքները նա տեսել է նաեւ Շուշիի Ագուլեցւոց Սուրբ Աստուածածին եկեղեցում Կենաց փայտի, Ղուկաս եւ Փիլիպոս առաքեալների, Ս. Պանդալիոնի, Գրիգոր Լուսաւորչի, Յովհաննէս Մկրտչի եւ այլ մասունքների հետ: Նոյն եկեղեցում, յիշուածներից զատ, կային «մի արծաթայ միջակ մեծութեամբ խաչի մէջ զետեղուած Թաղէոս, Բարդուղիմէոս, Թաւմաս առաքեալների եւ ուրիշ սրբոց մասունքներ»¹⁰⁶: Հասկանալի է, որ Հայ առաքելական Եկեղեցու կառույցները մրցակցում էին առաքեալների առհասարակ, ըստ աւանդազրոյցների Հայաստանում քարոզած առաքեալների մասնաւորապէս, մասունքներն ունենալու հարցում:

Սիւնիքում «Աստապատում մեծահրաշ կիրակիին ես կատարեցի սոսկալի խորհուրդը, [այա] ձեռնադրեցի երեք եպիսկոպոս, առաջինը Սպահանցի Գէորգ վարդապետին՝ իրենց առաջնորդ Աստուածատուր վարդապետի եւ իշխանների խնդրանքով, միւսին՝ Սուրբ Բարդուղիմէոս առաքեալի վանքի համար, որ Հորմուս է՝ ըստ այն երկրի եւ վիճակի խնդրանքի», - գրում է Ս. Զալալեանցը¹⁰⁷: Այնպէս որ ներկայիս Ադրբեջանի տարածքում Բարթողիմէոսի մասունքները վաղուց կային, միայն թէ դրանք, ի հարկէ, Բաքու քաղաքում չէին. հայկական Արցախում եւ Նախիջեւանում էին:

XIX դարի հեղինակները տարբեր ձեւերով շարունակում են անգրադառնալ Բարթողիմէոսին: Երուանդ Լալայեանը

շրջանում քրիստոնեաների մեկուսանալու երեւոյթի մասին (տե՛ս Մարաշ կամ Գերմանիկ եւ հետոս Զէյթուն, Երկասիրեց Գր. Հ. Գալուստեան (Կիլիկեցի), Լոնկ Այլընտ սիթի, 1988, էջ 197-199):

103 Վարք եւ վկայաբանութիւնք սրբոց: Հատընտիր քաղեայք ի ճատընտրաց, Վեներտիկ, հտ. Ա, 1874, էջ 200-211:

104 Զալալեանց Ս. եպս., Շահնապարհորդութիւն ի Մեծն Հայաստան, Եր., ԴԱԼԼ, 2016, էջ 433-434:

105 Բարխուտարեանց Մ. եպս., Աղոյանից երկիր եւ դրացիք. Արցախ, Երեւան, «Գանձասար», 1999, էջ 209:

106 Անդ, էջ 235:

107 Զալալեանց Ս. եպս., Շահնապարհորդութիւն ի Մեծն Հայաստան, էջ 497:

գրում է. «Գողթան գաւառը իրաւամբ նախահաւատ է կոչուում, որովհետեւ սա եւ Սիւնիքը ամենից առաջ են ընդունել քրիստոնէութիւնը: Այստեղ քարոզել է Սուրբ Բարդուղիմէոս առաքեալը, գուցէ նաեւ Ս. Թովման: Ատրպատականից գալով՝ Ս. Բարդուղիմէոսը մտել է Գողթն, այստեղ շինել է մի եկեղեցի, որ կոչուել է Տեառն ընդ առաջ, եւ բոլորովին կտրել է Որդուատի վնասակար ջրերը, մկրտել է Շաք իշխանին ամբողջ տնով եւ կարգել է իր աշակերտներից միսին Կուսմին, որից եւ սկիզբ է առել Գողթնի եպիսկոպոսութիւնը: Մինչեւ Սուրբ Լուսաւորչի քարոզչութիւնը Գողթնում յիշուում են Բաբելաս եւ Մուշէ...»¹⁰⁸: Տեառն ընդ առաջ եկեղեցու հիմքերի վրայ, ինչպէս գրում է Ե. Լալայեանը, «այժմ բարձրանում է պարսից գլխաւոր մզկիթը»¹⁰⁹: Նոյնն է հաստատում նաեւ ոռու հեղինակը գրելով, որ Օրդուբազում «Համարեայ բոլոր փողոցներում մզկիթներ կան, բայց մեծ [մզկիթները] միայն երկուսն են: Դրանցից մէկը, ինչպէս ասում են, վերափոխուած է Հայկական եկեղեցուց»¹¹⁰:

Տեղին նշենք, որ ըստ Ղ. Ալիշանի, Բարթուղիմէոսի կառուցած Տեառն ընդ առաջ եկեղեցին հազիւ թէ Որդուատում (Օրդուբազ) գտնուէր, քանի որ նրա կարծիքով, այդ աւանը Գողթնի ծաղկուն շրջանում կամ չկար, կամ աննշան բան էր, իսկ առաքեալի գործունէութիւնը պիտի սկսուէր Գողթնի կենտրոնական բնակավայրում, որը գուցէ հէնց Գողթն էլ կոչուել է¹¹¹:

Ուշագրաւ են Բարթուղիմէոսի անունը յիշատակող հայ ժողովրդական աղօթքնե-

րը: Դրանցից մէկում, օրինակ, որը գրանցուել է Այնթապում, նրա անունը յիշուում է Ստեփանոս նախավկայի, Աստուածածնի, Պօղոս եւ Պետրոս առաքեալների կողքին, բայց Պօղոսը եւ Պետրոսը նոյնականացւում են որպէս կաթողիկոսների առաքեալներ, իսկ Բարթուղիմէոսը որպէս Աղբակի. «Հազարական Ստեփանոս, Հազարումէկ Աստուածածին, Մըջ ֆուսկայց՝ Պօղոս Պետրոս, Հաղբակայ Բարդուղիմոս, Դիարբեքիոյ Սուրբ Կիրակոս, էն գերեզման, ինչ էլաւ լուս Մարմնաւոր արժան անես մեղաւորս»¹¹²: Այս աղօթքն ասւում էր քնելուց առաջ: Ըստ աղօթքը մեկնաբանած Ս. Յարութիւնեանի «Աղօթքում դիմում է արւում սրբերին խնդրելով, ըստ եկեղեցական աւանդութեան, նրանց գերեզմաններին իջած երկնային լոյսի աստուածային զօրութեանն արժանացնեն նաեւ քնողի մարմինը, որպէսզի այն գիշերային խաւարից ապահով մնայ եւ կրկին վերակենդանանայ»¹¹³, քանի որ «քունը ժամանակաւոր մահ է գիտակցուել, իսկ անկողինը գերեզման: Ուստի, ըստ աղօթքի, քնողը իր հոգին ու մարմինը երեկոյեան ի պահ է յանձնում Աստծոն ու հրեշտակներին, մինչեւ առաւօտեան բարի լոյսի ծագումը»¹¹⁴: Այնթապում աղօթքն ասողին աշխարհագրորէն առաւել մօտ էին «Հաղբակայ» Բարթուղիմէոսն ու Դիարբեքիի Կիրակոսը:

Մէկ այլ աղօթքում, որն ասւում էր ջերմ հիւանդութեան դէմ, յիշուում է Բարթուղիմէոսի դեւերին քշելու զօրութիւնը, եւ յիշատակուում է «Դատունա» անունով լեռ. «Սուրբ առաքեալն Բարդուղիմէոս ել ի լեառն Դատունայ, ետես անդ զդեւն ջերմոց

108 Լալայեան Ե., Նախիջեւանի գաւառ, մասն Ա. Գողթն կամ Օրդուբազի ուստիականական շրջան, Թիֆլիս, 1904 (Կրօնական զարգացումն,- Ազգագրական Հանդէս, գիրք XI), էջ 269:
 109 Անդ, էջ 296:
 110 Գ[րիգորեւ] Վ. Ն., Статистическое описание Нахичеванской провинции, Санкт-Петербург, 1833, с. 194.

111 Ալիշան Ղ. Ղ., Սիսական: Տեղագրութիւն Սիսական աշխարհի, Վենետիկ, 1893, էջ 316, 318:
 112 Յարութիւնեան Ս., Հայ հմայական եւ ժողովրդական աղօթքներ, Երեւան, 2006, էջ 178:
 113 Անդ, էջ 402-403:
 114 Անդ, էջ 296:

եւ կամէր հալածել զնա անդի: Եւ նա ըստորոտ ձայնիւ ասաց ցտուրբն.- Զի արդ հալածես զիս աստէն. յորոց վերայ անուն սրբոյ հրեշտակապետին Միքայէլի յիշեսցի՝ հալածեցայց յայնմանէ: Հալածեսցի անուամբ Հօր եւ սրբոյս պիղծս ծառայիս Աստուծոյ [տես ՄՄ, ձեռ. թիւ 6677, թ. 8ա (26)]»¹¹⁵: «Դատունա» անունով որեւէ բարձունք, լեռ ինձ յայտնի չէ, բայց «Դատեան» անունով լեռնագագաթ կար Հայկական պար լեռնահամակարգում, Եփրատի ձախ ափին, Մարիամ լեռնագագաթի հարեւանութեամբ¹¹⁶, «Դատեմ», «Դատեմի վանք», «Դատմա» անուններով յայտնի էր Մարիամ լեռան ստորոտում գտնուող գիւղը եւ գիւղի Սուրբ Աստուածածին անունով վանքը, որը, ըստ աւանդութեան, կառուցել էր Թադեւոս առաքեալը¹¹⁷, այսինքն աւանդոյթով այն առաքելաշէն էր: Ղ. Ալիշանը գրում է, որ Խարբերդի դաշտում կար «Դատեմայ վանք առ համանուն գիւղիս, յանուն Տիրամօր»¹¹⁸: XIX դարում Բաղէշի գաւառում, որը Մեծ Հայքի Աղձնեաց նահանգի մի գաւառն էր, գլխաւոր բնակավայրը Վանայ լճի ափին գտնուող Դատուան բնակավայր-նաւահանգիստն էր¹¹⁹: Բոլոր դէպքերում աղօթքի տեքստում ժողովրդական յիշողութիւնը Բարթոլղիմէոսին յստակ նոյնականացնում է առաքեալի մասին գրաւոր աւանդոյթի տեղանքի հետ:

Շարունակելը, թերեւս, իմաստ չունի: Մեր աշխատանքի այս մասում ընդամենը փոքր փորձ է արուել ցոյց տալու, որ Բարթոլղիմէոս առաքեալը 2000 տարիների ընթացքում այս կամ այն ձեւով «մասնակցել է» Հայաստանի եւ հայ ժողովրդի քաղաքական, հասարակական, մշակութային կեանքին, նրա անունով բազմաթիւ վանքեր են կառուցուել, դրանք դարձել են թե-

մերի կենտրոններ, գործել են եպիսկոպոսներ, որոնք մրցակցել են այլ «առաքելաշէն աթոռների» հեղինակութեամբ, դրանց կից գործել են ծխական դպրոցներ, դրանցում տօներ են կատարուել, Բարթոլղիմէոսին նուիրուած բազմաթիւ տեքստեր վարքեր, պատմութիւններ, աւանդագրոյցներ են գրուել, նրա հեղինակութեամբ հպարտացել են, մարդիկ նրան աղօթել են, նրա «անցած ճանապարհին ուխտավայրեր են առաջացել, դրանց այցելուները ակնկալիքներ են ունեցել եւ նուիրատուութիւններ են արել եւն: Այլ կերպ ասած՝ Բարթոլղիմէոսը Հայաստանի եւ նրա բնակչութեան կեանքի մաս է եղել եւ է առնուազն քրիստոնէութեան ողջ պատմութեան ընթացքում:

Թւում է, որ Բարթոլղիմէոս առաքեալի մասին ընդհուպ մինչեւ XX դ. 90-ական թուականները քրիստոնէական մեծ եկեղեցիները՝ կաթոլիկները, յոյն եւ սլաւոն ուղղափառները, բողոքականները հիմնականում կրկնում են նոյն պատմութիւնը կամ այդ պատմութեան տարբեր դրուագներ: Նրանք յատուկ հակադրութիւնների նպատակ չունեն, եւ ընտրում են հին աղբիւրների կոնկրէտ հատուածներ կամ առաքելական գործունէութեան դրուագներ: Հարցը, թէ ինչո՞ւ է Ռուս Ուղղափառ Եկեղեցին ջանում Բարթոլղիմէոսի վերաբերեալ նոր «այբանական առասպել» յորինել/ստեղծել, մնում է անպատասխան: Հասկանալի է, որ առասպելները ծնւում են որոշակի իրավիճակներում եւ որոշակի խնդիրներ լուծելու համար: Բոլոր դէպքերում՝ առասպելներն առանց որեւէ վաւերական հիմքի որեւէ իրաւական հարց չեն լուծում: Յատուկ ջանքերի դէպքում դրանք, սակայն, կարող են ազդել եւ, ինչպէս տեսնում ենք, ազդում են տարածաշրջանի մշակութային անցեալի

115 Անդ, էջ 283:

116 Հայաստանի եւ յարակից շրջանների տեղանունների բառարան, հտ. 2, Երեւան, 1988, էջ 48:

117 Անդ, էջ 47:

118 Ալիշան Ղ. Հ. Տեղագիր Հայոց Մեծաց, էջ 43:

119 Հայաստանի եւ յարակից շրջանների տեղանունների բառարան, հտ. 2, էջ 48:

զարգացումների մասին մշուշոտ պատկերացումներ ստեղծելու վրայ, ինչպէս նաեւ դրանք որպէս բարոյական հիմք օգտագործելով՝ մշակութային ողջ լանդշաֆտի վերաբերեալ պատկերացումների, բնակչութեան ինքնութեան վերահառուցումների եւ առկայ յարաբերութիւնների վրայ: Բայց եթէ Բարթոլոմէոսի նորածնունդ «ալբանական առասպելի» հիմնական նպատակը Ադրբեջանի տարածքի Հայկական մշակութային ողջ ժառանգութիւնը ալբանացնել-ադրբեջանացնելն է, կամ աւելի վատ ոչնչացնելը, ինչն արդէն իսկ տեղի է ունենում, ապա դա կարող է եւ պէտք է միջազային իրաւական քննութեան ենթարկուի:

Առայժմ խնդիրը երբեմն նոյնիսկ արտառոց դրսեւորումներ է դտնում: Այսպէս Հայ Առաքելական եկեղեցու 2024 թ. միւլտիմեդիա արարողութեան ժամանակ Ամենայն Հայոց կաթողիկոսը շրջանցեց Բարթոլոմէոսի անունը յիշատակելով միայն «Տիրոջ կողմից օրհնուած սուրբ իւղ»-ը Հայաստան բերած Սուրբ Թադէոս առաքեալի

անունը (Հմմ. «Միրելիներ, Սրբալոյս Միւլտիմեդիա օրհնութիւնը մեզ յիշեցնում է նուիրական օրերը հայոց դարձի: Սուրբ Գրիգոր Լուսաւորիչ Հայրապետի ձեռամբ, բիրյիական Արարատի վեհապանծ հայեացքի ներքոյ, մեր ժողովուրդը մկրտուեց եւ օծուեց մեր Տիրոջ կողմից օրհնուած եւ Սուրբ Թադէոս առաքեալի միջոցով Հայաստան բերուած սուրբ իւղով եւ մէկ դարձաւ Քրիստոսով ու իր Սուրբ Եկեղեցիով»)120: Մինչդեռ Բարթոլոմէոսի մասին միջնադարեան ողջ Հայկական (եւ ոչ միայն Հայկական) տեղեկանին գրում է Բարթոլոմէոսի կողմից Հայաստանում արուած մկրտութիւնների մասին: Այլ կերպ ասած, քրիստոնէական աւանդոյթով Բարթոլոմէոսը նոյնպէս Հայաստան էր բերել «մեր Տիրոջ կողմից օրհնուած իւղը»: Խորհրդանշական է, որ «ձեռամբ Ամենայն Հայոց կաթողիկոսի օրհնուած 21-րդ դարի չորրորդ Միւլտիմեդիա կողմից «գրոշմ ինքնութեան»121: Արդ Հայոց քրիստոնէական ինքնութիւնից դ՞ուրս թողնուեց Ս. Բարթոլոմէոս առաքեալը122:

120 Ն.Ս.Օ.Տ.Տ. Գարեգին Բ Ամենայն Հայոց Կաթողիկոսի պատգամը միտոցօրհնութեան արարողութեան առիթով,- <https://www.armenianchurch.org/hy/news/28-09-2024/11682> (վերջին այցելութիւնը կայք՝ 24.06.2025):

121 Ձեռամբ Ամենայն Հայոց Կաթողիկոսի օրհնուեց 21-րդ դարի չորրորդ Միտոցում եւ կոչուեց «Դրոշմ ինքնութեան»,- <https://ter-hambardzum.net/orhneve-c-21-rd-dari-chorrord-myroneh/> (վերջին այցելութիւնը կայք՝ 24.06.2025):

122 Խմբ. կողմից.- 1994 թուականին Հոռոմի եկեղեցին, արտայայտելով իր «սէրն ու յարգանքը, որ հիմնուած է Ս. Պօղոս եւ Ս. Պետրոս Առաքեալների քարոզչութեամբ հանդէպ Հայ Առաքելական Եկեղեցին, որ հիմնուած է Ս. Բարդուղիմէոս եւ Ս. Թադէոս Առաքեալների քարոզչութեամբ», Հոռոմի նշխարների գանձարանից Հայ առաքելական Եկեղեցուն յանձնեց Ս. Բարդուղիմէոս եւ Ս. Թադէոս Առաքեալների մասունքները, քանի որ նրանք «հիմնեցին Հայ Եկեղեցին» (տե՛ս «Էջմիածին», 1994, Դ-Ե, էջ 23-26: Նոյն տեղում տե՛ս նաեւ մասունքների վաւերականութիւնը հաստատող վկայագրերը):